

## የሱስ ኪቴዳዎንቱ ኦሎዎ ገሉዋ

የሱስ ኪቴዳዎንቱ ኦሎዎ ገተትያ ማጻፋይ፡ ሉቃስ ምሽራቸው ካሊደ ጻፈቱዳ ማጻፋ። አዉ ደእያ ሁጳ ቆፋይ ኮይሮ የሱሳ ካሌዳ አሳቱ ጌሻ አያናን ካለሰቲደ፡ አባ ኦድያ ምሽራቸው ቃላ “የሩሳላሙን፡ ይሁዳ ጋድያ ኡባን፡ ሳማርያን፡ ሳኦ ጋጾ ጋካናዉ” ምሽራቸው ቃላ ዋት ጋድያ ኡባ ጋፊደንቶ ኦዳናሳ (ኪታ 1:8)። ማጻፋይ ክርስትና አማኑ አይሁዳ አሳቱዋ ግደን ደመቲደ፡ ኩመንሳ አላምያን ደእያ አሳ ኡባ አማኑዋ ግደና ጋካናዉ ዋን አኬደንቶ ኦድያ ታርክያ። ጻፊ፡ አማንያ አሳቱ ሮማ ካዉተላ ኦላናዉ ጋርሳና ማቀትያ አሳ ግደናዋን ክርስትና አማኑ አይሁዳቱዋ አማኑዋ ኩመንሳ ኦልያዋ ግድያዋ ኤርሳናዉ ዳርሰ ደቡሪደ አፊዳ።

የሱስ ኪቴዳዎንቱ ኦሎ የሱሳባ ኦድያ ምሽራቸው ቃላይ ጋክያ ሳኦይ ዋድያን ዋድያን አክ አክ ብያዋን ዋሳ ጎሊ ኤቄዳዋ ቆንጭሰያዋ ሄዙ ሁጳ ሳን ሻካናዉ ዳንዳየቱ፡

1. ክርስትና አማኑ የሱስ ሳሉዋ ቸደ ብ ሰምና ደመቲዳባ፤
2. እሰራኤልያ ጋድያ ኡባ ጋኬዳባ፤
3. ሮመ ጉጂደ ሜድትራንያ አባ ዩሹዋን ደእያ ጋድያን አኬዳዋ ኦዴ።

የሱስ ኪቴዳዎንቱ ኦሎዎ ማጻፋን ዳርፕ ኤረቶቄ ጌሻ አያና ኦሎዋ ግድሽን፡ ጳንጳቆስተ ጋላሰ የሩሳላሙን ደእያ አማንያዎንቱ ቦላ ዋልቃፕ እ ዋጄዳዋ፡ ሀዋዳንካ ማጻፋ ግደን ኦደቲዳ ኦሳቱዋ ኡባን ቤቲዳዋዳን፡ ጌሻ አያናይ ዋሳ ጎልያን ዋሳ ጎልያ ካለልያዋንታ ካለፊዳዋን ምንሴዳዋ ጉጂደ ኦዴ። በን ዋደ ኦሰትያ ክርስትና ኪታይ ዲማ ዲማ ኦዴዳ ቃላ ግደፕ ማጽ ከሰና፡ ቃንላን ሺቄዳ። የሱስ ኪቴዳዎንቱ ኦሎዎ ግደን ፖለቲዳ ኪታቲካ ሄ ኦሎ አማንያ አሳ ደኡዋንን አማንያዎንቱ እትፕተላን ደእያ ዋልቃይ እይ ከና ዳረንቶ ኦዴ።

### ሸምፓቱዋ ኡባቶ እመቲዳ ቃንላ ቆፋቱዋ

- ማርካተላዉ ጊጉዋ 1:1-26
- ዉርሰላን የሱስ እሜዳ አዛዙዋን ህደታ 1:1-14
- ይሁዳ ኮታ ገሌዳዋ 1:15-26
- የሩሳላሙን ኦሰቲዳ ማርካተላ 2:1—8:3

ይሁዳንን ሳማርያን ኦሱቴዳ ማርካተላ 8:4—12:25  
 ጳውሎስ ኪተቴዳ ኦሱዋባ 13:1—28:31  
 ጳውሎስ ኪተቴዳ ኦሱ ኮይሮ ሀመታ 13:1—14:28  
 የሩሳላመ ሺቁዋ 15:1-35  
 ጳውሎስ ኪተቴዳ ኦሱ ላኤንሉ ሀመታ 15:36—18:22  
 ጳውሎስ ኪተቴዳ ኦሱ ሄዘንሉ ሀመታ 18:23—21:16  
 የሩሳላመን፣ ቁሳርያንን ሮመን ሀኔዳ ጳውሎስ ቃሹዋ 21:17—  
 28:31

1-2 ቶፍሎሳ፣ የሱስ ሳሉዋ ቤዳ ጋላሳይ ጋካናዉ፣ ኦላናዉን ታማርሳናዉ ደሜዳዋ ኡባባ ታን ታ ኮይሮ ማጻፋን \* ጻፋድ። ሳሉዋ ባናፕ ካሰ እ ባረ ደሪደ ኪቴዳዋንታ ጌሻ አያናን አዛዜዳ።  
 3 እ ባረ ኪቴዳዋንቶ ኦይታሙ ጋላሳ ቤቴድን ቃይ ጸሳ ካዉተላባ ኡንቱንቶ ኦዲደ፣ ባረ ዋይያፕ ጉይያን፣ ሀይቁዋፕ ደንዴዳዋ ሰ□ ባይናን ሎይሉ አማንሊደ፣ ባረና ኡንቱንታ በሴዳ።  
 4 ኡንቱንቱና እትፕ ደኢደ፣ ኡንቱንታ ሀዋዳን ያጊደ አዛዜዳ፤ “የሩሳላመፕ ከሶፕተ፤ ሸን ሀንተንቱ ታፕ ሰሴዳ ታ አቡ ሀንተንቶ አማና ጊደ ሀዶቴዳዋ ናግተ።  
 5 አያዉ ሳፕ፣ የሃንሰ ሃላን ጸማቁዳ፤ ሸን ጉላ ዋድያፕ ጉይያን፣ ጌሻ አያናን ሀንተንቱ ጸማቀታንታ” ያጌዳ።

የሱስ ሳሉዋ ቤዳ  
 (ማር. 16:19-20፤ ሉቃሳ 24:50-53)

6 የሱስ ኪቴዳዋንቱ የሱሳና ጋከቴዳ ዋደ እ፣ “ሳዳዉ፣ ሀ ዋድያን እስራኤላቶ ካዉተላ ዛራኒ?” ያጊደ ኦቹድኖ።  
 7 የሱስ ኡንቱንታ፣ “ታ አቡ ባረ ሳዳተላን ኬሬዳ አገናን ዋድያ ሀንተንቱ ኤራናሳ ግደና።  
 8 ሸን ጌሻ አያናይ ሀንተንቱ ቦላ ዋድያ ዋደ፣ ዋልቃ ሀንተንቱ አካንታ፤ ያቲደ የሩሳላመንን ይሁዳ ጋድያ ኡባን፣ ሳማርያንን ጋድያ ጋጸ ኡባ ጋካናዉ ታዉ ማርካትያዋንታ ግዳንታ” ያጌዳ።  
 9 ሄዋ ጌዳዋፕ ጉይያን፣ ኡንቱንቱ ጸልሸን፣ ጶቁ ጶቁ ጊደ፣ ሳሉዋ ቢና፣ ኡንቱንቱ አይፍያፕ ሻሪ አ ገንሌዳ።  
 10 የሱስ ቦላዉ ደንድያ ዋደ፣ ኡንቱንቱ ሳሉዋ ጫድ ጸልሸን፣ ቦላ ማዩዋ ማዬዳ ላኡ አሳቱ ኤለካ ኡንቱንቱ ማታን ኤቂደ።

---

1:1-2 ሉቃሳ 1:1-4 \* 1:1-2 ታ ኮይሮ ማጻፋን፡- ሉቃሳ ሞሽራቹዋ ማጻፋ።  
 1:4 ሉቃሳ 24:49

11 “ጋሊላ አሳቶ፣ ሳሉዋ ጸሊደ፣ ህንተንቱ አያው ኤቄድቱ?  
ሀ ህንተንቱ፣ ሳሉዋ ቤዳ የሱስ ሳሉዋ ብያዎ ህንተንቱ  
በኤዳዋዳንካ፣ ስሚደ ያናዋ” ያጌድኖ።

ይሁዳ ኮታ ማትያስ ደረቱዳ  
(ማቶሳ 27:3-10)

12 ሄዋፕ ጉይያን፣ የሱስ ኪቴዳዋንቱ ደብረ ዛይተ ጌተትያ  
ዎጋራ ሞላ ደርያፕ የሩሳላመ ስሜድኖ። ዎጋራ ሞላ ደሪ  
የሩሳላመፕ እት ኪሎ ሞትርያ ኬና።

13 የሱስ ኪቴዳዋንቱ የሩሳላመ ገሊደ፣ ባረንቱ ደእያ ሳኦ ቶቃ  
ፑደ ከሴድኖ፤ ያ ከሴዳዋንቱ ሱንላይ ጸጽሮሳ፣ ዮሃንሳ፣ ያቆባ፣  
እንድራሳ፣ ፕልጸሳ፣ ቶማሳ፣ ባርታላሞሳ፣ ማቶሳ፣ እልፕዮሳ ናኦ  
ያቆባ፣ ባረ ጋድያወ ሴለትያ † ስሞናን ያቆባ ናኦ ይሁዳ።

14 ሀዋንቱ ኡባቱ ማጫዋንቱና፣ የሱሳ ዳይ ማይራምናን የሱሳ  
እሻቱዋና ኡባይ እት ዎዛና ግዲደ፣ ኡባ ዎደ እትፕተላን ዎሳወ  
ሺቂኖ።

15 ሄ ዎደ፣ ጸጽሮስ ጾታን ላታማ ግድያ አማንያ አሳ ሸቁዋን  
እትፕ ደእያ ባረ እሻቱዋ ግድን ደንድ ኤቄደ፣ ሀዋዳን ያጌዳ፤

16 “ታናዳን አማንያዎንቶ፣ የሱሳ ኦይቄዳዋንታ ካለጼዳ  
ይሁዳባ ጌሻ እያናይ ካስ ዳዊተ ደናን ኦይዳ ጸሳ ማጸፋ ቃላይ  
ፖለታናወ በሴ።

17 እያወ ጎፕ፣ ይሁዳ አስቆሮቱ ኑናና ደኤ፤ ቃይ ኑናና እቱዋ  
ግድ ፓይደቲደ ኦሱዋ ባጋይ ደእና ማላ ደረቱዳ” ያጌዳ።

18 ይሁዳ አስቆሮቱ ባረ ኢታ ኦሱዋን ደሜዳ ሚሻን ጋድያ  
ሻሜዳ፤ ስንላወ ጉፋኒደ ኩንድና፣ አ ኡሉ ግዲዋፕ ዳከቱዳ፤ አ  
ማራጪ ኡባይካ ካረዉ ጵልጸት ከሰ አጌዳ።

19 ይሁዳ ቦላ ሀኔዳዎ የሩሳላመን ደእያ አሳይ ኡባይ ሰሴዳ፤  
ሄዎ ድራዉ፣ ሄ ጋድያ ባረንቱ ቃላን አከልዳማ ጊደ ሱንሌድኖ፤  
ሄዎ ብለላይ ሱላ ጋድያ ግያዋ።

20 ጸጽሮስ ኦዲደ፣ እያወ ጎፕ፣ ማዝሙርያ ማጸፋን፣  
አ ጎሊ መላ አቶ፤

ኦንነ ሄዋን ደኦፕ

ቃይ

አ ሱንላተላካ ሀራይ አኮ

ጌተቲደ ጸፈቱዳ።

† 1:13 ባረ ጋድያወ ሴለትያ፡- ሀ ሱንላይ ካላፕ ሮመ አሳና ኤቀቲደ ኦሊቴዳ  
እይሁደ አሳዉ አመቱዳዋ። 1:20 ማዝ. 69:25፤ 109:8

21-22 ህዋ ድራው፡ እት አሳይ ጎዳ የሱሳ ደንዲዋ ማርካታናው፡ ኑናና ጋከታናው በሴ፤ ዮሃንስ ጸማቄዳ ዋድያ፡ የሱሳ ኑ፡ ሳሉዋ ቤዳ ዋዲ ጋካናው፡ ጎዳ የሱሳ ኑናና ሀመቲዳ ዋድያ ኡባን እ ኑናና ደእያዋንቱ፡ እቱዋ ግድ ሱን፡ ታናው በሴ።

23 ህዋ፡ ጉዮ አማንያ አሳይ ዶሮ ዮሰጾሳ ግያ ባርሳባ ጌተትያ ዮሴፎን ማትያሳ ላኡዋ ኤሴድኖ።

24-25 ህዋ፡ ጉይያን፡ ጾሳ ዋሲድ፡ “ኡባ ዋዛና ኤርያ ጎዳው፡ ይሁዳ አስቆሮቱ ባረሳ ባናው የጊደ ቤዳ ኡሱዋን የሱሳ ኪቴዳ ኡሱዋ ሀዳራ አካናዳን፡ ሀ ላኡ አሳቱዋ፡ እቱዋ ኔን ዶሬዳዋ ኑና በሳ” ያጌድኖ።

26 ኡንቱንቱን ሳማ የጌድና፤ ሳማይ ማትያሳ ቦላን ዋድና፡ ማትያሳ የሱሳ ኪቴዳ ታማን እት ኪተታዋንቱና ፓይደቲዳ።

## 2

### የሱሳ ካልያዋንቱ ቦላ ጌሻ አያና ዋፋ

1 ጳንጸቆስተ\* ግያ ጋላሳይ ጋኬዳ ዋድ፡ አማንያዋንቱ ኡባቱ እት፡ ግዲድ፡ እትሳ ሸቅ ደእሸን፡

2 ዋልቃማ ጎቱዋዳን ጉምያ ጉንላይ ዋዛና አፍን ሳሉዋ፡ ዪድ፡ ኡንቱንቱ ኡቲዳ ጎልያ ኡባ ኩሜዳ።

3 ቃይ ታማ ላጩዋዳን ፖዲግያዌ ኡንቱንቱ ቤቲድ፡ ሻከት ሻከት፡ ኡንቱንቱ ኡባ ቦላ ዋዴዳ።

4 ኡንቱንቱ ኡባን ጌሻ አያናይ ኩሚድ፡ ዲማ ዲማ ቃላን ሃሳያና ማላ፡ ኡንቱንታ ዳንዳይሰና፡ ሃሳያ ደሜድኖ።

5 ሳኣን ደእያ አሳ ዘረላ ኡባ፡ ዪድ፡ ጾሳው ያይያ እት፡ ደእያ አይሁዳቱ የሩሳላመን ደኢኖ።

6 ሀ ጉንላ ሰሴዳ ዋድ፡ አሳይ ኡባይ ሸቄዳ፤ ኡንቱንቱ ባረንቱ ቃላን ቃላን ሃሳይሸን ሰሴዳ ድራው፡ ግያዋ ጳዬድኖ።

7 አሳይ ኡባይ ማላለቲድን ሀዌ ኡራሳባ ጊድ፡ “በእተ፤ ሀ ሃሳይያዋንቱ ኡባቱ ጋሊላ አሳቱዋ ግድክና?

8 ያትና፡ ኑን ኑ የለቲዳ ጋይ ቃላን ኡንቱንቱ ሃሳይሸን ዋኒደ ሰሴቶ?

9 ኑን ጳርተ አሳቱ፡ ሜዶን አሳቱ፡ ኤላሚጾ አሳቱ፡ ላኡ ሻፋቱዋ፡ ግዲዋን ደእያዋንቱ፡ ይሁዳን፡ ቃጳደቅያን፡ ጳንጾሳን፡ ኢሲያን፡

\* 2:1 ጳንጸቆስተ- አይሁድያ አሳይ ፓሰጋ ባላ ቦንቾ፡ ለሻታሙ፡ ጋላሳይ አድ ሰምና ቦንቾትያ ዛርጋ ቆይቻ ባላ ጌተትያዋ። 2:1 ዋጋ 23:15-21፤ ዛረ. 16:9-11

10-11 ፕርግያን፣ ጵንፍልያን፣ ግብጾን፣ ቀሬና ባጋን ደእያ ሊብያ ዎራዳቱዋን ደእያዋንቱ፣ ሮመፕ ዬዳ እማፋቱ፣ አይሁዳቱ፣ አይሁዳተፋዉ ላመቴዳ ኑፕ እማሬዳዋንቱ፣ ቃርጾስ አሳቱ፣ አራብያ አሳቱ፣ ጳሳይ ኦፊዳ ዎልቃማ ኦሱዋ ኑ ቃላን ኡንቱንቱ ሃሳይሽን ሰሴዶ” ያጌድኖ።

12 ኡባይካ ማላለቲዶ፣ የዉ ባረንቶ ገለናን እጽና ባረንቱ ግድን፣ “ላ ሀዌ ዋግያዌ?” ያጌድኖ።

13 ሸን ሀራ አሳቱ እማንያዋንቱ ቦላን ቅሊጨደ፣ “ሀዋንቱ ኡሺደ ማላቲድኖ” ያጌድኖ።

**ጳጵሮሳ ሃሳያ**

14 ሸን ጳጵሮስ፣ የሱስ ኪቴዳ ሀራ ታማነ እት ኪተቶዋንቱና ደንድ ኤቂደ፣ ባረ ኮሻ ቶቁ ኦሊደ፣ ኡንቱንቶ ሀዋዳን ያግ ኦዴዳ፤ “አይሁዳቶ፣ ቃይ የሩሳላመን ደእያ ኡባቶ፣ ታን ኦድያዋ ሰሰተ። ሀዌ ህንተንቶ ኤረቶ፤ ህንተንቱ ቆፕያዋዳን፣ ሀዋንቱ ማላትቦይክኖ።

15 እያዉ ጎፕ፣ ዎንታፕ ብር ሄዙ ሳተ ግዴ።

16 ሸን ሀዌ ናብያ እዩኤል ሃሳዬዳዋ።

17 “እ ሃሳዩደ፣ ጳሳይ ሀዋዳን ያጌዳ፤

ዎድያ ዉርሰላን ሀዋዳን ሀናናዋ።

ታን አሳ ኡባ ቦላን ታ አያና ጉሳና።

ህንተንቱ አቱማ ናናይነ ህንተንቱ ማጫ ናናይ

ትምቢትያ ኦዳናዋንታ።

ህንተንቱ ዎዳላ ናናይካ ሳፃ በአናዋንታ፤

ህንተንቱ ጭማቱካ እኩሙዋ እኩሙታናዋንታ።

18 ሄ ጋላሳቱን ታ አቱማ ቆማቱዋ ቦላን

ታ ማጫ ቆማቱዋ ቦላን

ታን ታ አያና ጉሳና።

ሄዋፕ ጉየ ኡንቱንቱ ትምቢትያ ኦዳናዋንታ።

19 ቃይ ታን ቦላ ሳሉዋን ኦራላባ፣

ጋርሳ ሳንካ ማላታ በሳና።

ሱላይ፣ ታማይነ ሻርያዳን፣

ካሜዳ ጨዋይ ደአና።

20 ዎልቃማን ቦንቾ ግዴዳ ጎዳ ጋላሳይ፣

ጋካናፕ ካሰ አዋይ ቆማና፤

አገናይካ ሱላ ማላታና።

21 ሄ ዎደ ሀዋዳን ሀናናዋ፤

ጎዳ ሱንፋ ጸሰያ ኮንነ አታና  
ያጌዳ።

22 “እስራኤልያ አሳቶ፣ ሀ ቃላ ሰሰተ፤ ናዝሬትያ የሱሰ ሀንተንቱ ግድን ጸሳይ ባረናን ኦሌዳ ዋልቃማ ኦሱዋን፣ ኦራፋባንነ ማላታን ሀንተንቶ ጴሽሴዳ አሳ፤ ሄዋ ሀንተንቱካ ኤሪታ።

23 የሱሰ ሀንተንቶ እመታና ማላ፣ ጸሳይ ካሰ ባረ ሸንያንነ ባረ ኤራን ባረ ቆፋ ቃቾ ዋሌዳ፤ ያትና፣ አ ሀንተንቱ ናጋራንቻቱዋ ኩሽያን ማሰቃልያ ቦላ ሞሰማርያን ጴሽሴዳ፣ ካቅሰ ዋጵሴድታ።

24 ሸን ሀይቁ የሱሳ ኦይቃናዉ ዳንዳይቤና ድራዉ፣ ጸሳይ ሀይቁዋ ሴላ አፕ ጳይሴደ፣ አ ደንሌዳ።

25 አያዉ ጎፕ፣ ዳዊተ የሱሳባ ሀዋዳን ያጌዳ፤

“ ሳን መቶተናዳን፣

ጎዳይ ታ ኡሽቻን ደእያ ድራዉ፣  
ታን ኡባ ዋደ ጎዳ ታ ማታን በአይ።

26 ሄዋ ድራዉ፣ ታ ዋዛናይ ናሽቲዳ፤

ታ እንጸርሳንካ ናሽቻይ ኩሜዳ።

ቃይ ታ ቦላይካ ሎኦ ደእና ጊደ፣

ናሽቻን ናጌ።

27 አያዉ ጎፕ፣ ታ ሸምፑዋ፣

ሰኦልያን አጋካ።

ቃይ ነ ጌሻ ናኦ አሃካ ዋቀላካ።

28 ኔን ታና ደኡዋ ኦግያ ኤርሳዳ።

ኔን ታናና ደእያዋን፣

ታን ዳሪ ናሽታይ፣

ያጌዳ።

29 “አሻቶ፣ ኑ አዎቱዋ ካፑዋ ዳዊተባ ታን ሀንተንቶ ጌሻደ ኦዳናዉ በሴ፤ ዳዊተ ሀይቂደ ሞገቲዳ፤ አ ዱፋ ሀቼ ጋካናዉካ ኑ ማታን ደኤ።

30 ዳዊተ ናብያ ግዴዳ ድራዉነ ጸሳይ አ ናና ዘረፋፕ እቲዋ አ ካዉተላ ኦይድያን ኡትሳናዉ አዉ ጫቄዳዋ ኤራዳ ድራዉ፣

31 ክርሰቶሳ ደንዳዋ ሰንፋዉ ጸሊደ፣ ሓ ሸምፑ ሰኦልያን አትቤና፤ አ ቦላይካ ዋቂቤና፣ ጊደ ኦዴዳ።

32 “ጸሳይ የሱሳ ሀይቁዋፕ ደንሌዳዋ ኑን ኡባይ ማርካ።

---

2:25 ማዝ. 16:8-11      2:30 ማዝ. 132:11፤ 2 ሳሜላ 7:12-13

33 ሄዋ ድራው፡ ጸሳይ ባረጥ ኡሸቻ ባጋን ተ አ ቶቁ ቶቁ ኦሊደ፡ አዉ ጌሻ አያና እማና ጌዳዋዳን፡ ጌሻ አያና አኪደ፡ ሀዋ ሀንተንቱ ሀእ በእያዋነ ሰሰያዋ ኑ ቦላ ጉሴዳ።

34-35 “አያው ጎጥ፡ ዳዊተ ባረ ሁጳው ሳሉዋ ከሰቤና፤ ሸን ያጌዳ፤

“ ሳዳይ ታ ጎዳ፤ “ታን ነ ሞርከቱዋ፡ ኔን ገድያን የቆ ኤቂያዋ አፋና ጋካናዉ ሀዋን ታጥ ኡሸቻ ባጋና ኡታ” ጌዳ፣ ያጌዳ።

36 “ሄዋ ድራው፡ ጸሳይ ማሰቃልያ ቦላ ሞሰማርያን ሀ ሀንተንቱ ትሺደ ካቂዳ የሱሳ ጎዳነ ክርሰቶሳ ኦሌዳዋ እሰራኤልያ አሳ ዘረላይ ኡባይ ቱሙጥ ኤሮ” ያጌዳ።

37 አሳይ ጳጵሮስ ጌዳዋ ሰሴዳ ዎደ፡ አሳዉ ዎዛናይ ዳሮጥ ቦሸትና፡ ጳጵሮሳነ የሱሰ ኪቴዳ ሀራቱዋ፡ “ኑ እሻቶ፡ ያትና ኑን አያ ኡዳኔ?” ያጌድኖ።

38 ጳጵሮስ ኡንቱንታ፡ “ሀንተንቱ ናጋራይ አቶ ጌተታና ማላ፡ ናጋራጥ ሰሚደ፡ ሀንተንቱ ሁጲያን ሁጲያን የሱሰ ክርሰቶሳ ሱንላን ጸማቀትተ። ጸሳይ እምያ ጌሻ አያና ሀንተንቱ አካና።

39 አያው ጎጥ፡ ጸሳይ እማና ጌዳ ቃላይ ሀንተንቱሳ፡ ሀንተንቱ ናናቱዋሳነ ጎዳይ ኑ ጸሳይ ባረኮ ጴሰያ ሃኩዋን ደእያዋንቱ ኡባሳ” ያጌዳ።

40 ጳጵሮስ ኡንቱንቶ ቃላ ሀራካ ጉጅ ማርካቲደ፡ “ሀ ዎድያ ጌላ አሳጥ ሀንተንቱ ሁጲያ አሸተ” ያጌደ ዘራዳ።

41 ጳጵሮስ ኦዴዳዋ አኬዳዋንቱ ጳማቀቱድኖ፤ ሄ ጋላስ ሄዙ ሻአ ግድያ አሳይ አማኔድኖ።

42 ኡንቱንቱ የሱሰ ኪቴዳዋንቱ ትምርትያን፡ እትጥተላን ኡክላ መንሐ ምያዋንነ ጸሳ ዎሳን ገንጨኖ።

አማንያ አሳይ እሻተላንነ እትጥተላን ደእያ ደኡዋ

43 የሱሰ ኪቴዳዋንቱ ኩሸያን ዳሮ ኦራላባይነ ማላታቱ ኦሰትና፡ አሳ ኡባ ያሻይ ኦይቂዳ።

44 አማኔዳ ኡባቱ እትጥ ደእኖ፤ ቃይ ባረንቶ ደእያባ ኡባካ እትጥ ሻክ አኬድኖ።

45 ኡንቱንቱ ባረንቱ ጋድያነ ባረንቶ ደእያባ ዛልእ ዛልኢደ፡ ኦናነ ኮሸዳ ኬና ሚሻ ኡባዉ ሻኬድኖ።

46 ቃይ ኡባ ጋላስ፡ እት ዎዛና ግዲደ፡ ጌሻ ጎልያን ፓጨናን ጋከቲደ፡ ባረንቱ ጎላ ጎላ ጸስቲደ ናሽቻንን ፓሽካ ዎዛናን ቁማ ሚኖ።

47 ጸሳ ጋላቲደ፡ አሳ ኡባን ሳበቴድኖ። ቃይ ጎዳይ አማን አትያዋንታ ጋላስ ጋላስካ ኡንቱንቱ ቦላ ጉጁ።

### 3

#### እት ዎባ ብታኒ ፓጾዳ

1 እት ጋላስ፡ ጳጵሮስን የሃንሰ ጸሳ ዎሳናዉ ኡዲፑ ሳትያን ጌሻ ጎልያ ቤድኖ።

2 የለቶደፕ ደሚደ፡ ጉንዳ ግዲደ ደእያ እት ብታኒ ጌሻ ጎልያ ገልያ አሳፕ ሚሻ ዎሳናዉ፡ ኡባ ጋላስ ዳሪ ሎኦ ግያ ጌሻ ጎልያ ፕንግያን አሳይ አፊደ ዎልያዎ ደኤ።

3 ሄ ዎባ ብታኒ፡ ጳጵሮስን የሃንሰ ጌሻ ጎልያ ገላና ሀንሽን በኢደ፡ ሚሻ ኡንቱንታ ዎሴዳ።

4 ጳጵሮስ የሃንሳና አ ጫድ ጸሌደ፡ “ኑኮ ሃ ጸላ” ያጌዳ።

5 ዎባ ብታኒ ኡንቱንቱፕ እትባ አካናዉ ኮዪደ፡ ኡንቱንቱኮ ጸሌዳ።

6 ሽን ጳጵሮስ አ፡ “ታዉ ሚሻይ ባዎ፤ ሽን ታዉ ደእያባ ታን ነዉ አማና፤ ናዝሬትያ የሱስ ክርስቶሳ ሱንጻን ደንዳደ ሀመታ” ያጌዳ።

7 ያቲደ፡ ዎባ ብታንያ ባረ ኡሽቻ ኩሽያን ኦይቂደ፡ ፑደ ደንጮዳ፤ ኤለካ አ ገዲነ ሚሽ መቀላይ ሞን አጌዳ።

8 ብታኒ ፑደ ጉፒደ፡ ደንድ ኤቂዳ፤ ያነ ሃነ ሀመታ ደሚደ፡ ሄዎፕ ጉይያን ሀመቲደ፡ ጉፒድነ ጸሳ ጋላቲደ፡ ኡንቱንቱና እትፕ ጌሻ ጎልያ ገሌዳ።

9 እ ሀመትሺናነ ጸሳ ጋላትሽን፡ አሳይ ኡባይ አ በኤዳ።

10 ያቲደ፡ ሚሻ ዎሳናዉ ዳሪ ሎኦ ግያ ጌሻ ጎልያ ፕንግያን ኡቴዳዎ አ ግዴዳዎ አኬኬድኖ፤ እ ሀኔዳዎ በኢደ ማላለቴድኖ።

#### ጳጵሮስ ጌሻ ጎልያን ሃሳዬዳ ሃሳያ

11 ብታኒ ጳጵሮሳን የሃንሳ ኦይቂ ኡቴዳ ዎደ፡ አሳይ ኡባይ ማላለቲደ፡ ሶሎሞነ ባራንዳ \* ግያ ሳን እትፕ ኡንቱንቱኮ ዎጾድኖ።

---

\* 3:11 ሶሎሞነ ባራንዳ፡ ጌሻ ጎልያ አዋይ ዶልያ ሰንላ ባጋና ጮራ አሳይ ሸቅያ አዲሳነ አኮ ሳእ።



12 ጳጳሮስ አሳ በኤዳ ዋደ ኡንቱንቶ ያጌዳ፤ “እስራኤልያ አሳቶ፣ አያው ሀዋ ማላለቲቱ? ዋይ አያው ኑና ጫድ ጸሊቲ? ኑን ኑ ዋልቃን ዋይ ጸሳ ማላትያዋን ሀ ብታንያ ሀመሌዳዋ ሀንተንቶ ማላቲ?

13 አብራሃዋ ጸሳይ፣ ይሳቃ ጸሳይ፣ ያቆባ ጸሳይ፣ ኑ አዋቱዋ ጸሳይ፣ ሀንተንቱ አሕ እሜዳዋ ጽላጸስ ብላናው ቆፕ ኡቴዳ ዋደ፣ ሀንተንቱ አ ሰንላን፣ ፉን አ ኤርኮ፣ ጌዳ ባረ ናአ የሱሳ ቦንቼዳ።

14 ሸን ሀንተንቱ ጌሻነ ጽሉዋ፣ ፉን አ ኤርኮ፣ ጊደ፣ ሸምፑዋ ዋዴዳዋ አ ድራ ሀንተንቶ ብላናው ጽላጸሳ ዋሴድታ።

15 ደኡዋ እምያዋ ሀንተንቱ ዋዴድታ፤ ሸን ጸሳይ ሀይቁዋፕ አ ደንሌዳዋ ኑን ማርካ።

16 ሀ ዋባ ብታንያ የሱሳ ሱንሳ ዋልቃይ ምንሴዳ፤ ሀንተንቱ በእያዌነ ኤርያዌካ እ አ ሱንላን አማንያዋን ኦስቲዳ፤ ሀ ሀንተንቱ ኡባ ሰንላን አ ሀዋዳን ሎይሌዳዌ፣ የሱሳ እ አማንያዋ።

17 “ሀእካ ታናዳን አማንያዋንቶ፣ ሀንተንቱካ ሀንተንታ ካልያዋንቱዳን፣ ኤረናን ኦሌዳዋ ታን ኤራይ።

18 ሸን ጸሳይ በን፣ ናባቱዋ ኡባቱዋ ደናን፣ ፉክርሰቶስ ዋየታና በሴ፣ ያጌደ ኦዴዳ፤ ባረ ኦዴዳዋካ ሂዋዳን ፖሌዳ።

19-20 ስም ጸሳይ ሀንተንቱ ናጋራ ማራናዳን፣ ጎዳ ማታፕ አያና ምናተላ ዋዲ ሀንተንቶ ያናዳንን ጸሳይ የሱስ ክርሰቶሳ ካስ ሀንተንቶ ኦደቶዋዳን የዳናዳን፣ ሀንተንቱ ናጋራ ፓጺደ ጸሳኮ ስምተ።

21 ጸሳይ ጌሻ ግዴዳ ባረ ናባቱዋ ደናን በንፕ ደሚደ ሃሳዬዳዋዳን፣ ኡባባይ ኦራጽያ ዋዲ ጋካናው፣ የሱስ ሳሉዋን ጋምአናው በሴ።

22 ሙሴ፣ ሳዳይ ጸሳይ፣ ሀንተንቱ ዛርያ ግደፕ ሀንተንቶ ታናዳን ናብያ ደንላና፤ ሀንተንቱ እ ግያዋ ኡባ ሰስተ።

23 ሄ ናቢ ኦድያዋ ሰሰና አሳይ ኦንነ አሳ ግደፕ ሻከት ቋዮ፣ ያጌዳ።

24 “ቃይ ሳሜላፕ ደሚደ፣ አፕ ካላ ደንዴዳ ናባቱ ኡባቱ፣ ሀ ዋድያባ ኦዴድኖ።

25 ሀንተንቱ ናባቱዋ ናና፤ ቃይ ጸሳይ አብራሃዋ፣ ሳካን ደእያ አሳ ኡባ ታን ነ ዘረላ ባጋና አንጃና፣ ያጌደ ኑ አዋቱዋና ጫቄዳ ጫቁዋ ላትያ ናና።

26 ጸሳይ ህንተንታ ኡባቱዋ ህንተንቱ ኢታ ኦሱዋፕ ዛሪደ እንጃና ማላ፡ ባረ ቆማ ተ ደንሲደ፡ ህንተንቶ ኮይሮ የዴዳ” ያጌዳ።

# 4

## ጸጽሮስነ የሃንሰ አይሁዳቱዋ ሻንጋቱዋ ሰንፋ ሸቄድኖ

1 ጸጽሮስነ የሃንሰ አሳዉ እድሸን፡ ቄሳቱዋ ካፓቱ፡ ጌሻ ጎልያ ዋታዳራቱዋ እዛዝያዌነ ሳዱቃዋናቱ፡

2 ኡንቱንቱ አሳ ታማርሰያ ድራዉነ ሀራ አሳቱ ሀይቁዋፕ ደንዳናዋ ማርካ ግዳና ማላ፡ የሱስ ሀይቁዋፕ ደንዴዳዋ ኦዴዳ ድራዉ፡ ዳሪ ይሎቲደ፡ ኡንቱንቱኮ ዬድኖ።

3 ኡንቱንታ ኦይቂደ፡ ሳአይ ኦማርሰድሳ ድራዉ ዋንታናዉ ቃሾ ጎላ ገልሴድኖ።

4 ሸን ቃላ ሰሴዳዋንቱፕ ጮራቱ እማኔድኖ፤ አቱማ አሳ ፓይዱ እቼሹ ሻእ ኬና ግዴዳ።

5-6 ዋንተፋ ጋላስ፡ ኡንቱንታ ዋድያዋንቱ፡ አይሁዳ አሳ ጭማቱ፡ ሙሴ ህግያ ታማርሰያዋንቱ፡ ቄሳቱዋ ኡባቱዋ ካፓቱ ሃን፡ ቃያፍ፡ የሃንሰ እስክንድርነ ቄሳቱዋ ኡባቱዋ ካፓቱዋ ዳባቱ ኡባይ የሩሳላመን ሸቄድኖ።

7 የሱስ ኪቴዳዋንታ ባረንቱ ግዱዋን ኤሲደ፡ “አያ ዋልቃን ዋይ ኦ ሱንፋን ሀዋ ህንተንቱ ኦሌድቱ?” ያጌደ ኦቼድኖ።

8 ሄ ዋደ ጸጽሮስ ባረናን ጌሻ አያናይ ኩምና፡ ኡንቱንታ ሀዋዳን ያጌዳ፤ “አሳ ካለልያዋንቶ፡ አይሁዳ አሳ ጭማቶ፡

9 ሆቼ ሀ ሀርጋንቻ ብታንያዉ ኦሰቲዳ ሎኦ ኦሱዋባነ እ ዋን ፓጼደንቶ፡ ህንተንቱ ኦና ኦቾፕ፡

10 ማስቃልያ ቦላ ምስማርያን ህንተንቱ ድሸደ ካቂና፡ ጸሳይ ሀይቁዋፕ ደንጮዳ ናዝሬትያ የሱስ ክርሰቶሳ ሱንፋን ሀ ብታኒ ፓጺደ፡ ህንተንቱ ሰንፋን ኤቄዳዌ ህንተንቱ ኡባዉነ እስራኤልያ አሳ ኡባዉ ኤረቶ።

11 ጎልያ ኬጽያዋንቱ ህንተንቱ ካዲደ እጹዳ ቱሳይ ጎልያ ኡባ ቶክያ ኮሽያ ቱሳ ግዴዳ።

12 አሳይ አቶተፋ የሱሳ ባጋና ደማናፕ አትን፡ ሀራ ኦ ባጋናነ ደመና፤ ኑን ኦ ሱንፋን ኦፋናዉ በሴ፤ አያዉ ጎፕ፡ ጸሳይ ሳሉዋፕ ጋርሳን አሳዉ እማዳ ሀራ ሱንፋይ ባዋ” ያጌዳ።

† 3:26 ቆማ፡- ጸሳ አዉዋን ደረቲዳ ናእ። 4:11 ማዘ. 118:22

13 ሺቁዋ አሳይ ጳጳርሰነ የሃንሰ ጸሌዳ ጸላ በኤዳ ዎደ፣ ኡንቱንቱ ታማርቤና ጮ አሳ ግዴዳዋ አኬኪደ ማላለቴድኖ፤ ኡንቱንቱ የሱሳና ደእያዋካ ኤሬድኖ።

14 ቃይ ፓጼዳ ብታኒ ጳጳርሳና የሃንሳና ኤቁዳዋ አሳይ በኢደ፣ ግያዋ ጳጼድኖ።

15 ሸን ጳጳርሰነ የሃንሰ ሺቁዋጥ ካረ ከሳና ማላ አሳይ አዛዚደ፣ ባረ ግድን ዘረቲደ፣

16 “ሀ አሳቱዋ አያ ኡዳኔ? አያዉ ጎጥ፣ ኡንቱንቱ ኩሽያን ኦስቴዳ ዎልቃማ ማላታቱ የሩሳላመን ደእያ ኡባዉ ቤቴዳ። ኑን ሄዋ ኤርኮ ጋናዉ ዳንዳዮኩ።

17 ሸን የዉ አሳዉ ላለተና ማላ፣ ሀዋጥ ሰንፋዉ ሀ አሳቱ የሱሳ ሱንፋ ኦስነ ኦደናዳን፣ ሞንሲደ ኡንቱንታ፣ ‘ሀንተና ኤርተ’ ጎይተ” ያጌድኖ።

18 ኡንቱንቱ ጼሲደ፣ የሱሳ ሱንፋ ሙለካ ደን፣ናዳንነ አባ ታማርሰናዳን አዛዜድኖ።

19 ሸን ጳጳርሰነ የሃንሰ ዛሪደ፣ “ጸሳዉ ኤኖ ግያዋ አጊደ፣ ሀንተንቶ ኤኖ ግያዌ ጸሳ ሰንፋን ሎኤንቶነ አነ ሀንተ ፕርድተ።

20 አያዉ ጎጥ፣ ኑን በኤዳባነ ሰሴዳባ ኦደናን አጋናዉ ዳንዳዮኩ” ያጊደ ሸቁዳ አሳዉ ኦዴድኖ።

21 ሸቁዳ አሳይ ኡንቱንታ ሙራናዉ ጋሶትያባይ ጳይና፣ ላኤንጱዋ ዳርሰ ፓሉመቲደ፣ ሀኔዳባዉ አሳይ ኡባይ ጸሳ ጋላትያ ድራዉ፣ ኡንቱንታ ብሊደ የዴድኖ።

22 ሄ ሀርግያጥ ፓላያ ማላታቱ አዉ ኦስቴዳ ብታኒ የለቶደጥ ላይላይ አዉ ኦይታሙዋጥ አጴዳ።

የሱሰ ኪቴዳዋንቱነ ሀራ አማንያ አሳቱ ጴማ ዎደ ዎሴዳ ዎሳ

23 ጳጳርሰነ የሃንሰ ብለቲደ፣ ባረንቱ ዳባቱዋኮ ቢደ፣ ቁሳቱዋ ካፓቱነ አይሁዳ ጭማቱ ባረንታ ጌዳባ ኡባ ኡንቱንቶ ኦዴድኖ።

24 ኡንቱንቱ ሄዋ ሰሴዳ ዎደ፣ እት ዎዛና ግዲደ፣ ጸሳ ሀዋዳን ያጊደ ዎሴድኖ፤ “ኡባ ሞድያ ጎዳዉ፣ ሳሉዋ፣ ሳእ፣ አባነ ኡንቱንቱ ግድን ደእያ ኡባባ መጴዳዎ።

25 ኔን ነዉ አሳያ ኑ አዉዋ ዳዊተ ዶናን ጌሻ አያናን ሃሳያደ፣ “ አይሁዳ ግድና አሳይ አያዉ ይሎቴዴ?

ቃይ አሳይ አያዉ ዳንበናባዉ ማቀቴዴ?

26 ሳኣ ካታቱ ገገቲድኖ፤ ጋድያ ሞድያዋንቱ ጎዳ ቦላንነ እ ኦኬዳ ክርሰቶሳ ቦላ እትጥ ደንዴድኖ”

4:24 ከሳ 20:21፤ ናህ. 9:6፤ ማዘ. 146:6

ያጋደ ሃሳያዳ።

27 “አያው ጎጥ፡ ሄሮድስ፤ ጸንጸናውያ ጽላጸስ አይሁዳ ግደና አሳና፤ እስራኤልያ አሳና፤ ኔን ኦኬዳ ክርስቶሳ ነ ጌሻ ናኣ የሱሳ ቦላ ደንዳናው። ሀ ካታማን ሺቄዳዌ ቱማ።

28 ቃይ ኔን ነ ዋልቃን፤ ነ ሸንያን ሀናና ጋደ ቆፓ ኡቴዳባ ኡባ አፋናው ሺቄድኖ።

29 ሀእካ ጎዳው፡ ኡንቱንቱ ናሰያ ጾላ፤ ኦን ኔና ካልያዋንቱ፤ ነ ቃላ ኩሙንላ ቆንጨተላን ኡዳናዳን፤ ኦና ዳንዳይሳ።

30 ፓላናው ነ ዋልቃ ቦሳ፤ ቃይ ነ ጌሻ ናኣ የሱሳ ሱንላን ኦራላባን ማላታ ኦስሳ” ገደ ዋሴድኖ።

31 ኡንቱንቱ ጸሳ ዋሴዳዋፕ ጉይያን፤ ሄ ኡንቱንቱ ሺቄዳሳይ ቃጾዳ። ኡንቱንቱ ኡባን ጌሻ አያናይ ኩምና፤ ጸሳ ቃላ ቆንጨተላን ኡዳድኖ።

**ኮይሮ አማኔዳ አሳቱዋ እትጥተላ ደኡዋ**

32 አማንያዋንቱ ኡባቱ ቆፋን፤ ዋዛናን እቱዋ ግዴድኖ። ኡንቱንቱ ሙሂ ኡባይ እትጥ ደእያዋፕ እትን፤ ባረው ደኤዳባ ኦን፤ ባረንቱባ ግቤና።

33 የሱስ ኪቴዳዋንቱ ጎዳ የሱስ ሀይቁዋፕ ደንዳዳዋ ዋልቃማ ዋልቃን ማርካቲኖ፤ ቃይ ጸሳይ ኡንቱንቶ ኡባው አጼ ኬካተላ ዳርሲደ እሜዳ።

34 አማንያዋንቱ ግደን ሙቶታንቻይ እቱነ ባዋ፤ አያው ጎጥ፡ ቢታይ ዋይ ጎሊ ደእያዋንቱ ኡባቱ ዛልኢደ፤ አኬዳ ሚሻ አሂደ።

35 የሱስ ኪቴዳዋንቶ እሚኖ፤ ሄ ሚሻይ አሳው ኮሸያዋዳን ሻከት፤ ሁጲያን ሁጲያን እመቱ።

36 ቆጲሮሳ ጌተትያ ሳን የለቱዳ ዮሴፎ ግያ ሌዊያ ዛሪ እቱ ደኤ፤ አ ሱንላ የሱስ ኪቴዳዋንቱ ባርናባሳ ጌድኖ። ሄዋ ብለላይ “ሙን፳ላያ ናኣ” ግያዋ።

37 ባርናባሳ ባረው ደእያ ጋድያ ዛልኤዳ ሚሻ አሂደ፤ የሱስ ኪቴዳዋንቶ እሜዳ።

**5**

**ሀናንያን አ ማቻት ሳጲሮ**

1 እት ሀናንያ ጌተትያ ብታኒ ባረ ማቻት ሳጲሮና ጋድያ ዛልኤዳ።

2 ሄ ዛልኤዳ ሚሻጥ ባረ ማቻታ ኤርሽን አሺደ፡ አቶዋ የሱሰ ኪቴዳዋንቱ እሜዳ።

3 ሽን ጳጳርሰ ሀናንያ፡ “ኔን ጌሻ አያና ጭማደ ነ ጋድያ ዛልኤዳ ሚሻጥ ሻካ አሻና ማለ፡ ጸላሂ ነ ዎዛናን አያዉ ገሌዴ?

4 ኔን ዛልአናጥ ካሰ ጋዲ ነዋ ግደኔ? ቃይ ኔን ዛልአ ሰምናካ ሚሻይ ኔሳ ግደኔ? ያትና፡ ሀዋ ማላባ ኦላናዉ አያዉ ነ ዎዛናን ቆጋዲ? ኔን ጸሳዉ ዎርዶቶዋጥ አትን፡ አሳዉ ዎርዶታበይካ” ያጌዳ።

5 ሀናኒ ሄ ቃላ ሰሴዳ ኤለካ ኩንዲደ ሀይቂ አጌዳ፤ ሄዎ ሰሴዳ ኡባይ ዳር ያዬዳ።

6 ዎዳላ አሳቱ ሶይ ገሊደ፡ አ አሃ ጸጺደ፡ ካረዉ ከሰ አ ሞጌድኖ።

7 ሄዙ ሳተ ግዶዋጥ ጉይያን፡ ሀናንያ ማቻታ ሄዎ ኤረናን ደአደ ገላዲ።

8 ጳጳርሰ እዘ፡ “ህንተንቱ ጋድያ ሀን ኬና ሚሻን ዛልኤድቱ? አነ ታዉ ኦዳ” ያጌዳ።

እዛ፡ “ኤ ሀን ኬና ሚሻን ዛልኤደ” ያጋዲ።

9 ጳጳርሰ ሞሽራቶ፡ “ኔንነ ነ አሰናይ ጎዳ አያና ጋጫናዉ አያዉ ዘረቴድቱ? በእ፤ ነ አሰና ሞጌዳ አሳቱ ካረን ደኢኖ፤ ነ አሃካ ኡንቱንቱ ካረ ከሳና” ያጌዳ።

10 ሞሽራታ ሄ ማንአያን ጳጳርሳ ገድያ ማታን ኩንዲደ ሀይቃ አጋዲ፤ ዎዳላ አሳቱ ገልያ ዎደ ሀይቁዳዉኖ ደሚደ፡ ካረ ከሴዳዋጥ ጉየ፡ እዝ አሰና ዲፋዋ ማታን ሞጌድኖ።

11 አማንያ አሳ ኡባይነ ሄዎ ሰሴዳ ሀራ አሳይ ኡባይ ዳሪ ያዬዳ።

የሱሰ ኪቴዳዋንቱ ኩሽያን ኦሰቴዳ ኦራላባቱዋነ ማላልሰያዋንታ

12 የሱሰ ኪቴዳዋንቱ ዳሮ ማላታነ ኦራላባ አሳ ግደን ኦሊኖ፤ አማንያ ኡባቱ ሶሎሞነ ባራንዳን እትጥ ሺቂኖ።

13 ሀራ አሳጥ ኡንቱንቱና ጋከታናዉ ሀራይ አቶ እቱነ ጸልቤና፤ ሽን አሳይ ኡንቱንታ ቦንቹ።

14 አማንያ አቱማ አሳይነ ማጫ አሳይ ካሰዋጥ ጮራይ ጎዳዉ ጉጀቱ።

15 ሄዎ ድራዉ፡ አሳይ ሀርጋንቻቱዋ ሻንቻማንነ ሳሌናን ቀር ቶኪደ፡ ጳጳርሰ ሄዋና አድያ ዎደ ሀራይ አቶ፡ አዉ ኩዌንቶነ ኡንቱንቱጥ እቱዋ እቱዋ ቦላና አቆና ማላ፡ ካታማ ኦግያ ዶና ከሲደ ዎሴ።

16 ቃይ ጮራ አሳይ የሩሳላመ ማታን ደእያ ካታማቱዋፕ ሀርጋንቻቱዋን ኢታ እያናን ኦይቀቱዳ አሳቱዋ አክ ዬድኖ፤ ኡባቱካ ፓዴድኖ።

የሱሰ ኪቴዳዋንቱ ቦላ የደሳይ ደንዴዳ

17 ሄዋፕ ሰሞና ቄሳቱዋ ካፑን እናና ደእያ ሳዱቃዋናቱ ኡባቱ የሱሰ ኪቴዳዋንታ ዳር ቃናቲደ፣ ኡንቱንቱ ቦላ ደንዴድኖ።

18 ቃይ የሱሰ ኪቴዳዋንታ ኦይቀደ፣ ኡባ አሳ ቃችያ ጎልያን የጌድኖ።

19 ሸን ጎዳ ኪታንቻይ ቃማ ቃሾ ጎለ ፐንግያ ዶዴደ፣ የሱሰ ኪቴዳዋንታ ካረ ከሲደ።

20 “ህንተንቱ ቢደ፣ ጌሻ ጎልያን ኤቀደ፣ ሀ ኦራላ ደኡዋ ቃላ ኡባ አሳዉ ኦድተ” ያጌዳ።

21 የሱሰ ኪቴዳዋንቱ ሄዋ ሰሴዳ ዋደ፣ ዋንቱማላን ጌሻ ጎልያ ገሊደ፣ ታማርሳናዉ ደማድኖ።

ቃይ ቄሳቱዋ ካፑን እናና ደእያዋንቱ ዪደ፣ ሺቄዳ አሳና እስራኤልያ ጭማቱዋ ኡባቱዋ እትፕ ዴሲደ፣ የሱሰ ኪቴዳዋንታ ባረንቱ ሰንላ አሀና ማላ፣ ዋታዳራቱዋ ቃሾ ጎለ ኪቴድኖ።

22-23 ሸን ዋታዳራቱ ቃሾ ጎለ ቢደ፣ የሱሰ ኪቴዳዋንታ ደሞበይክኖ፤ ጉየ ሰሚደ ሺቄዳ አሳዉ፣ “ኑን ብያ ዋደ ቃሾ ጎለ ካርያ ዳር ሞንሰ ቃችና፣ ናግያዋንቱካ ፐንግያን ኤቄዳዋንታ ደማደ፤ ሸን ኑን ቃሾ ጎልያ ዶይያ ዋደ፣ ጎለ ጋርሳን ሀራይ አቶ እት አሳይነ ባዋ” ያጌድኖ።

24 ጌሻ ጎልያ ዋታዳራቱዋ ኪትያዌነ ቄሳቱዋ ካፓቱ ሄዋ ሰሴዳ ዋደ፣ “ሀዌ ዋኑዋሻ? ቃይ ግድን አዬ ሀናንዴሻ?” ያጌደ ሀርጌድኖ።

25 ሄዋፕ ጉይያን፣ እት ብታኒ ኡንቱንቱኮ ዪደ፣ “በእተ፤ ቃሾ ጎልያን ህንተ ቃቼዳ አሳቱ ጌሻ ጎልያን ኤቀደ፣ አሳ ታማርሲኖ” ያጌደ ኡንቱንቱ ኦዴዳ።

26 ጌሻ ጎልያ ዋታዳራቱዋ አዛዝያዌ ዋታዳራቱዋና ቢደ፣ የሱሰ ኪቴዳዋንታ አሄዳ፤ ሸን ኡንቱንቱ ባረንታ አሳይ ሹቻን ጫዳናዋንታ ጊደ ያዬዳ ድራዉ፣ ኡንቱንታ ሎዳን አሄድኖ።

27 ኡንቱንቱ የሱሰ ኪቴዳዋንታ አሄደ፣ ሄዋ ሺቄዳ ሻንጉዋ ሰንላን ኤሰና፣ ቄሳቱዋ ካፑ ኡንቱንታ።

28 “ህንተንታ ኑን ሄ ብታንያ ሱንላን ታማርሰና ማላ ሞንሲደ አዛዝበይኮ? በእተ፤ ህንተ ትምርትያ የሩሳላመ ካታማ ኡባ

ጋሌድታ፤ ቃይ ሄ ብታንያ ሸምቸዋን ኑና ኦይላናዉ ቆፒታ!” ያጊደ ኦቹዳ።

29 ጳጳርሰነ የሱሰ ኪቴዳ ሀራንቱ ዛሪደ ያጌድኖ፤ “ኑን አሳዉ አዛዘታናፕ ጳሳዉ አዛዘታናዉ በሴ።

30 ማሰቃልያ ቦላ ምሰማርያን ቋሽ ካቂደ፣ ህንተ ዎጴዳ የሱሳ ኑ አዎቹዎ ጳሳይ ሀይቁዋፕ ደንሌዳ፤

31 እስራኤላቶ ናጋራፕ ሰማነ ናጋራ አቶ ጉሳ የሱሰ እማና ማላ፣ ጳሳይ ሞድያዋነ አሸያዎ አ ኦሌደ፣ ባረፕ ኡሸቻ ባጋን ቋቁ ቋቁ ኦሌዳ።

32 ሄዎ ኑን ማርካ፤ ቃይ ጳሳይ ባረዉ አዛዘትያዋንቶ እማዳ ጌሻ እያናይካ ማርካ” ያጌድኖ።

33 ሺቄዳ አሳይ ሄዎ ሰሴዳ ዎደ፣ ዳር ይሎቲደ፣ የሱሰ ኪቴዳዋንታ ዎጳናዉ ቆፔድኖ።

34 ሸን አሳ ኡባን ዳር ቦንቹቲዳ ጋማልያላ ጌተትያ፣ ሀግያ ታማርሰያ እት ፓርሳዋ፣ ሸቄዋን ደንድ ኤቂደ፣ የሱሰ ኪቴዳዋንቱ ጉሳ ዎድያ ካረ ከሳና ማላ

35 አዛዘደ ሄዋን ሸቄዳ አሳ ሀዋዳን ያጌዳ፤ “እስራኤልያ አሳቶ፣ ህንተ ሀ አሳቱዋ ኦላና ቆፕያዋን ህንተንታ ናግተ።

36 አያዉ ጎፕ፣ ሀዋፕ ካስ ዎድያን ተዎዳሳ ጌተትያዌ ባረና ዎልቃማ ጊደ ደንዴዳ፤ ደንድና ኦይዱ ጸቱ ግድያ አሳቱ አናና ጋከቴድኖ፤ ሸን አ ዎቋና፣ አ ካሌዳ ኡባቲካ ላለቲደ፣ ማደና አሳ ግዲደ አቴድኖ።

37 ሄዋፕ ጉይያን፣ አሳይ ፓይደትያ ዎደ፣ ጋሊላ ይሁዳይ ደንዲደ፣ ዳር አሳ ፓኑዋ ኦሌደ ካለሌዳ፤ ሸን አካ ዎቋና፣ አ ካሌዳ አሳይ ኡባይ ላለቲዳ።

38 “ሀእካ ታን ህንተንቶ ኦዳይ፤ ሀ አሳቱዋፕ ሻከትተ፤ ኡንቱንታ ቦቾፕተ። አያዉ ጎፕ፣ ሀ ቆፋይነ ሀ ኦሱ አሳይ ኦሌዳዎ ግደፕ ጳያና።

39 ሸን ሀ ቆፋይነ ሀ ኦሱ ጳሳፕ ዬዳዎ ግደፕ፣ ህንተ ኡንቱንታ ጳይሳናዉ ዳንዳይክታ፤ ኦን ኤር ሀዋ ሀኒደ ጳሳና ህንተ ኢተተናዳን” ያጌዳ።

40 ሄዋፕ ጉየ ሸቄዳ አሳይ ጋማልያላ ዘርያ እኪደ፣ የሱሰ ኪቴዳዋንታ ጸሴደ፣ ልሱዋን ሾጭሴድኖ፤ ሄዋፕ ጉይያን ኡንቱንታ፣ “የሱሳ ሱንላ ላኤንሉዋ ኡባካ ደንሎፕተ” ግ ብለደ የዴድኖ።

41 የሱሳ ሱንላ ድራዉ፣ ኡንቱንቱ ኡጋቲደ ዬላታናዉ በሰያባ ቆፔዳ ድራዉ፣ ሻንጉዋ ሰንላፕ ናሸቲደ ከሴድኖ።

42 ኡንቱንቱ ኡባ ጋላሰ ጌሻ ጎልያንነ አሳ ሶይን የሱሰ፣ ክርስቶሳ ግዴዳዋ ታማርሰያዋን ኦድያዋ ያ ጉጂድኖ።

# 6

**ዋሳ ጎልያ ማድያ ላፑ አሳቱ ደረቲድኖ**

1 ሄ ዋደ፣ ካልያዋንቱ ፓይዱ ዳር ዳር ቢሸን፣ ግሪክ ቃላ ሃሳይያ አይሁዳቱን ይሁዳን ደእያ አይሁዳቱ ዋላቀቲድኖ፤ አያዉ ጎፕ፣ ግሪክ ቃላ ሃሳይያ አይሁዳቱ፣ “ኡባ ጋላሰ ግሸትያ ቁማን ኑ አሰናይ ሀይቆ ማጫዋንቱ ናቀቲኖ” ያጌድኖ።

2 የሱሰ ኪቴዳ ታማን ላአቱ ዋሳ ጎላ አሳ ኡባ ጸሲደ፣ ሀዋዳን ያጌድኖ፤ “ኑን ጸሳ ቃላ ኦድያዋ አጊደ፣ ቁማ ግሻናዉ ኑዉ በሰና።

3 እሻቶ፣ ሎእ ጌተትያዋንታ ጌሻ አያናይነ አቶ ኤራተላይ ኩሜዳ ላፑ አሳቱዋ ህንተ ግደፕ ደርተ፤ ኑን ቃይ ኡንቱንታ ሀ ኦሶ ሱንላና።

4 ሸን ኑን ጸሳ ዋሳንነ ቃላ ኦዱዋን ሞናና” ያጌድኖ።

5 የሱሰ ኪቴዳዋንቱ ሃሳዬዳ ሃሳያይ አሳ ኡባ ናሸቼዳ፤ ሄዋፕ ጉየ፣ አማኑነ ጌሻ አያናይ ኩሜዳ እስጽፋኖሳ፣ ፕልጸሳ፣ ጽርኮርሳ፣ ንቃርና፣ ጽሞና፣ ጳርሜናን አይሁዳቱዋ አማኑዋን ገሌዳ አንጾክያ ኒቆላዋሳ ደሬድኖ።

6 ያቲደ የሱሰ ኪቴዳዋንቱ ሰንላን ኡንቱንታ ኤሰና፣ የሱሰ ኪቴዳዋንቱ ጸሳ ዋሴዳዋፕ ጉይያን፣ ባረንቱ ኩሸያ ኡንቱንቱ ቦላ ዋሴድኖ።

7 ጸሳ ቃላይ እክ እክ ቤዳ፤ ካልያዋንቱ ፓይዱዋን የሩሳላመን ዳርሰ ዳር ዳር ቤዳ፤ ቃይ ጮራ ቁሳቱካ አማኔድኖ።

**ዋሳ ጎልያ ካለላያ እስጽፋኖሰ አይቀቲዳ**

8 አቶ ኬካተላይነ ዋልቃይ ኩሜዳ እስጽፋኖሰ፣ አሳ ግደን ኦራላባነ ዋልቃማ ማላታ ኦሴ።

9 አይለተላፕ ከሴዳ አሳ ግያ አይሁዳ አማንያዋንቱ፣ ቀሪናፕ፣ እስክንድርያ አሳቱዋ፣ ክልቂያፕነ ኢሰያፕ ዬዳ እት እት አሳቱ ደንዲደ፣ እስጽፋኖሳና ፓሉመቲድኖ።

10 ሸን እስጽፋኖሰ አቶ ኤራተላንነ አያናን ሃሳይያዋ ድጋናዉ ዳንዳይበይክኖ።

11 ሄ ዋደ ኡንቱንቱ፣ “ሙሴ ቦላነ ጸሳ ቦላ እ ቦርያ ቃላ ሃሳይሸን ሰሴደ” ግያ ዋርደ አሳቱዋ ሻሜድኖ።

12 አሳ ኡባ፣ ጭማቱዋን ሙሴ ህግያ ታማርሰያዋንታ ሀንቀሴድኖ፤ እስጽፋኖሳኮ ዪደ አ ኦይቂደ፣ ሸቁዳ አሳኮ አህና።



13 አ ቦላ ጸሴዳ ዋርዶ ማርካቱ፥ “ሀ ብታኒ ሀ ጌሻ ጎልያነ ሙሴ ህግያ ቦርያዋ አዉደነ አገና።

14 አያዉ ጎጥ እ፥ ሳዌ ናዝሬትያ የሱስ ሀ ጌሻ ጎልያ ኮላና፤ ሙሴ ኑዉ እሜዳ ህግያካ ላማና፣ ያግሸን፥ ኑን ሰሴዶ” ያጌድኖ።

15 ሺቁዋን ኡቴዳ አሳይ ኡባይ እስጽፋኖሳ አኬኪደ ጸልያ ዋደ፥ አ ሶምእ ኪታንቻ ሶምእያ ማላቱ።

# 7

## እስጽፋኖሳ ሃሳያ

1 ቁሳቱዋ ኡባቱዋ ካፑ እስጽፋኖሳ፥ “ሀዌ ቱሜ?” ያጊደ ኦቹዳ።

2 እስጽፋኖሰ፥ “ታናዳን አማንያዋንቶ፥ ታ አዋቶ፥ ሰሰተ! ኑ አዉዋ አብራሃዋ ብር ካራነ ባናፕ ካሰ ማሰጸጸምያን ደእሸን፥ ቦንቾ ጸሳይ አዉ ቤቲደ፥

3 ኅ ቢታፕነ ነ ዳባቱዋፕ ሻከታደ፥ ታን ኔና በሰያ ጋድያ ባ፣ ያጌዳ።

4 ሄ ዋደ አብራሃዋ ካላዳዋቱ ጋድያፕ ከሲደ፥ ካራነን ደአናዉ ቤዳ። አ አቡ ሀይቄዳዋፕ ጉይያን፥ ጸሳይ አ ሀ ጋደ ህንተ ሀእ ደኢያሳ አሄዳ።

5 እ ሀ ጋድያፕ ሀራይ አቶ፥ ገድያን የድያ ሳአካ አብራሃዋ እምቤና፤ ሸን አዉ ናአይ ቆዮፕካ፥ ጸሳይ አ፥ ታን ነዉነ ኔፕ ጉይያን፥ ነ ዘረላዉ ሀ ጋድያ ላታ ኦላደ እማና፣ ያጌዳ።

6 ጸሳይ አብራሃዋ፥ ኅ ዛራቱ ሀራ ጋድያን ደአና፤ ያን ኦይዱ ጾቱ ላይላዉ ኡንቱንቱ አይለታናነ ናቀታና።

7 ሸን ታን ነ ዘረላ ሞድያ አሳ ቦላ ፕርዳና፤ ሄዋፕ ጉይያን፥ ኡንቱንቱ ሄ ጋድያፕ ከሲደ፥ ሀዋን ታዉ ጎይናና፣ ያጌዳ።

8 ጸሳይ አብራሃዎዎ ዘረላይ ቃጸረታና ማላ እናና ጫቂና፥ ይሳቃ እ የሊደ፥ ሆሰቸንላ ጋላሰ ቃጸሬዳ፤ ይሳቅ ያቆባ ቃጸርና፥ ቃይ ያቆብ ታማነ ላኡ አዋቱዋ ካፓቱዋ ቃጸሬዳ።

9 “አዋቱዋ ካፓቱ የሴፎ ቃናቲደ፥ ግብጾ ጋድያዉ አይለታናዳን፥ አ ዛልኤድኖ፤ ሸን ጸሳይ እናና እትፕ ደኤ።

7:2 ደመላ 12:1    7:4 ደመላ 11:31፤ 12:4    7:5 ደመላ 12:7፤ 13:15፤ 15:18፤ 17:8    7:6 ደመላ 15:13-14    7:7 ከሳ 3:12    7:8 ደመላ 17:10-14፤ 21:2-4፤ 25:26፤ 29:31—35:18    7:9 ደመላ 37:11፣ 28፤ 39:2፣

10 ጸሳይ ዋይያ ኡባጥካ አ ከሴዳ፤ ቃይ ግብጾ ካትያ ሰንፋንካ ናሹዋን አቶ ኤራተላ አዉ እሜዳ፤ ግብጾ ካቲ ዮሴፎዉ ግብጾ ጋድያን ባረ ጎልያ ኡባ ዋዳናዳን፣ ሱንፋተላ እሜዳ።

11 “ግብጾ ጋድያንን ካናን ጋድያን ኡባን ኮሻይ ገሊደ፣ ጮራ አሳ መቶሴዳ፤ ሄ ጋሱዋን ኑ አዎቱ ቁማ ደምበይክና።

12 ያቆብ ግብጾ ጋድያን ካላይ ደእያዋ ሰሲደ፣ ኑ አዎቱዋ ኮይሮ ያ የዴዳ።

13 ላኤንሱዋ ቡሳን ዮሴፎ ባረ እሻቶ ኤሪቴዳ፤ ቃይ ግብጾ ካቲካ ዮሴፎ ዛርያ ኤሬዳ።

14 ዮሴፎ ባረ አዉዋ ያቆብን ባረ ዳቡ ኡባይ ሙለካ ላፑን ታማን እቼሹ አሳይ ባረኮ ያና ማላ፣ ኪቴደ ጾግሴዳ።

15 ያቆብ ግብጾ ጋድያ ዋዲደ ሀይቄዳ፤ ኑ አዎቱካ ያን ሀይቄድኖ።

16 ኡንቱንቱ አሃይ ሄዋጥ ሰኬማ ጌተትያ ጋድያ ቶከቲደ፣ ያን አብራሃዋ ሀዋራ ናናጥ ዳሮ ብራን ሻሜዳ ዱፋዋን ሞገቱዳ።

17-18 “ሽን ጸሳይ አብራሃዋ እማና ጌዳዌ ፖለትያ ዋዲ ጋካና ማትና፣ ዮሴፎ ኤረና ሀራ ካቲ ግብጾ ጋድያን ደንዳና ጋካናዉ፣ አሳይ ዳር ዳር ቤዳ።

19 ሄ ካቲ ኑ ዛርያ ጭሚደ፣ ጉላ ናናይ ሀይቃና ማላ፣ ካረ ኡንቱንታ ከሰ ኦላናዳን፣ ኑ አዎቱዋ ኡንኤሴዳ።

20 “ሙሴ የለቴዳዌ ሄ ዋደ፤ ጸሳ ሰንፋን አ ዳሮ ሎኦ ናኦ ግዴዳ፤ ባረ አዉዋ ጎልያን ሄዙ አገና ጋካናዉ ድጨዳ።

21 ሙሴ ዋራ ኦለቴዳ ዋደ፣ ግብጾ ካትያ ናታ ደማደ ባረ ናኦዳን አ ድቻዲ።

22 ሙሴ ግብጻቱዋ አቶ ኤራተላ ኡባ ታማሪደ፣ ቃላንን ኦሱዋን ዋልቃማ አሳ ግዴዳ።

23 “ሽን ሙሴዉ የለቶደጥ ላይላይ ኦይታሙዋ ኩሜዳ ዋደ፣ ባረ እሻቱዋ፣ እሰራኤልያ አሳቱዋ በአናዉ ባረ ዋዛናን ቆፔዳ።

24 እሰራኤልያ ማዴዳ፤ ሄ ናቄዳ ግብጾ ብታንያ ዋዲደ፣ አ ሀሉዋ ከሴዳ።

---

7:10 ደመላ 41:39-41    7:11 ደመላ 42:1-2    7:13 ደመላ 45:1፣ 16  
7:14 ደመላ 45:9-10፣ 17-18፤ 46:27    7:15 ደመላ 46:1-7፤ 49:33  
7:16 ደመላ 23:3-16፤ 33:19፤ 50:7-13፤ ኢያሳ 24:32    7:17-18 ከሳ  
1:7-8    7:19 ከሳ 1:10-11፣ 22    7:20 ከሳ 2:2    7:21 ከሳ 2:3-10  
7:23 ከሳ 2:11-15

25 ሙሴ ባረ እሻቱዋ ባረ ባጋና ጸሳይ አሻና ሀንያዋ ኢንቱንቱ አኬኬድኖ ጊደ ቆፔዳ፤ ሽን ኢንቱንቱ አኬክበይክኖ።

26 “ዋንተላ ጋላሰ ላኡ እሰራኤልያ አሳቱ እቱ እቱዋና ዋትያዋንታ ደሚደ፣ ኢንቱንታ ሰገላናዉ ኮዪደ፣ ‘አሳቶ፣ እሻቱ ህንተንቱ አያዉ እቱ እቱዋ ናቂቱ?’ ያጌዳ።

27 “ሸን ሄ ባረ ሾሩዋ ናቂያዌ ሙሳ፣ ‘ኔና ኑ ቦላ ሞድያዋን ዳና ኦሊደ፣ ሱንጤዳዌ ኦኔ?’

28 ኔን ዝኖ ግብጾ ብታንያ ዎጄዳዎዳን፣ ታናካ ዎጳናዉ ኮያይ?’ ያጌደ፣ ሙሳ ካረዉ ሱግ የጌዳ።

29 ሙሴ ሄዎ ሰሴዳ ዎደ ግብጾፕ ከሲደ፣ ሞድያማ ጋድያን በተ ግድ ደኢደ፣ ላኡ አቱማ ናና ያን የሌዳ።

30 “ጎዳ ኪታንቻይ ኦይታሙ ላይላፕ ጉይያን፣ ሲና ደርያ ማታን ደኢያ ባዙዋ ቡራን ኤጽያ ታማ ላጩዋ ግደን ሙሴዉ ቤቴዳ።

31-32 ሙሴ ባረ በኤዳዎ ማላለቲደ፣ አኬክ ጸላናዉ ቡራ ማታን እ ሸቅ ደእሸን፣ ጎዳ ቃላይ፣ ‘ታን ነ አዎቱዋ ጸሳ፣ አብራሃመ ጸሳ፣ ይሳቃ ጸሳ፣ ያቆባ ጸሳ’ ያጌደ ሙሴኮ ዬዳ። ሙሴ ያሻ ኮኮሪደ፣ ጸላናዉ ጸልቤና።

33 “ጎዳይ ሙሳ፣ ‘ኔን ኤቄዳ ቢታይ ጌሻ ግድያ ድራዉ፣ ነ ገድያን ደኢያ ጫማካ ከሳ።

34 ታን ግብጾን ደኢያ ታ አሳ ዋይያ ጌሻ በኣደ፣ ቃይ ኢንቱንቱ ኦልያካ ሰሳደ፣ ኢንቱንታ አሻናዉ ዎጳኣድ። ሀእ ሃያ። ታን ኔና ግብጾ ኪታና’ ያጌዳ።

35 “ሄ ሙሳ እሰራኤላቱ፤ ‘ኔና ኑና ሞድያዋን ዳና ኦሊደ ሱንጤዳዌ ኦኔ?’ ያጌደ እጼድኖ፤ ቡራ ግደን አዉ ቤቴዳ ኪታንቻን ሞድያዋን አሸያዎ ግዳና ማላ፣ ጸሳይ አ ኪቴዳ።

36 ሄ ሙሴ እሰራኤላቱዋ ግብጾ ጋድያን ዞኦ አባንነ መላ ቢታን፣ ኦይታሙ ላይላዉ ኦራላባነ ማላታ ኦሊደ፣ ግብጾፕ ካለጤዳ።

37 “እሰራኤልያ አሳዉ፣ ‘ጸሳይ ታና ደንጤዳዎዳን፣ ህንተ ዛርያ ግደፕ ታ ማላ ናብያ ህንተንቶ ደንላናዎ’ ያጌዳዌ ሄ ሙሳ።

38 እ እሰራኤልያ አሳ ማባራና እትፕ መላ ቢታን ደኤዳዎ፤ እ ኑ አዎቱዋናን ሲና ደርያ ቦላን ባረዉ ሃሳዬዳ ኪታንቻና እትፕ ደኤዳ። ያቲደ ጸሳፕ ደኤዋ ቃላ ኑዉ እማናዉ አኬዳ።

7:29 ከሳ 18:3-4    7:30 ከሳ 3:1-10    7:35 ከሳ 2:14    7:36 ከሳ 7:5፤ 14:21፤ ፓይ. 14:33    7:37 ዛረ. 18:15፣ 18    7:38 ከሳ 19:1—20:17፤ ዛረ. 5:1-33

39 “ሙሴው ኑ አዎቱ አዛዘታናው ደሰበይክኖ፤ ሸን ገደ አ ሱግ ኦሊደ፣ ገዮ ግብጾ ሰማናው አሞቲድኖ።

40 ቃይ አርና፣ ፉና ካለልያ ጸሳቱዋ ኑው መቆ፤ እያው ጎጥ፣ ሀ ኑና ግብጾጥ አሄዳ ሙሴ ዋኔደንቶ ኑን ኤርኩ’ ያጌድኖ።

41 ሚዛ ማራ ማላትሲደ፣ ሄ ዎደ ኤቃ ኦሌድኖ፤ ሄ ኤቃው ያርሹዋ ያርሺደ፣ ባረንቱ ኩሺ አሌዳ ኦሱዋን ናሸቲድኖ።

42 ሸን ጸሳይ ኡንቱንቶ ዘክያ ዛሬዳ፤ ኡንቱንቱ ሳሉዋ ጸልንትያው ጎይናናዳን፣ ኡንቱንታ አጌዳ፤ ናባቱዋ ማጻፋን።

“ ፋስራኤልያ አሳቶ፣ አይታሙ ላይላ፣  
አሳይ ባይና ሳን ሹኬዳ መሀያን ያርሹዋ፣  
ታው ያርሺድቲ?

43 ሀንተንቱ ሀንተንቶ ጎይናናው  
አሌዳ ኤቃቱዋ፣ ሞሎካ ዲንካንያን  
ረፋና ግያ ሀንተ ጸሳ ጸልንትያ ቶኬድታ።  
ታን ሀንተንታ ባብሎጎጥ  
ሀን ባጋ የዳና’

ጌተቲደ ጸፈቲዳ።

44 “ሙሴ ባረ በኤዳዋ ማላትሲደ፣ ጎዳይ አው ኦዴዳዋዳን መጴዳ ማርካ ዲንካኒ ኑ አዋቶ መላ ቢታን ደኤ።

45 ቃይ ኑ አዎቱ ዲንካንያ ባረንቱ አዎቱዋጥ ካላን አኪደ፣ ጸሳይ ካሰ የደርሴዳ አይሁዳ ግደና አሳ ቢታ አይቄዳ ዎደ፣ ኢያሱና ገልሴድኖ፤ ሄ ዲንካኒ ዳዊተ ደእያ ዎዲ ጋካናውካ ሄዋን ደኤዳ።

46 ዳዊተ ጸሳን ሳበቲዳ፤ ቃይ ያቆባ፣ ጎዳይ ደእና ጎልያ ኬጻናው ጸሳ ዎሴዳ።

47 ሸን አው ጎልያ ኬጾዳዌ ሶሎሞና።

48-50 “ሸን ናቢ፣

“ ጎዳይ፣ “ሳሉ ታ ካውተላ አይድያ፤  
ሳአይካ ታ ገዲ የድያ ሳ።

ያትና፣ ታው አያ ማላ ጎልያ ኬጻንቲ?  
ዎይ ታን ሸሞፓናሳይ ሀቃኔ?

ሀ ኡባባ ታ ኩሽያን መቆበይክታ?” ያጌ’  
ጌዳዋዳን፣ ኡባጥ ሶላ ጸሳይ አሳይ ኬጾዳ ጎልያን ደኤና።

7:40 ከሳ 32:1      7:41 ከሳ 32:2-6      7:43 አሞጻ 5:25-27      7:44 ከሳ 25:9፣ 40      7:45 ኢያሳ 3:14-17      7:46 2 ሳሜላ 7:1-16፤ 1 ኦዲዋ 17:1-14      7:47 1 ካታ. 6:1-38፤ 2 ኦዲዋ 3:1-17      7:48-50 አሳ. 66:1-2

51 “ህንተንቱ አይበ ሞርጊ ምኖ አሴ? ህንተንቱ ዎዛናይ ጸሳ ቃላ አካናዉ አይበ ዳሜዳዌ? ህንተንቱ ሀይላይካ ዋን ቱሌዴ? ኡባ ዎደ ጌሻ አያናዉ አዛዘተናን እጺታ።

52-53 ናባቱዋን ህንተንቱ እዎቱ የደርሰቤናዊ ኦኔ? ጸሳ ናአይ ጽሉ ያናዎ ካሰቲደ ኦዴዳዋንታካ ዎጴድና። ሀእ ህንተንቱካ ኪታንቻቱዋ ኩሽያፕ ጸሳ ሀግያ አኪደ አዛዘትቤናዋንቱ፣ ጽሉዋ አላ እሚደ ዎጴድታ” ያጌዳ።

**እስጵፋኖሳ ሹቻን ደቺደ ዎጴድና**

54 ኡንቱንቱ ሄዎ ሰሴዳ ዎደ፣ ባረንቱ ዎዛናን እስጵፋኖሳዉ ዳሮ ይሎቲደ፣ ባረንቱ መተርሻ ሳኢደ ናሴድና።

55 ሽን እስጵፋኖሰ ባረናን ጌሻ አያናይ ኩምና፣ ሳሉዋ ፑደ ጫድ ዴሊደ፣ ጸሳ ቦንቹዋን የሱሰ ጸሳፕ ኡሽቻ ባጋን ኤቄዳዎ በኤዳ።

56 ያቲደ፣ “ዴልተ፣ ታን ሳሉ ደየትና፣ አሳ ናአይ ጸሳፕ ኡሽቻ ባጋን ኤቄዳዎ በአይ” ያጌዳ።

57 ኮሻ ቶቄ አላ ዋሲደ፣ ባረንቱ ሀይላ ቱጪደ፣ እትፕ ግድ አኮ ዎጴድና።

58 ካታማፕ ጋጸ እ ከሲደ፣ ሹቻን ጫዴድና። ማርካቱካ ባረንቱ ማዩዋ ከሲደ፣ እት ሳኦላ ጌተትያ ዎዳላ ማታን ዎሌድና።

59 እስጵፋኖሰ፣ “ታ ጎዳ የሱሳ፣ ታ ሸምቱዋ አካ” ያጌደ ዴግሸን፣ ኡንቱንቱ ሹቻን አ ደቺና።

60 ሄ ዎደ እ ጉልባቲደ፣ ባረ ኮሻ ቶቄ አሊደ፣ “ታ ጎዳዉ፣ ሀ ናጋራ ኡንቱንቶ አት ጋ” ያጌዳ። ሄዎ ጊን ሀይቄ አጌዳ።

**8**

**ሳኦል አማንያ አሳ የደርሴዳ**

1 ሳኦል እስጵፋኖሰ ሀይቄ ሎእ ግ አኬዳ። ሄ ጋላሰ የሩሳላመን ደእያ አማንያዋንቱ ቦላ ዎልቃማ የደርሱ ደንዴዳ፤ የሱሰ ኪቴዳዋንቱፕ አትን፣ አማንያዋንቱ ኡባቱ ይሁዳ ጋድያንነ ሳማርያ ጋድያን ላለቲድና።

2 ጸሳ አሳቱ እስጵፋኖሳ ሞጌድና፤ ቃይ አዉ ዳሮ ዩኬድና።

3 ሽን ሳኦል አማንያ አሳ ቆይሳናዉ ባጸቲ፤ ኡባ ጎልያ ገል ገሊደ፣ አቱማ አሳነ ማጫ አሳ ጎቾ ጎቺደ፣ ቃሾ ጎላ የዴ።

ዎንጋላ ምሽራቹ ሳማርያን ኦደቲዳ

4 ላለቴዳ አማንያዋንቱ ቃላ ኦዲደ፡ ኡባሳ ቤድኖ።

5 ፕልጶስ ሳማርያ ካታማ ዋዲደ፡ ክርስቶሳባ አሳዉ ኦዲዳ።

6 ጮራ አሳይ ፕልጶስ ጌዳዋ ዳርስ አኬኪደ ሰሴዳ፤ እ ኦልያ ማላታካ በኤዳ።

7 አያዉ ጎፕ፡ ኢታ አያናቱ ኮሻ ጶቁ ኦል ሃሳዪደ፡ ጮራ አሳፕ ከሴድኖ፤ ቃይ ጮራ ሰሌዳዋንቱን ዋባቱ ፓጶድኖ።

8 ሄ ካታማን አሳይ ዳሮ ናሽቴዳ።

9 ሸን ሰሞና ጌተትያ እት ብታኒ ካስ፡ ባረና ዋልቃማ ግ ካዪድ፡ ሳማርያ አሳ፡ “ላ ሀዌ አይባ ኦራፋቤ” ጊሲደ ሄ ካታማን ደኤዳ።

10 ጉፋተፋፕ ደሚደ፡ ዋጋተፋ ጋካናዉ፡ አሳይ ኡባይ፡ “ጶሳ ዋልቃይ ዳሮ ዋልቃማይ ሀዋ” ጊደ አባ ሰሴ።

11 ዳሮ ዋድያፕ ደሚደ፡ ካዩዋን ሳማርያ አሳ “ላ ሀዌ አይባ ኦራፋቤ” ጊሴዳ ድራዉ፡ አሳይ አባ ሰሴ።

12 ሸን ፕልጶስ ጶሳ ካዉተፋባን የሱስ ክርስቶሳ ሱንፋባ አቱማዋንቶን ማጫዋንቶ ምሽራቹዋ ኦዲደ፡ ኡንቱንቱ አባ አማኒደ ጸማቀቴድኖ።

13 ቃይ ሰሞንካ ባረ ሁጳዉ አማኒደ ጸማቀቴዳዋፕ ጉይያን፡ ፕልጶሳና እትፕ ደኤደ፡ ኦስትያ ማላታን ጶሳይ ኦጼዳ ዋልቃማ ማላታ በኢደ ማላለቴዳ።

14 የሱስ ኪቴዳ የሩሳላሙን ደእያዋንቱ፡ ሳማርያ አሳይ ጶሳ ቃላ አኬዳዋ ሰሴዳ ዋደ፡ ጳጵሮሳን የሃንሳ ኡንቱንቱኮ የዴድኖ።

15 ጳጵሮሳን የሃንሳ ዋዲደ፡ አማንያዋንቱ ጌሻ አያና አካና ማላ፡ ኡንቱንቶ ጶሳ ዋሴድኖ፤

16 አያዉ ጎፕ፡ ሳማርያ አሳቱ ጎዳ የሱሳ ሱንፋን ጽንቃታ ጸላላ ጸማቀቴዳዋፕ አትን፡ ኡንቱንቱፕ እቱዋ ቦላንን ጌሻ አያናይ ዋድቤና።

17 ሄ ዋደ ጳጵሮሳን የሃንሳ ባረንቱ ኩሽያ ኡንቱንቱ ቦላ ዋልቃማ ጉይያን ኡንቱንቱ ጌሻ አያና አኬድኖ።

18 የሱስ ኪቴዳዋንቱ ባረንቱ ኩሽያ ኡንቱንቱ ቦላ ዋልቃማ፡ ኡንቱንቶ ጌሻ አያናይ እመቴዳዋ ሰሞን በኤዳ ዋደ፡ ጳጵሮሳሰን የሃንሳዉ ሚሻ አሂደ፡

19 “ታንካ ታ ኩሽያ ዋልያ ኡባይ ጌሻ አያና አካና ማላ፡ ሀ ማታ ታዉካ እሜርክቱ” ያጌዳ።

20 ሸን ጳጵሮስ አዉ ሀዋዳን ያጌዳ፤ “ኔን ጶሳ እሞታ ሚሻን ሻማናዉ ቆፔዳ ድራዉ፡ ነ ሚሻይ ኔናና ጮ ቆዩ።

21 ነ ዋዛናይ ጸሳ ሰንፋን ሱረ ግደና ድራው፥ ነዉ ሀዋን ግሹ ባዋ።

22 ያቶዋፕ ጉይያን ሀ ነ ዋዛና ኢታ ቆፋ ድራው፥ ናጋራፕ ሰማ፤ ኦን ኤር ነ ዋዛናን ደእያ ኢታ ቆፋ ጸሳይ ኦቶ ጋነንቶነ ጸሳ ዋሳ።

23 እያዉ ጎፕ፥ ኔን ዳር ቃናትያ ኦይቃደ ናጋራ ቃሹዋን ደእያዋ ታን በእይ” ያጌዳ።

24 ሄዋፕ ጉዩ ሰዋን ጸጽሮሳሰነ ዮሃንሳዉ ዛሪደ፥ “ሀንተንቱ ጌዳዋፕ እትባይነ ታና ጋከና ማላ፥ ሀንተ ታዉ ጸሳ ዋሰተ” ያጌዳ።

25 ጸጽሮሰነ ዮሃንሰ ማርካቴዳዋፕነ ጎዳ ቃላ ኦይዳዋፕ ጉይያን፥ ጉዩ ዮሩሳላሙ ሰሜድኖ፤ ያቲደ ሳማርያን ደእያ ዳር ቄር ካታማቱዋን ሞሽራቹዋ ቃላ ኦይድኖ።

ፕልጶስ ቶጵያ አሳ ግዴዳ ሹፋ ጸማቄዳ

26 ጎዳ ኪታንቻይ ፕልጶሳ፥ “ደንዳደ ዮሩሳላሙፕ ጋዛ አፍያ አሰ ባይና መላ ሳኦ ኦግያኮ ባ፤ ሄ ኦጊ አዋይ ከሰያሳ ጴልያ ዋደ ኡሸቻ ዲገሃ ባጋና ደኤ” ያጌዳ።

27 ፕልጶስ ደንዲደ ቤዳ። ሀንደኮ ጌተትያ ቶጵያ ካታትዉ ቢታ ዋድያ እ ሚሻ ኡባካ ናግያ ቶጵያ አሳ ግዴዳ እት ሹፋይ ደእያዋ ጎይናናዉ ዮሩሳላሙ ቤዳ።

28 ፓራይ ጎቹያ ጋርያን ኡቲደ፥ ዮሩሳላሙፕ ጉዩ ሰሚደ፥ ናብያ ኢሰያሳ ማጻፋ ናባቤ።

29 ጌሻ እያናይ ፕልጶሳ፥ “ሄ ጋርያኮ ሺቃደ እትፕ ግዳ” ያጌዳ።

30 ፕልጶስ ዋጽ ዪደ፥ ናብያ ኢሰያሳ ማጻፋ ሹፋይ ናባብሸን ሰሲደ እ፥ “ኔን ናባብያዋ አኬካይ?” ያጌዳ።

31 ሹፋይ፥ “ታዉ ኦዲደ አኬክሰያ አሳይ ባይናን ዋኒደ አኬከቲ?” ያጌዳ፤ ቃይ ባረናና ጋርያን ከሲደ ኡታና ማላ፥ ፕልጶሳ ዋሴዳ።

32 ሹፋይ ናባብያ ማጻፋይ፥ “ደርሳዳን እ ሹከታናዉ ላገቱ።

ደርሳ ማራይ ባረ እሰክያ  
ቃንጽያዋ ሰንፋን ጮኡ ግያዋዳን፥  
እካ ባረ ደና ፖክቤና።

33 እ ካዉሹዳዋዳን አዉ ጽሎ ፕርዳይ ጻዬዳ።  
ዮሱሳ ደኡ ሀ ሳኦፕ ፑደ አከት ድጌዳ ድራው፥  
አ ዛርያባ ኦኔ ኦዳናዌ?”

ያጌዳ።

34 ሹፋይ ዛሪደ ፕልጶሳው፡ “ናቢ ሀዋ ኦዋ ኦዲ? ባረባ ኦድዬ ዎይ ሀራ አሳባ ኦዲ? ታወ ኦዳርኪ” ያጌዳ።

35 ፕልጶስ ዛሪደ፡ ጸሳ ማጻፋ እ ናባብያሳፕ ደሚደ፡ የሱሳባ ሞሽራቹዋ ቃላ አዉ ኦዳዳ።

36 ኡንቱንቱ ኦግያ ኦይቂ ቢደ፡ ሃላይ ደኢያሳ ጋኬድኖ፤ ሹፋይ፡ “ሃላ ሀዋ በእ፤ ጸማቀትያዋ ታና ድግያዌ አዬ?” ያጌዳ።

37 ፕልጶስ አ፡ “ኔን ነ ኩሙንላ ዎዛናፕ አማኖፕ፡ ዳንዳያ” ያጌዳ።

እ ዛሪደ፡ “የሱስ ክርስቶስ ጸሳ ናእ ግድያዋ ታን አማናይ” ያጌዳ።

38 ጋር ኤቃና ማላ ሹፋይ አዛዝና፡ እነ ፕልጶስ ላክቱ ዱገ ዎዲደ፡ ሃላን ገልና ፕልጶስ አ ጸማቁዳ።

39 ኡንቱንቱ ሃላፕ ጋጸ ከሴዳ ዎደ፡ ጎዳ አያናይ ፕልጶሳ ልጽ ኦሊደ፡ አፍ አጌዳ፤ ላኡንሉዋ ሹፋይ ፕልጶሳ በእቤና፤ ሽን ባረ ኦግያ ናሽቲደ ቤዳ።

40 ፕልጶስ ባረ ሁጳዉ አዘጸሳን ደኢያዋ ኤሬዳ፤ ቃይ ቂሳርያ ያና ጋካናዉካ፡ ካታማ ኡባን ዩዩደ ሞሽራቹዋ ቃላ ኦዳ።

# 9

## ሳኦል ክርስቶሳን አማኔዳ (22:6-16፤ 26:12-18)

1 ሽን ሳኦል ጎዳ ካልያዋንታ ዎዳናዉ ማንዲደ፡ ቄሳቱዋ ኡባቱዋ ካቸዋኮ ቤዳ።

2 ያቲደ ጎዳ ኦግያ ካልያ አሳቱዋ ማጫዋንታነ አቱማዋንታ ደሞፕ፡ ቃቹደ የሩሳላሙ አሀናዉ፡ ዳማስቆን ደኢያ አይሁዳ ዎሳ ጎለቶ ዳብዳቢያ ጸፋናዉ አ ዎሴዳ።

3 እ ቢደ፡ ዳማስቆ ካታማ ጋካና ማቶደ፡ ቆፕናን ሳሉዋፕ ዎልቃማ ፖኡ አ ዩሹዋ ኡባን ፖኤዳ።

4 ሳኦል ሳኦን ኩንድ ኡትና፡ “ሳኦላ ሳኦላ፡ አያዉ ታና ዎይሳይ?” ግያ ቃላ ሰሴዳ።

5 ሳኦል፡ “ታ ጎዳዉ፡ ኔን ኦኔ?” ያጌደ ኦቹዳ።  
የሱስካ፡ “ታን ኔን የደርሳደ ደኢያ የሱሳ” ያጌዳ።

6 ሽን ሳኦል ኮኮሪድነ ማላለቲደ፡ “ታ ጎዳዉ፡ ታን አያ ኦላናዳን ኮያይ?” ያጌዳ።



ጎዳይ አ፡ “ደንዳደ ካታማ ገላ፤ ኔን ኦላናዉ በሰያባይ ነዉ ያን ኦደታናዋ” ያጌዳ።

7 ሳኦላና ኦግያን ብያ አሳቱ አይነ ሃሳየናን ኤቂ አጊደ፡ ኮሻ ሰሲኖ፤ ሽን ኦናን በእበይክኖ።

8 ሳኦል ሳኦፕ ደንድና፡ አ አይፊ ደየቴዳ ዋደ፡ አይነ ዴላናዉ ዳንዳይቤና፤ ሄዋ ድራዉ፡ ኡንቴንቴ አ ኩሽያ ኦይቂ ጎቺደ፡ ዳማሰቆ ገልሴድኖ።

9 ሄዙ ጋላሳ ጋካናዉካ እ ዴልቤና፤ አይነ ሞቤና፤ አያኔካ ኡሽቤና።

10 ዳማሰቆን እት ሀናንያ ግያ ካልያዌ ደኤ፤ ጎዳይ ሳጸን አ፡ “ሀናነዉ” ያጌዳ።

ሀናኒ፡ “ታ ጎዳዉ፡ ሀዋን ደአይ” ያጌዳ።

11 ጎዳይ አ፡ “ደንዳደ ሱረ ጌተትያ ኦግያ ባደ፡ ይሁዳ ሶይን እት ሳኦላ ግያ ጸርሴሰፕ ዬዳ ብታንያ ኮያ፤ አያዉ ጎፕ፡ እ ዋሴ።

12 ቃይ ሀናንያ ግያ ብታኒ ገሊደ፡ ሳኦል ሳኤንሱዋ ዴላናዳን፡ ባረ ኩሽያ አ ቦላ ዋልያዋ ሳጸን በኤዳ” ያጌዳ።

13 ሀናኒ ዛሪደ፡ “ታ ጎዳዉ፡ የሩሳላመን ነ ጌሻ አሳ ቦላ ሄ ብታኒ አይ ከና እታባ አሉደንቶ፡ ታን ዳሮ አሳፕ ሰሳድ።

14 ቃይ ዳማሰቆን ነ ሱንላ ዴሰያዋንታ ኡባ ቃቻናዉ፡ ቄሳቱዋ ካፓቱ አዉ ማታ አሜድኖ” ያጌዳ።

15 ሽን ጎዳይ አ፡ “ሳኦል አይሁዳ ግደና አሳ ሰንላን፡ ካታቱዋ ሰንላንን እሰራኤልያ አሳ ሰንላን፡ ታ ሱንላ ኤርሳናዉን ታዉ ኦላናዳን ድረቴዳ ሚሻ ግድያ ድራዉ፡ ኔን ባ።

16 አያዉ ጎፕ፡ ታ ሱንላ ድራዉ፡ እ አይ ከና ዋየታናዉ በሰንቶ፡ ታን አ በሳና” ያጌዳ።

17 ሀናኒ ቢደ፡ ሶይ ገሊደ፡ ባረ ኩሽያ ሳኦላ ቦላ ዋሊደ፡ “ታ እሻዉ ሳኦላ፡ ኔን ይያ ኦግያን ነዉ ቤቴዳ የሱሰ፡ ኔን ዴላና ማላን ጌሻ አያናይ ኔናን ኩማና ማላ፡ ታና ኪቴዳ” ያጌዳ።

18 ኤለካ፡ አየንቶ ፖቁዋ ማላይ ሳኦላ አይፍያፕ ዋድና፡ ሳኦል ሳኤንሱዋ ዴላና፤ ቃይ ደንዲደ ጸማቀቴዳ።

19 ቁማ ሚደ ሞነት፡ ዳማሰቆን ደአያ ካልያዋንቴና አማሬዳ ጋላሳ ጋምኤዳ።

**ሳኦል ዳማሰቆን ታማርሴዳ**

20 ኤለካ፡ “የሱሰ ክርሰቶሰ ጸሳ ናኦ” ያጊደ፡ አይሁዳ ዋሳ ጎለቱዋን ቃላ ኦዴዳ።

21 ሄዋ ሰሴዳ ኡባይ ማላለቲደ፡ “ሀዌ የሩሳላሙን የሱሳ ሱንሳ ጴሳያዋንታ ጳይሰያዋ ግደኔ? ቃይ ኡንቱንታ ቃቺደ፡ ቄሳቱዋ ካፓቱዋ ሰንሳ አፋናዉ ይቤኔየ?” ያጌድኖ።

22 ሸን ሳኦል ቃላ ኦድያ ኦዱ ሞን ሞን ቤዳ፤ የሱሳ ቃይ ክርሰቶሳ ግድያዋካ እ ከኬክሲደ ኦዳዳ ድራዉ፡ ዳማሰቆን ደእያ አይሁዳቱ አዉ ዛርያዋ ጳይድኖ።

23 ጮራ ጋላሳፕ ጉይያን፡ አይሁዳቱ ሸቂደ፡ ሳኦል ዋጳናዉ ዘረቱድኖ።

24 ሸን አይሁዳቱ ባረና ዋጳናዉ ቆፖዋ ሳኦል ሰሴዳ፤ ኡንቱንቱ አ ዋጳናዉ ቃማን ጋላሰ ካታማ ፐንግያ ናጊኖ።

25 ሸን ካልያዋንታ አ ቃማ አፊደ፡ ድርሳ ሁጲያና ቁንኣን ዱገ ዋጴድኖ።

**ሳኦል የሩሳላሙን ታማርሴዳ**

26 ሳኦል የሩሳላሙ ጋኬዳ ዋደ፡ ካልያዋንቱና እትፕ ጋከታናዉ ሸቅ በኤዳ፤ ሸን ካልያዋ እ ግዴዳዋ ኡባይ አማነናን እጲደ፡ አዉ ያዬድኖ።

27 ሸን ባርናባሰ ሳኦል የሱሳ ኪቴዳዋንቱን አፊዳ፤ ኦግያን ጎዳ እ ዋኒደ በኤደንቶ፡ አዉ ጎዳይ ዋት ሃሳዬደንቶን ቃይ ሳኦል ዳማሰቆን የሱሳ ሱንሳን ያየናን ዋት ቃላ ኦዳደንቶ፡ ኡንቱንቶ ጌሺደ ኦዳዳ።

28 ሳኦል የሩሳላሙን ዩዩደነ ጎዳ የሱሳ ሱንሳን ያየናን ቃላ ኦዳደ፡ የሱሳ ኪቴዳዋንቱና እትፕ ደኤዳ።

29 ቃይ ሳኦል ግሪክ ቃላ ሃሳይያ አይሁዳቱዋና ሃሳዬነ ፓሉመቱ፤ ሸን ኡንቱንቱ አ ዋጳናዉ ኮዬድኖ።

30 እሻቱ ሄዋ ሰሴደ፡ ሳኦል ዱገ ቁሳርያ አፊደ፡ ጸርሴሰ የዴድኖ።

31 ይሁዳን፡ ጋሊላንነ ሳማርያን ኡባን ደእያ አማንያ አሳቱ ሳርተላን ደኤድኖ፤ ቃይ ሞኔድኖ፤ ጎዳዉ ያይያዋንነ ጌሻ አያና ማዲዋን ጌመቲደ፡ ፓይዲዋንካ ዳር ዳር ቤድኖ።

**ጳጵርሰ ሊድያንነ የጳን ታማርሴዳ**

32 ጳጵርሰ ኡባ ሳን ዩዩደ፡ ሊዳን ደእያ ጌሻ አሳቱዋኮ ቃይ ዋዲዳ።

33 ያቲደ ሄዋን ሆሰፑን ላይላ ሰሊደ፡ አርሳን ግሲደ ደእያ እት ኤንያ ግያ ብታንያ ደሜዳ።

34 ጳጳሮስ ኤንያ፡ “ኤናው፡ የሱስ ክርስቶስ ኔና ፓሌ፤ ደንዳደ ነ ሂጻ የጋ”\* ያጌዳ። ሄዋጥ ጉየ ኤለካ ደንድ ኤቁዳ።

35 ሊዳንነ ሳርናን ደእያ አሳይ ኡባይ ኤንያ በኢደ፡ ጎዳኮ ሰሜድኖ።

36 ዮጳ ካታማን እት ጸቢቶ ጌተትያ አማነውና ደአው፤ ጸቢቶ ጉሳይ ገሪከ ቃላን ዶርቆ ግያዋ። እዛ ባረ ደኤዳ ዋድያ ኡባን ሎእባ ኦላደነ ህዬሳ ማዳደ ደአው።

37 ሄ ዋደ እዛ ሀርጋደ ሀይቁና፡ አሳይ እዝ እሃ ሜጨደ፡ ፖእያ ፑደ ከሲደ ግስሴዳ።

38 ሊዳይ ዮጳው ማታ፤ ካልያዋንቱ ጳጳሮስ ሊድያን ደእያዋ ዮጳን ሰሲደ፡ “ሀያና ኑኮ ኤለካ ያርኪ” ያግያ ኪታ ላኡ አሳቱዋ ቦላ እኮ ኪቴድኖ።

39 ሄዋጥ ጉየ ጳጳሮስ ደንዲደ፡ ኡንቱንቱና ብ ጋክና፡ ፖቅያ ፑደ እ ከሲደ፡ ክፍልያ ገልሴድኖ። አሰን ባይና አምኤ ማጫዋንቱ ኡባይ ዬኪደነ ዶርቃ ኡንቱንቱና ደእያ ዋደ ኦሌዳ ቃምሻቱዋነ ማያቱዋ ኡባ ጳጳሮሳ በሲደ፡ እ ዩሹዋን ዩይ አጂደ ኤቁድኖ።

40 ጳጳሮስ ኡንቱንታ ኡባ ካረ ከሲደ፡ ጉልባት ጸሳ ዋሴዳ፤ ቃይ እሃኮ ሰሚደ፡ “ጸቢቱ፡ ደንዳ” ያጌዳ፤ ጸቢታካ ባረ አይፍያ ደያ ጳጳሮሳ በእደ፡ ጶቃ ኡታዱ።

41 ጳጳሮስ እዝ ባረ ኩሽያን ማዲደ፡ ደንሐ ኤሴዳ፤ ሄዋጥ ጉይያን፡ አማንያዋንታነ አሰን ባይና አምኤ ማጫዋንታ ዴሲደ፡ ፓጴዳውኖ ኡንቱንቶ እሜዳ።

42 ሀ የዉ ዮጳ ካታማ ኡባን ላለትና ጮራ አሳይ ጎዳ አማኔድኖ።

43 ጳጳሮስ ዮጳን እት ሰሞና ግያ ጋልባ ቃጭያዋና ዳር ዋድያ ጋምኤዳ።

# 10

## ጳጳሮሳነ ቆርነልዮሳ

1 ቁሳርያን “ጸላቱዋ ኦላ አሳቱዋ” ጌተትያ ኦላንቻቶ እት ጴታቱዋ ካፑ ቆርነልዮሳ ግያዌ ደኤ።

2 ቆርነልዮስ ጸሳ ሎይሊደ አማንያ አሳነ፡ ባረ ሶይ አሳ ኡባና እትጥ ጸሳው ጎይንያ አሳ፤ አይሁዳ ሀዬሳካ እ ዳር ማዴ፤ ቃይ ጸሳ ኡባ ዋደ ዋሴ።

\* 9:34 ሂጻ የጋ- ሀዋ ጉሳይ ሚተትያባ ገግሳ ጉሳ።

3 እት ጋላስ ኡዲፑ ሳትያ ሄራን፣ “ቆርነልዮሳ” ጊደ ጸሰያ ጸሳ ኪታንቻይ ባረኮ ገልሸን፣ ቆርነልዮሳ ሳጸን ጌሺደ በኤዳ።

4 ቆርነልዮሳ ያዪደ፣ ኪታንቻ ጫድ ጸሊደ፣ “ታ ጎዳዉ፣ እ ኦዬ?” ያጌዳ።

ኪታንቻይ ዛሪደ፣ ሀዋዲን ያጌዳ፤ “ነ ዎሳይነ ኔን ሀዬሳ ማድያዌ ጸሳ ሰንፋን ሀሳየታናዉ ሳሉዋ ቤዳ።

5 ሀእ ዮጳ አሳ ኪታደ፣ ጳጵሮሳ ጌተትያ ሰሞና አሀሳ።

6 ጳጵሮስ አባ ዶናን ደእያ ጋልባ ቃጭያ ሰሞና ጎሊን እማላተላን ኡቴዳ፤ ኔን ኦፋናዉ በሰያዋ እ ነዉ ኦዳናዋ” ያጌዳ።

7 ቆርነልዮሳ ባረዉ ኦዳዳ ኪታንቻይ ቢና፣ ባረ ቆማቱዋፕ ላአቱዋነ ጸሳዉ ጎይንያ ባረፕ ሻከተና ዎታዳራቱዋፕ አቱዋ ጸሲደ።

8 ኡንቱንቶ ኡባባ ኦዲደ፣ ኡንቱንታ ዮጳ ኪቴዳ።

9 ዎንተላ ጋላስ ኡንቱንቱ ቢደ፣ ዮጳ ካታማኮ ማትሸን፣ ጳጵሮስ ኡሱፑን ሳትያ ሄራን ጎልያ ቦላን ደምባዪደ ኦፊዳሳ ጸሳ ዎሳናዉ ከሴዳ።

10 ቃይ ኮሻቲደ፣ ቁማ ማናዉ ኮዬዳ፤ ሸን ቁማይ ካእሸን፣ ሳፃ በኤዳ።

11 ሳሉ ዶየትና፣ ዎልቃማ ማዩዋ ማላትያባይ ኦይዱ ባጋና ኦይቀቲደ፣ ሳእን ዎጵሸን፣ ጳጵሮስ በኤዳ።

12 ሄዋን ኦይዱ ገድያና ደእያ መሄ፣ ዶአይ፣ ሾሻይ፣ ዛሪነ ካፋ ኡባይ ደኤ።

13 “ጳጵሮሳ፣ ደንዳ ኤቃደ ሹካ ማ” ግያ ቃላይ አኮ ዬዳ።

14 ሸን ጳጵሮስ፣ “ታ ጎዳዉ፣ ሀነና! ታን ቱናባነ ሸነይያባ ኡባካ ማ ኤርከ” ያጌዳ።

15 ቃይ ላኡንሉዋ፣ “ጸሳይ ጌሼዳዋ ኔን ቱንሶፓ” ግያ ቃላይ አኮ ዬዳ።

16 ሄዙ ገደ ሄዋዲን ጌዳ፤ ሄዋፕ ጉይያን፣ ኤለካ ሄ ዎልቃማ ማዩዋ ማላትያዌ ፑደ ሳሉዋ አከት አጌዳ።

17 ጳጵሮስ ባረ በኤዳ ሳፃ ብለላይ እያ ግዳንዴሻ? ያጌደ፣ ባረ ዎዛና ግዳን፣ “ላ ሀዌ አዬ?” ጌሸን፣ ቆርነልዮሳ ኪቴዳ አሳቱ ሰሞና ጎሊ ደኢያሳ ኮዪደ፣ አ ፐንግያን ኤቁድኖ።

18 ባረንቱ ኮሻ ጶቁ ኦፊደ፣ “ጳጵሮሳ ጌተትያ ሰሞና ግያ እማላይ ሄዋን ደኢ?” ያጌደ ኦፕድኖ።

19 ጳጳሮስ ሳጸን በኤዳባ አከካናዉ ቆፋን ሸክደእሸን፡ ጌሻ አያናይ እ፡ “በእ፡ ሄዙ \* አሳቱ ኔና ኮዪና፤

20 ደንዲደ ዎቋ፤ ታን ኡንቱንታ ኪቴዳ ድራዉ፡ ሰርን ኡንቱንቱና ባ” ያጌዳ፡፡

21 ጳጳሮስ አሳቱዋኮ ዎቋደ፡ “ህንተንቱ ኮይያዌ ታና፡ አያ አካና ዬድቱ?” ያጌዳ፡፡

22 ኡንቱንቱ፡ “ጳሳዉ ያይያ ጽሉ አይሁዳ አሳ ኡባን ዳር ቦንቹቱዳ ዴታቱዋ ካቸዋ ቆርነልዮስ፡ ኔና ባረ ሶይ አፍሲደ፡ ቃላ ኔፕ ሰሳና ማላ፡ ጳሳ ጌሻ ኪታንቻይ አዉ ኦዴዳ” ያጌድኖ፡፡

23 ጳጳሮስ አሳቱዋ እማላ ኦል ሾባናዉ ሶይ ሞኬዳ፡፡

ዎንተላ ጋላስ፡ ደንዲደ ኡንቱንቱና ቤዳ፤ ዮጳ ካታማን ደእያ እሻቱዋፕ እቱ እቱ አናና እትፕ ቤድኖ፡፡

24 ዎንተላ ጋላስ፡ ቁሳርያ ጋኬድኖ፤ ቆርነልዮስ ባረ ዳባቱዋን ባረ ላገላቱዋ እትፕ ዴስ ሺሺደ፡ ጳጳሮሳ ናጌ፡፡

25 ጳጳሮስ ገላና ሀንሸን፡ ቆርነልዮስ አናና ጋከቲደ፡ አ ሰንላን ኩንዲደ፡ አዉ ጎይኔዳ፡፡

26 ሸን ጳጳሮስ፡ “ደንዳ! ታንካ ታ ሁጳዉ አሳ” ያጌደ አ ደንሴዳ፡፡

27 ጳጳሮስ ቆርነልዮሳና ሃሳዪደ፡ ሶይ ገሌዳ፤ እ ገልያ ዎደ ጮራ አሳይ ሸቄዳዋ ደሚደ፡፡

28 አሳ፡ “አይሁዳ አሳይ ሀራ ዛርያና እትፕተላን ደአናዉ፡ ዎይ ጋከታናዉ ዎጋ ግደናዋ ህንተ ሁጳዉ ኤሪታ፤ ሸን ታን ኦናነ ቱና ዎይ ሸንይያባ ጌና ማላ፡ ጳሳይ ታና በሴዳ፡፡

29 ሄዎ ድራዉ፡ ህንተ ታዉ ኪትና፡ ፓሉማይ ባይናን ያድ፡፡ ሀእ፡ ‘ታና አያዉ አህሴድቱ?’ ያጋደ ህንተንታ ኦቻይ” ያጌዳ፡፡

30 ቆርነልዮስ ሀዋዳን ያጌዳ፤ “ታን ሀቹ ኦይዱ ጋላሳፕ ካስ ሀ ሳትያን ኡዲቸ ሳትያ ዎሳ ታ ሶይን ጳሳ ዎስሸን፡ ጳልቂያ ማዩዋ ማዬዳ አሳይ ታ ሰንላን ኤቂደ፡፡

31 ታና፡ ‘ቆርነልዮሳ፡ ጳሳይ ነ ዎሳ ሰሴዳ፤ ኔን ሀዬሳ ማድያዎካ ሀሳዬዳ፡፡

32 ሰሞ አሳ ዮጳ ኪታደ፡ ሰሞን ጳጳሮሳ ግያዋ ዴሰሳ፤ ሰሞን ጳጳሮስ ሰሞና ግያ ጋልባ ቃጭያዎ ጎለን አባ ደናን እማላተላ ኡቴዳ’ ያጌዳ፡፡

\* 10:19 ሄዙ- እት እት ማጻፋቱ ጮራ ገኖ፤ እት ማጻፋይ ላኡ ያጌ፡፡

33 ሄዋ ድራው፡ ታን ኔኮ ኤለካ ኪታድ፤ ኔንነ ያደ ሎይላዳ፤ ሰም ኔን ኑው ኦዳናው ጸሳይ ኔና አዛዜዳዋ ኡባ ሰሳናው ሀእ ኑን ኡባይ ሀዋን ጸሳ ሰንላን ደኤቶ” ያጌዳ።

**ጳጵሮሳ ሃሳያ**

34-35 ጳጵሮስ ሃሳያ ሀዋዳን ያግ ደሜዳ፤ “ጸሳይ አሳ ሰምእያ ጼለና፤ ሸን ጋደ ኡባን ባረው ያይያዋን ጽሎ ኦሱዋ ኦሰያዋ ጋላትያዋ ታን ቱሙ አኬካድ።

36 ጸሳይ አሳ ኡባ ጎዳ፡ የሱስ ክርስቶሳ ባጋና፡ ሳርተላ ኦዲደ፡ ሀ ዋንጋላ ሞሽራቹዋ እሰራኤልያ አሳው ኪቴዳዋ ህንተንቱ ኤሪታ።

37 ዮሃንስ ቃላ ኦዳዳ ጽንቃታፕ ጉይያን፡ ጋሊላፕ ደሚደ፡ ይሁዳ ጋድያ ኡባን ሀኔዳዋ ህንተ ኤሪታ።

38 ጸሳይ ናዘሬትያ የሱሳ ጌሻ አያናንነ ዋልቃን ኩንጼዳ፤ ጸሳይ አናና ደእያ ድራው፡ ሎኦባ እ ኦሊድነ ጸላህያ ካፖ ሞደቱዳ ኡባ ፓሊደ ዩዬዳ።

39 “አይሁዳ ጋድያንነ የሩሳላሙን እ ኦሌዳ ኡባባው ኑን ማርካ። ኡንቱንቱ ማሰቃልያ ቦላ ሞሰማርያን ድሽ ካቂደ፡ አ ዋዲድኖ።

40 ሸን ጸሳይ ሄዘንልያ ጋላሳን ሀይቁዋፕ አ ደንሊደ በሴዳ።

41 ጸሳይ ኮይሮ ድሬዳ ማርካቱዋ ኑና፡ አ በሴዳፕ አትን፡ አሳ ኡባ ግደና፤ ሀይቁዋፕ እ ደንዴዳዋፕ ጉይያን፡ ኑን አናና ሜዶነ ኡሼድ።

42 ጸሳይ ዋንጋላ ሞሽራቹዋ አሳው ኑን ኦዳናውነ፡ ፓጸ ደእያዋንቱ ቦላንነ ሀይቁዳዋንቱ ቦላን ፕርዳናው እ ሱንጼዳዌ የሱሳ ግዴዳዋ ኑን ማርካታናው ኑና አዛዜዳ።

43 ጸሳይ አን አማንያ ኡባ ናጋራ አ ሱንላን አቶ ጋናዋ ናባቱ ኡባቱ ማርካቲኖ” ያጌዳ።

**አይሁዳ ግደና አሳቱ አማኒደ ጌሻ አያና አኬድኖ**

44 ጳጵሮስ ብሮ ሄ የወዋ ኦድሸን፡ ቃላ ሰሰያ ኡባ ቦላ ጌሻ አያናይ ዋድ አጌዳ።

45 ጳጵሮሳና ዮጳፕ ዬዳ፡ አማንያ ቃጸረቱዳ አይሁዳ ኡባቱ አይሁዳ ግደናዋንቱ ቦላንካ ጌሻ አያና እሞታይ ጉኬዳ ድራው ማላለቲድኖ።

46 አያው ጎፕ፡ ኡንቱንቱ ዲማ ዲማ ቃላን ሃሳይሸንነ ጸሳ ዳርተላ ሳቢሸን ሰሴድኖ።

ሄ ዎደ ጳጳሮስ ዛሬደ።  
 47 “ሀዋንቱ ቃይ ኑናደን ጌሻ አያና አኬዳዎንቱ ጸማቀተናደን፤ ሃላ ኡንቱንታ ድጋናዉ ዳንዳይያዌ ኦኔ?” ያጌዳ።  
 48 ኡንቱንቱ የሱስ ክርስቶስ ሱንፋን ጸማቀታና ማላ፤ ኡንቱንታ አዛዜዳ፤ ሄዋፕ ጉይያን፤ ኡንቱንቱ ባረንቱና አማሬዳ ጋላሳ ኡታና ማላ፤ አ ዎሴድና።

# 11

ጳጳሮስ አይሁዳ ግደና አሳፕ አማኔዳዎንቱ ሶይ አያዉ ገሌደንቶ ኦዴዳ

1 የሱስ ኪቴዎንቱን ይሁዳ ኡባን ደእያ እሻቱ፤ አይሁዳ ግደናዎንቱን ጸሳ ቃላ አኬዳዎ ሰሴድና።

2 ጳጳሮስ የሩሳላሙ ቤዳ ዎደ፤ ቃጸረቲዳ አሳቱ አናና ፓሉሙቲደ።

3 አ፤ “ኔን ቃጸረትቤናዎንቱኮ ገላደ፤ ኡንቱንቱና ቁማ ማዳ” ያጌድና።

4 ሸን ጳጳሮስ ሀኔዳዎ ኮይሩዋፕ ዶሚደ፤ ማራን ማራን ሀዋዳን ያጌደ ኦዴዳ፤

5 “ታን የጳ ካታማን ጸሳ ዎሰሸን፤ ታን አያናን ግዳደ ሳፃ በአድ፤ ዎልቃማ ማዩዋ ማላትያዌ ኦይዱ ባገና ኦይቀቲደ፤ ሳሉዋፕ ዎዲደ፤ ታኮ ዬዳ።

6 ሄዋ ግዲዋ ታን ጫዳ ጾልያ ዎደ፤ ኦይዱ ገዲ ደእያ ሙሀያ፤ ዲአ፤ ሸሻ፤ ዛርያን ካፋዋ በአድ።

7 ቃይ፤ ‘ጳጳሮሳ፤ ደንዳ፤ ሹካ ማ’ ግያ ቃላ ታን ሰሳድ።

8 “ሸን ታን፤ ‘ታ ጎዳዉ፤ ሀነና! ቱናባይ ዎይ ሸነይያባይ ኡባካ ታ ዶናኮ ሸቅ ኤረና’ ጋድ።

9 “ቃላይ ሳሉዋፕ ላኤንፉዋካ፤ ‘ጸሳይ ጌሼዳዎ ኔን ቱና ጎፓ’ ያጌደ ታዉ ዛሬዳ።

10 “ሄዎ ሄዙ ገደ ሀንና፤ ዉርስላን ኡባባይ ሳሉዋ ፑደ ጎሸቱዳ።

11 ሄ ማንእያን ሄዙ አሳቱ ቁሳርያፕ ታኮ ኪተቲደ፤ ታን ደእያ ጎልያ ጋክ አጌድና።

12 ታንካ ሰ□ናን ኡንቱንቱና ባና ማላ፤ ጌሻ አያናይ ታዉ ኦዴዳ። ቃይ ሀ ኡሱፑን እሻቱ የጳፕ ታናና ቁሳርያ ቤና፤ ኦን ቆርነልዮሳ ሶይ ገሌደ።

13-14 ኪታንቻይ ባረ ሶይን ኤቁደ ባረና፤ ‘ጳጳሮሳ ጌተትያ ሰዋና ጾሳናዉ አሳ የጳ ኪታ፤ ኔንነ ነ ጎለ አሳይ ኡባይ አትያ

ቃላ እ ነዉ ኦዳናዎ ጌዳዎ ቆርነልዮስ ዎት ሰሴደንቶ፡ ኑዉ ኦዴዳ።

15 “ታን ሃሳያናዉ ደምያዋን ጌሻ አያናይ ኮይሮ ኑ ቦላ ዎዴዳዎዳን፡ ኡንቱንቱ ቦላካ ዎድ እጌዳ።

16 ጎዳይ፡ ‘ዮሃንስ ሃላን ጸማቄዳ፤ ሽን ሀንተንቱ ጌሻ አያናን ጸማቀታንታ’ ያጌዳ ቃላ ታን ሀሳያድ።

17 ጸሳይ ኑዉ ጎዳ የሱስ ክርስቶስ አማኔዳዋንቶ እሜዳ እዎታ ማላ አይሁዳ ግደናዋንቶካ ቃይ እሞፕ፡ ሰም ጸሳ ድጋናዉ ታን ኦኔ?” ያጌዳ።

**አማንያዋንቱ ክርስታን ጌተቲድኖ**

18 ኡንቱንቱ ሀዋ ሰሴዳ ዎደ ባረንቱ ፓሉማ አገደ፡ “ያትና፡ ጸሳይ አይሁዳ ግደናዋንቱካ ቃይ ናጋሪፕ ሰሚደ ደአናዳን፡ ኡንቱንታ ካጨዳ” ያገደ ጸሳ ጋላቴድኖ።

19 እስጵፋኖሳ ቦላ ጋኬዳ ዋይያ ጌዳዋን ላለቲዳ አማንያዋንቱ ቃላ አይሁዳቲዎ ጸላላፕ አትን፡ ሀራዉ እቶነ ኦደናን፡ ፕንቀ፡ ቆጲሮሳነ አንጾክያ ጋካናዉ ዩዬድኖ።

20 ሽን ቆጲሮሳፕነ ቀሪናፕ ዬዳ እት እት አማንያ አሳቱ አንጾክያ ቢደ፡ ጎዳ የሱሳ ዎንጋላ ሞሽራቹዎ ኦዲደ፡ ግሪከ አሳዉካ \* ኦዴድኖ።

21 ጎዳ ዎልቃይ ኡንቱንቱና ደኤ፤ ቃይ ጮራ አሳይ አማኒደ፡ ጎዳኮ ሰሚድኖ።

22 ሀ የዉ የሩሳላመን ደእያ አማንያ አሳዉ ሰሰትና፡ አማንያ አሳይ ባርናባሳ አንጾክያ ከቲዳ።

23 ባርናባሳ አንጾክያ ቤዳ ዎደ፡ ጸሳ እጵ ኬካተላ ኦሱዋ በኢደ ናሽቲዳ፤ ኡንቱንቱ ኡባይ ጎዳን ባረንቱ ኩመንላ ዎዛናፕ ምን ደአናዳን፡ ኡንቱንታ ዞሬዳ።

24 አያዉ ጎፕ፡ ባርናባሳ ጌሻ አያናይን አማኑ ኩሜዳ ሎኦ አሳ፤ ሄ ጋሱዎን ጮራ አሳይ ጎዳኮ ዩድኖ።

25 ሄዎፕ ጉይያን፡ ባርናባሳ ሳኦላ ኮያናዉ ጸርሴስ ቤዳ።

26 ያቲደ ሳኦላ ደሜዳ ዎደ፡ አንጾክያ አሄዳ። ባርናባሳን ሳኦላ አማንያ አሳና እት ላይላ ኩመንላ ኡቲደ፡ ጮራ አሳ ታማርሴድኖ፤ ካልያዋንቱ አንጾክያን አማንያ አሳ ጌተቲደ፡ ኮይሮ ጴስቲድኖ።

27 ናባቱ የሩሳላመፕ አንጾክያ ሄ ዎደ ዎዴድኖ።

28 ኡንቱንቱ ግደፕ አጋቦሳ ግያዌ ደንዲደ፡ ሳኦ ኡባን ዎልቃዎ ኮሻይ ደንዳናዎ አያና ዎልቃን ትምቢትያ ኦዴዳ፤ ሄዌ ሀኔዳዌ ቃላዉደዮሳ ካዉተላ ዎድያና።

\* 11:20 ግሪከ አሳ፡ ሀዋ ጉሳይ ግሪከ ቃላ ሃሳይያ አይሁዳ ዎይ ሀራ አሳ።



29 ካልያዋንቱ ሁጲያን ሁጲያን ባረንቱ ዋልቃ ኬና ሚሻ ከሲደ፣ ይሁዳን ደእያ ባረንቱ እሻቶ ማዲዋ የዳናዉ ቆፋ ቃቼድኖ።

30 ኡንቱንቱ ሄዋዳን ኦሲደ፣ ሚሻ ባርናባሳ ቦላንነ ሳኦላ ቦላ ዋሳ ጎለ ጭማቶ የዴድኖ።

# 12

## ዋሳ ጎለን ዋልቃማ ኢታ የደሳይ ዶሜዳ

1 ካትያ ሄሮድስ \* ሄ ዋደ ዋሳ ጎለ አሳፕ አማራዳዋንታ ዋይሱዋ ዶሜዳ።

2 ዮሃንሳ እሻ ያቆባ ማሻን ዋድሴዳ።

3 ሄዌ አይሁዳቱዋ ናሽቼዳዋ በኢደ፣ ጉጅ ጳጵሮሳካ ኦይቄዳ፤ ሄዌ ማጋገ ኡክላ ባላ ቦንኙያ ጋላሳቱዋና።

4 ጳጵሮሳ ኦይቄደ ቃቼዳ። ፓስጋ ባላ ቦንኙያ ጋላሳቱዋፕ ጉይያን፣ ጋደ አሳ ሰንላ አላናዉ ቆፒደ፣ ኦይዱ ኦይዱ ዋታዳራቱ አ ናጋናዳን፣ ታማነ ኡሱቱን ዋታዳራቶ አሲደ እሜዳ።

5 ሄዋ ድራዉ፣ ጳጵሮስ ቃሾ ጎልያን ናገቱ፤ ሽን ዋሳ ጎለ አሳይ አዉ ምንሲደ ጸሳ ዋሴ።

## ኪታንቻይ ጳጵሮሳ ቃሾ ጎለፕ ከሴዳ

6 ሄሮድስ ጳጵሮሳ አሳ ሰንላ አላናዉ ቆፓናፕ ካስ ቃማ፣ ጳጵሮስ ላኡ ሳንላላታን ቃሽቲደ፣ ላኡ ዋታዳራቱዋፕ ግዲዋን ገምእሹዳ፤ ናገያዋንቱካ ቃሾ ጎለ ፕንግያን ኤቄደ ናገኖ።

7 አኬከናን ደእሸን፣ ጎዳ ኪታንቻይ ሄዋን ኤቄ አጌዳ፤ ቃሾ ጎለንካ ፖኡ ፖኢ አጌዳ። ኪታንቻይ ጳጵሮሳ ምይያ ደች ቤጎሲደ አ፣ “ኤለ ደንዳ” ያጌዳ፤ ሄ ማንእያን ሳንላላታይ አ ኩሽያፕ ዋድ አጌዳ።

8 ኪታንቻይ አ፣ “ነ ሱርያ ዳንጫ፤ ነ ጫማካ ዋላ” ያገና፣ ጳጵሮስ ሄዋዳን ኦሌዳ፤ ኪታንቻይ፣ “ነ ማዩዋ ማያደ ታና ካላ” ያጌዳ።

9 ጳጵሮስ ቃሾ ጎልያፕ ከሲደ፣ ኪታንቻ ካሌዳ፤ አዉ ሳዎ በእያዋ ማላቴዳፕ አትን፣ ኪታንቻይ ኦልያባይ ቱማ ግዴዳዋ ኤርቤና።

\* 12:1 ሄሮድስ፡ ሀዋ ጉሳይ ሄሮድስ አግሪጳ ኮይሩዋ ግዲደ፣ ፓላስቲን ግያ ጋድያ ኡባ ሞድያዋ። ሄዌካ ዋጋ ሄሮድስ ሄዘላ የለታ። 12:4 ከሳ 12:1-27

10 ኪታንቻይን ጳጳርሰ ኮይሮ ዋታዳራጥን ላኤንሉ ዋታዳራጥ አዲድ፣ ካታማ አፍያ ብራታ ፕንግያኮ ጋኬድኖ፤ ፕንጊካ ኤንቱንቶ ባረካ ደየት አጌዳ፤ ኤንቱንቱ ከሲደ እት ኦግያና ቢሸን፣ ኪታንቻይ ኤላካ ጳጳርሳጥ ሻከት አጌዳ።

11 ጳጳርሰ ባረና ጋኬዳባ አኬኪድ፣ “ታና ጎዳይ ባረ ኪታንቻ ኪቲድ፣ ሄሮድሳ ኩሸያጥን አይሁዳ አሳይ ናግ ኡቴዳ ኡባባጥ አሸዳዋ ሀእ ቱሙ ኤራድ” ያጌዳ።

12 እ ሄዋ አኬኬዳ ዋደ፣ ጮራ አሳይ እትጥ ሺቂደ ጸሳ ዋሰያሳ፣ ማርቆሳ ግያ ዮሃንሳ ዳይ ማይራም ሶይ

13 ቢደ ፕንግያን ጸሰና፣ እት ርዶ ግያ ቆማታ ደያናዉ ያዲ።

14 ርዶ ጳጳርሳ ቃላ ግዴዳዋ ኤሬዳ ዋደ፣ ባረና ናሽቶና፣ ፕንግያ ደየናን ጉየ ዋጸደ፣ ጳጳርሰ ካረን ኤቄዳዋ አሳዉ ኦዳዲ።

15 አሳይ እዞ፣ “ሀነ፣ ኔን ጎያ” ያጌዳ። ርዶ ጳጳርሳ ግዴዳዋ ጌሻደ ኦዳዲ። ኤንቱንቱ፣ “ሄዌ አ ኪታንቻ”† ያጌድኖ።

16 ሸን ጳጳርሰ ካረን ጸሲደ አገናን እጽና፣ አሳይ ካርያ ደይ፣ አ በኢደ ማላለቲድኖ።

17 ሸን ኤንቱንቱ ጮኡ ጋና ማላ፣ ጳጳርሰ ባረ ኩሸያን ጸርሲድ፣ ጎዳይ ቃሾ ጎልያጥ አ ዋት ከሴደንቶ፣ ኤንቱንቶ ቆንጭስ ኦዲድ፣ “ሀዋ ያቆባዉን ፥ እሻቶ § ኦድተ” ጊድ፣ ከሰ ሀራሳ ቤዳ።

**ሄሮድሳ ሀይቁዋ**

18 ሳአይ ዋንቴዳ ዋደ፣ ጳጳርሰ ሀቃ ብድጌደንቶ ገና ዋታዳራቱዋ ግዶን ዳሮ ዋላሳይ ከሴዳ።

19 ሄሮድሰ ጳጳርሳ ኮይሸን፣ እ ጳዬዳ ዋደ፣ ናግያዋንታ ቆሪድ፣ ኤንቱንታ ዋጳና ማላ አዛዜዳ፤ ሄዋጥ ጉይያን፣ ይሁዳጥ ቁሳርያ ዋጲድ፣ ሄዋን አማራዳ ዋድያ ኡቴዳ።

20 ሄሮድሰ ጲሮሳ አሳዉን ሲደና አሳዉ ሎይሉ ሀንቀቲዳ፤ ኤንቱንቱ ጋደ አሳይ ካላ ሄሮድሳ ጋደ አሳጥ ደምያ ድራዉ፣ ኤንቱንቱ እትጥ ግዲድ፣ እ ጎልያ ካቸዋ ብላሰጸሳ ባረንቱ ባጋ ኦሲድ፣ ሰገታና ማላ ዋሳናዉ ሄሮድሳኮ ቤድኖ።

21 ሄሮድሰ ሰንጠቅቴዳ ጋላሰ፣ ባረ ካዉተላ ማዩዋ ማዩድ፣ ካዉተላ ኦይድያን ኡቴድ፣ አሳዉ ሃሳዬዳ።

22 አሳይ፣ “ሀዌ ጸሳ ቃላ፤ አሳ ቃላ ግደና” ያጊደ ኮሻ ዶቂሲደ ሃሳዬዳ።

† 12:15 አ ኪታንቻ- አ ናግያ ኪታንቻ ግደናን አገና ጉሳ።    ‡ 12:17 ያቆባ- ጎዳ እሻ።    § 12:17 እሻቶ- አማንያ ሀራቶ።

23 ሄሮድስ ጸሳ ሶንቸቤና ድራው፥ ሄ ማንእያን ጎዳ ኪታንቻይ ኦ ደቸና፥ ጉጹንያን ሜተቲደ፥ ሀይቂ አጌዳ።

24 ሸን ጸሳ ቃላይ ድጩን ዳር ዳር ቤ።

25 ባርናባሰን ሳኦል ባረንቱ ኦሱዋ ፖሊደ፥ ማርቆሳ ግያ ዮሃንሳ ባረንቱና አኪደ፥ የሩሳላመፕ ሰሜድና።

# 13

ባርናባሰን ሳኦል ጌሻ አያናይ ዶርና፥ ታማርሳናዉ ኪተቲድኖ

1 እንጸክያን ደእያ አማንያ አሳ ግዶን ናባቲነ ታማርሰያዋንቱ ደእኖ፤ ኡንቲንቲካ ባርናባሳ፥ ካረፋ ግያ ሰሞና፥ ቀሬናፕ ዬዳ ሉቅዮሳ፥ ጋድያ ሞድያ ሄሮድሳና \* ድጩዳ ሞናሀነ ሳኦላ።

2 ኡንቲንቲ ኅዳዉ ጎይንሸናነ ጸሞሸን፥ ጌሻ አያናይ፥ “ታን ጴሴዳ ኦሶ ባርናባሳነ ሳኦላ ታዉ ዲማይተ” ያጌዳ።

3 ኡንቲንቲ ጸሜዳዋፕነ ዎሴዳዋፕ ጉይያን፥ ባረንቱ ኩሸያ ባርናባሳ ሶላንነ ሳኦላ ሶላን ዎሊደ፥ ኡንቲንታ የዴድና።

ባርናባሰን ሳኦል ቆጲሮሳ ቤድኖ

4 ሄዋ ድራው፥ ጌሻ አያናይ ኡንቲንታ ኪትና፥ ሴሉቅያ ዎጴድና፤ ሄዋፕ ዎንግርያን ገሊደ፥ ቆጲሮሳ ሃፋን ዶደቲዳሳ ቤድኖ።

5 ኡንቲንቲ ሰልማና ጋኪደ፥ አይሁዳ ዎሳ ጎለቲዋን ጸሳ ቃላ አዴድኖ፤ ኡንቲንታ ማዳናዉ ዮሃንሰ † ኡንቲንቲና ደኤ።

6 ኡንቲንቲ ቆጲሮሳ ሃፋን ዶደቲዳ ሳኦ ኡባ ጳፋ ጋካናዉ ዩዩደ፥ ናብያ እት ዎርዳንቻ፥ አይሁዳ አሳ ባር-የሱሳ ግያ ሻሬቹዎ ደሜድኖ።

7 ሄ ሻሬቹ ጋድያ ሞድያ ሳርግዮሳ ጳዉሎሳ ግያ አከካንቻ ብታንያና ደኤ። ሳርግዮሳ ጳዉሎሳ ባርናባሳነ ሳኦላ ባረኮ ጴሲደ፥ ጸሳ ቃላ ሰሳናዉ ኮዬዳ።

8 ሸን ሻሬቹዎ ኤልማሰ (ግሪክ ቃላን ሄዌ አ ሱንፋ) ጋድያ ሞድያዎ አማኑዎ ድጋናዉ ኮዬደ፥ ኡንቲንቲ ሃሳያ ጳልቄዳ።

9 ሸን ጳዉሎሳ ግያ ሳኦል ባረናን ጌሻ አያናይ ኩሞና፥ ሻሬቹዎ ጫድ ጴሊደ።

10 አ፥ “ላ ሀ ጸላሀያ ካፑዎ ናእዉ፥ ገነተላይ ኡባይነ ኢታተላይ ኡባይ ኩሜዳዎ፥ ጽሎተላ ኡባ ሞርከዉ፥ ጎዳ ኦግያ ሱርያ ጌላይያዎ አግኪ?”

\* 13:1 ሄሮድሳ- ሄሮድ አንትጳሳ ጌተትያ ዎጋ ሄሮድስ ናኦ። ሄዌኔካ ጋለላ ግያ ጋድያ ሞድያዎ። ሉቅ፡ 3:1 ጴልተ። † 13:5 ዮሃንሳ- ሀራ ሱንፋይ ማር. 12:12፥ 25 ጴልተ።

11 በእኔ፤ ሀእ ጎዳ ኩሺ ነ ቦላ ደኤ፤ ኔን ቆቃ ግዳና፤ አማራዳ ዋዲ ጋካናው፡ አዋ ፖኡዋ በአካ” ያጌዳ።

ሄ ማንእያን ሻናቻይን ጳማይ አ አይፍያ ጎዝና፡ ባረ ኩሽያ ኦይቂድ፡ ካለልያ ኡራ ኮዪደ ዩዬዳ።

12 ሄ ዋደ ጋድያ ሞድያዌ ሄዋ በኤዳ ዋደ፡ ጎዳይ ታማርሰያዋን ማላለቲደ አማኔዳ።

ባርናባሰነ ጳውሎስ ጲሲድያን ደእያ አንጾክያ ቤድኖ

13 ጳውሎስነ አናና ደእያዋንቱ ጳፋፕ ደንዲደ፡ ጵንፍልያን ደእያ ጳርገ ዋንግርያን ቤድኖ፤ ዮሃንስ ኡንቱንቱፕ ሻከት፡ ዮሩሳሌሙ ሰሜዳ።

14 ሸን ኡንቱንቱ ጳርገፕ አቋደ፡ ጲሲድያን ደእያ አንጾክያ ጋኬድኖ፤ ሳምባታ ጋላሳን አይሁዳ ዋሳ ጎለ ገሊደ ኡቲድኖ።

15 ሙሴ ሀገነ ናባቱዋ ማጻፋይ ናባበቱዳዋፕ ጉይያን፡ አይሁዳ ዋሳ ጎለ ካፓቱ፡ “ኑ እሻቶ አሳ ምንሰያ ቃላይ ሀንተንቶ ደአፕ፡ አሳዉ ሃሳዬርክቱ” ያጊደ ኡንቱንቶ ኪቲድኖ።

16 ጳውሎስ ደንድ ኤቂደ፡ ባረ ኩሽያን ጳርሲደ፡ ሀዋዳን ያጌዳ፤ “እሰራኤልያ አሳቶ፡ ጳሳዉ ያይያዋንቶ ሰሰተ።

17 ሀ እሰራኤልያ አሳ ጳሳይ ኑ አዋቱዋ ዶሪደ፡ ግብጼ ጋድያን አማላተላን ኡንቱንቱ ደእሸን፡ ኡንቱንታ ጮርሴዳ፤ ባረ ዋልቃማ ዋልቃንካ ግብጼ ጋድያፕ ኡንቱንታ ከሴዳ።

18 ባዙዋን ኦይታሙ ላይላ ኬና ኑ አዋቱዋ እ ዳንዳዬዳ።

19 ካናነ ግያ ጋድያን አይሁዳ ግደና ላፑ ካዉተላ ቋይሲደ፡ ኡንቱንቱ ጋድያ ባረ አሳ ላትሴዳ።

20 ሄዋፕ ጉይያን፡ ናብያ ሳሜላ ዋድያ ጋካናው፡ ኦይዱ ጾታነ አሻታሙ ላይላ ኬና ዳናቱዋ ኡንቱንቶ እሜዳ።

21 ሄዋፕ ጉይያን፡ ኡንቱንቱ ባረንቶ ካትያ እማና ማላ ዋሰና፡ ጳሳይ ቢንያማ ዛርያፕ ቂሳ ናእ ሳኦላ ኦይታሙ ላይላዉ ካተታና ማላ፡ ኡንቱንቶ እሜዳ።

22 ጳሳይ ሳኦላ ሻሬዳዋፕ ጉይያን፡ ኡንቱንቱ ቦላ ዳዊተ ካተታና ማላ፡ አ ደንጤዳ፤ ዳዊተባ ማርካቲደ፡ ታን ኮይያ ኡባባ ታ ዋዛናዳን ኦልያ እሰይ ናእ ዳዊታ ደማድ” ያጌዳ።

23 “ጳሳይ፡ ታን ዳዊታ ዛርያፕ እሰራኤልያ አሳ አሸያዋ አሀና፡ ቃላ ገሌዳዋዳንካ፡ የሱሳ አሄዳ።

13:17 ከሳ 1:7፤ 12:51 13:18 ገይ. 14:34፤ ዛረ. 1:31 13:19 ዛረ. 7:1፤ ኢያሳ 14:1 13:20 ዳኤላ 2:16፤ 1 ሳሜላ 3:20 13:21 1 ሳሜላ 8:5፤ 10:21 13:22 1 ሳሜላ 13:14፤ 16:12፤ ማዝ. 89:20

24 የሱስ ያናፕ ካስ እስራኤልያ አሳይ ኡባይ ባረንቱ ናጋራፕ ሰሚደ ጸማቀታና ማላ፣ የሃንስ ቃላ ኦዴዳ።

25 ቃይ የሃንስ ባረ ኦሎቀ ወርሳና ሀኒደ አሳ፣ ታና ኦና ጊደ ቆፒቱ? ታን ሀንተ ናግያዋ ግድከ፤ ሸን በአተ፣ አ ገድያ ጫማ ቃሹቀካ ገድያፕ ብላናዉ ታዉ በሰናዌ ታፕ ጉየና ዬ፣ ያጌዳ።

26 “ታናዳን አማንያዋንቶ፣ አብራሃመ ዘረላቶ፣ ቃይ ሀዋን አይሁዳ ግድናዋንቶ ጸሳዉ ያይያዋንቶ፣ ሀ አቶተላ ቃላይ ኑዉ ኪተቱዳ።

27 አያዉ ጎፕ፣ የሩሳላመን ደእያ አሳይነ ኡንቱንቱ ካፓቱ የሱሳነ ሳምባታ ጋላሳ ኡባን ናባበትያ ናባቱዋ ቃላ እኬክቤና ድራዉ፣ አ ቦላ ፕርዲደ፣ ናባቱዋ ቃላ ፖሌድኖ።

28 የሱሳ ዋድሳናዉ እት ጋሱካ ኡንቱንቶ ቤተናን እጽና፣ ጵላጸስ አ ዋቆና ማላ ዋሴድኖ።

29 “ኡንቱንቱ የሱሳባይ ጸሳ ማጻፋን ጸፈቱዳዋ ኡባ ፖሌዳ ዋደ፣ ማሰቃልያፕ አ ዋሊደ ሞጌድኖ።

30 ሸን ጸሳይ ሀይቁዋፕ የሱሳ ደንሌዳ።

31 ሄዋፕ ጉይያን አ ባረናና ጋለላፕ የሩሳላመ ዬዳ አሳቶ ጮራ ጋላሳ ቤቴዳ ኡንቱንቱ ሀእ አባ አሳዉ ማርካቲኖ።

32 “ጸሳይ ኑ አዋቶ እማና ጌዳ ዋንጋላ ሞሽራቹዋ ኑን ሀንተንቶ ኦዴቶ።

33 ዳዊተ ማዝሙርያ ማጻፋን ላኤንሉ ሸሞፑዋን፣

“ ኔን ታ ናኦ።

ሀቼ ታን ነ አዉዋ ግዳድ፣

ጌተቲደ ጸፈቱዳዋዳን፣ ጸሳይ የሱሳ ደንሌደ፣ ኑ አዋቶ እማና ጌዳዋ ኑዉ ኡንቱንቱ ናናዉ ፖሌዳ።

34 ላኤንሉቀ አ ሀይቀና ማላ፣ ሀይቁዋፕ አ ደንሌዳዋ ጸሳይ፣ ታን ዳዊተዉ እማና ጌዳ አማነቴዳ ጌሻ አንጂዋ ሀንተንቶ እማና፣ ያጊደ ሃሳዬዳ።

35 ሄዋ ድራዉ፣ ማዝሙርያ ማጻፋን ሀራሳን ቃይ፣ ና ጌሻ ናኦ አሃካ ሙሰሳካ፣ ያጌዳ።

36 አያዉ ጎፕ፣ ዳዊተ ባረ ዋድያን ጸሳ ቆፋ ኦሌዳዋፕ ጉይያን ሀይቂደ፣ ባረ አዋቱዋና ሀይቂ ሙሴዳ።

37 ሸን ጸሳይ ሀይቁዋፕ ደንሌዳዌ ሙሰቤና።

38-39 “ሄዋ ድራዉ፣ ታናዳን አማንያዋንቶ፣ ናጋራ አቶ ጌተቱዳዌ ሀንተንቶ የሱሳ ባጋና ኦደቱዳዌነ፣ ሙሴ ሀግያን

ጽላናው ህንተንቶ ዳንዳየተና ኡባባጥ እን አማንያ ኡባይ ጽላናዌ ህንተንቶ ኤረቶ።

40 ሄዋ ድራው፡ ናባቱ ጌዳዌ ህንተ ቦላ ጋከና ማላ ናገትተ፤

41 “ ጸሳይ ጌዳባ ቅሊጫያዋንቶ፡

በእተ፤ ሀራይ አቶ እት ኡራይ ህንተንቶ ኦድንቶካ፡

ህንተ አማንና ኦሱዋ ታን ህንተንቱ ዋድያን፡

ኦሳያ ድራው፡ ፖራ ገተ፤ ሀይቂተ’

ጌድኖ” ያጌዳ።

42 ጳውሎስን ባርናባስ አይሁዳ ዋሳ ጎልያፕ ከሰሸን፡ አሳይ ኡንቱንታ ላኤንሉዋ ሳምባታንካ ሄዋ ጉጂደ ኦዳና ማላ ዋሴድኖ።

43 ሸቄ ላለቲዳዋፕ ጉይያን፡ ጮራ አይሁዳቲነ አይሁዳቲዋ አማኑዋን ገሊደ ጸሳው ያይያ ጮራቱ፡ ጳውሎስን ባርናባስ ካሌድኖ፤ የሱስ ኪቴዳዋንቱ ጸሳ አጼ ኬካተላን ሞን ደአና ማላ፡ ኡንቱንቶ ኦዲደ ሞንሴድኖ።

44 ላኤንሉዋ ሳምባታን አማራዳ አሳቲዋፕ አትን፡ ካታማ አሳይ ኡባይ ጸሳ ቃላ ሰሳናው ሸቄዳ።

45 ሸን አይሁዳቲ ጮራ አሳ በኤዳ ዋደ፡ ጳውሎስ ቃናቴድኖ፤ አ ሃሳያ ጳልቂደ፡ አ ቦሬድኖ።

46 ጳውሎስን ባርናባስ ጸሊደ፡ “ጸሳ ቃላይ ካሰቲደ ህንተንቶ ኦደታናው ኮሸ፤ ሸን ቃላ ህንተ እጼዳ ድራውን መድና ደኡዋ አካናው ህንተንቶ በሰና ጌደ፡ ህንተ ህንተንቱ ሁጲያን ፕርዴዳ ድራው፡ በእተ፡ ኑን አይሁዳ ግደናዋንቲኮ ሰሜቶ።

47 አያው ጎፕ፡ ጎዳይ ኑና፡

“ አሳይ ኡባይ ህንተ ባጋና አታና ማላ፡

ህንተንታ ታን፡

አይሁዳ ግደናዋንቶ ፖኡዋ ኦሳድ’ ያግ አዛዜዳ”

ያጌድኖ።

48 አይሁዳ ግደናዋንቱ ሄዋ ሰሴዳ ዋደ፡ ናሸቲደ ጸሳ ቃላ ቦንቼድኖ፤ ቃይ መድና ደኡ ዶረቴዳ ኡባይ አማኔድኖ።

49 ጎዳ ቃላይ ሄ ጋድያ ኡባ ጋኬዳ።

50 ሸን አይሁዳቲ ጸሳው ጎይንያ ቦንቼቲዳ ማጫዋንታን ካታማን ደአያ ዋልቃማ አሳቲዋ ጳውሎስ ቦላንን ባርናባስ ቦላ ደን፤ ለና፡ አሳቲ ኡንቱንታ የደርሱዋ ዶሚደ፡ ባረንቱ ጋድያፕ ከሴድኖ።

51 ሸን የሱሰ ኪቴዳዋንቱ ኡንቱንታ እጽዮንቶ ማላታ ግዳና ማላ፡ ባረንቱ ገድያፕ ባና ሾጪደ፡ † እቆንዮን ካታማ ቤድኖ።

52 ቃይ እንጾክያን ደእያ ካልያዋንቱንካ ጌሻ አያናይነ ናሽቻይ ኩሚዳ።

# 14

ጳውሎስን ባርናባስ እቆንዮን ቤድኖ

1 ካሰዋዳንካ ጳውሎስን ባርናባስ እቆንዮንን አይሁዳቱዋ ዋሳ ጎላ ገሊደ፡ ቃላ ኦዴድኖ፤ ሄዋፕ ጉይያን ጮራ አይሁዳቱን አይሁዳ ግደናዋንቱ አማኔድኖ።

2 ሸን አማንቤና አይሁዳቱ አይሁዳ ግደናዋንቱ ዋዛና ላሚደ፡ እሻቱዋ ቦላ ሀንቀሌድኖ።

3 የሱሰ ኪቴዳዋንቱ ሄዋን ዳር ዋድያ ጋምኤድኖ፤ ኡንቱንቱ ጎዳባ ያየናን ኦዴድኖ፤ ጎዳይ ማላታን ኦራላባ ኡንቱንቱ ኦላና ማላ፡ ኡንቱንቶ ዋልቃ እሚዳዋን ባረ አቶ ኬካተላ ቃላባይ ቱማ ግዴዳዋ ማርካቱዳ።

4 ሸን ካታማ አሳይ ሻከት፡ ባጋይ አይሁዳቱዋኮ፡ ባጋይ የሱሰ ኪቴዳዋንቱኮ ሰሚድኖ።

5 አይሁዳ ግደናዋንቱን አይሁዳቱ ባረንቱ ካፓቱዋና እትፕ የሱሰ ኪቴዳዋንታ ቆሀናውን ሹቻን ጫዳናው ቆፔዳ ዋደ።

6 የሱሰ ኪቴዳዋንቱ ሄዋ ኤሪደ፡ ልሰጽራን ደርቦ ጌተትያ ልቃኦንያ ካታማቱዋን ኡንቱንቱ ሄራን ደእያ ጋድያ ብ አጌድኖ፤

7 ሄዋን ዋንጋላ ሞሽራቹዋ ኦዲኖ።

8 ባረ ዳይ ኡሉዋፕ የለቶደፕ ደሚደ፡ ላኡ ገዲ ሰልና፡ ኡባካ ሀመተና እት ብታኒ ልሰጽራን ደኤ።

9 ሄ ብታኒ ጳውሎስ ኦድሸን ሰሴ፤ ጳውሎስ አ ጫድ ጾልያ ዋደ፡ ፓጻናው አው አማኑ ደእያዋ በኢደ።

10 ኮሻ ቆቂሲደ አ፡ “ሰት ጋደ ነ ገድያን ኤቃ” ያጌዳ፤ ጉፕ ደንዲደ፡ ሀመታ ደሚዳ።

11 ጳውሎስ ኦሌዳዋ አሳይ በኢደ፡ ባረ ኮሻ ልቃኦንያ ቃላን ቆቆ ኦሊደ፡ “ጸሳቱ አሳ ማላቲደ ኑኮ ዋጴድኖ” ያጌዳ።

12 አሳይ ባርናባሳ፡ “ድያ”\* ገደ፡ ጳውሎስ ሃሳያው ዋናትያ ድራው፡ አ፡ “ሄርሚሳ” ገደ ሱንሌዳ።

† 13:51 ባረንቱ ገድያፕ ባና ሾጪደ፡- ሀዋ አሳይ እከናን እጾዋ በሰያ ኦግያ።

\* 14:12 ድያ፡- ጉሳይ ግሪካቱዋ ጸሳቱዋ ኡባቱዋፕ ቦላ ጌተት ፓይደትያ ኡንቱንቱ ኤቃ።

13 ጌሻ ጎሊ ካታማ ማታን ደእያ ድያ ቄሳይነ አሳይ ኮሩማቱዋን ዳሪ ሎእያ ጨሻቱዋ የሱሰ ኪቴዳዋንቶ ያርሹዋ ያርሻናዉ ኮዪደ። ጥንግያ አሄድኖ።

14 ሸን የሱሰ ኪቴዳ ባርናባሰነ ጳውሎስ ሄዋ ሰሴዳ ዎደ ባረንቱ ማዩዋ ፔዲደ። አሳ ግዶ ዎጺደ።

15 ባረንቱ ኮሻ ቶቁ አሏደ። ሀዋዳን ያጌድኖ፤ “አሳዉ። ሀዋ አያዉ አሏቱ? ኩንካ ሀንተንቱዋዳን መጠቅዳ አሳ፤ ሀ ፓጠና የወዋጥ ሳሉዋነ ሳኣ። አባነ ኡንቱንቱ ግዶን ደእያ ኡባባ መጴዳ ደኡዋ ጸሳኮ ሀንተ ሰማና ማላ። ሀንተንቶ ኩን ዎንጋላ ሞሽራቹዋ ኡዴቶ።

16 እ በን አሳ ዘረላይ ኡባይ ባረንቱ ኦግያ ባና ማላ የድ አጌዳ።

17 ሀንተንቶ እራ ሳሉዋጥ ቡክሴዳ፤ ካላካ እ ዎድያን እሜዳ፤ ቃይ ቁማ እሚደ። ሀንተንታ ሎይሳ ናሸቹ፤ ያቲደ ሀንተንቶ ሎኦባ አሏደ። ኡባ ዎደካ ባረዉ ማርካ ዳይቤና” ያጌድኖ።

18 የሱሰ ኪቴዳዋንቱ ሄዋ ጌደ። ባረንቶ አሳይ ያርሸና ማላ። መቶቲደ ድጌድኖ።

19 አንጾክያጥነ እቆንዮነጥ ዬዳ አይሁዳቱ አሳ ባረንቱ ባጋ ዘሪደ። ሹቻን ጳውሎሳ ጫዴድኖ፤ ኡንቱንቶ ሀይቁዳዋ ማላትና። ካታማጥ ካረዉ አ ጎቾ ከሴድኖ።

20 ሸን ካልያዋንቱ አ ማታን ዩይ አዲደ ኡቁሸን። እ ደንዲደ። ካታማ ገሌዳ። ዎንተላ ጋላሰ ባርናባሳና እትጥ ደርቦ ቤዳ።

**ጳውሎስን ባርናባሰ አንጾክያ ሰሜድኖ**

21-22 ኡንቱንቱ ደርቦ ካታማን ዎንጋላ ሞሽራቹዋ ኡዲደ። ጮራ አሳይ የሱሳ አማናና ማላ ኦሌዳዋጥ ጉይያን። ልሰጽራ። እቆንዮነን ጲሲድያን ደእያ አንጾክያ ሰሜድኖ፤ ያቲደ ሄዋን ካልያዋንታ ሞንሲደነ ኡንቱንቱ አማኑዋን ሞን ደአና ማላ ዘሪደ። “ኩን ጸሳ ካዉተላ ገላናዉ ሎይሳ ዋየታና ሰሴ” ያጌድኖ።

23 ቃይ አማንያዋንቶ ደእያ ሳን ደእያ ሳን ጭማቱዋ ደሪደ። ጸሜዳዋጥነ ዎሴዳዋጥ ጉይያን። ኡንቱንቱ አማኔዳ ጎዳዉ ኡንቱንታ ሀዳራ እሜድኖ።

24 ጲሲድያ ጋድያጥ አዲደ። ጵንፍልያ ዬድኖ፤

25 ጳርገን ቃላ ኡዴዳዋጥ ጉይያን። አጻልያ ቤድኖ።

26 ሄዋጥ ኡንቱንቱ ባረንቱ ፖሌዳ ኦሱዋ ድራዉ። አሳይ ኡንቱንቱ ሀዳራ ጸሳ አጼ ከካተላዉ እሜዳ አንጾክያ ማርካብያን ሰሜድኖ።

14:15 ከሳ 20:11፤ ማዘ. 146:6



27 እንጾክያ ጋኬዳ ዋደ አማንያ አሳ ሺሺደ፡ ጸሳይ ባረንቱና እትጥ አሌዳ ኡባባ፡ አይሁዳ ግደና አሳይ አማናና ማላ፡ ኡንቱንቶ ጥንግያ ደዬዳዋ፡ አሳጧ ኦዴድኖ።

28 ያቲደ ሄዋን ካልያዋንቱና ዳር ዋድያ ጋምኤድኖ።

# 15

## የሩሳላመ ሺቁዋ

1 እት እት አሳቱ ይሁዳጥ እንጾክያ ዋዲደ፡ “ሙሴ ዋጋዳን፡ ህንተ ቃጸረተናዋ ግደጥ፡ አታናጧ ዳንዳይክታ” ያጊደ እሻቱዋ ታማርሱዋ ደሜድኖ።

2 ጳጧሎስነ ባርናባሰ ኡንቱንቱና ዳርሰ ዋላቀቲደ ፓሉመትና፡ እንጾክያን ደእያ እት እት ሀራ አሳቱ ሄ ፓሉማ ድራጧ፡ ጳጧሎሳናነ ባርናባሳና የሩሳላመ ቢደ፡ የሱስ ኪቴዳዋንቱናን ጭማቱዋና ጋከታናጧ ቆፋይ ቃሸቱዳ።

3 አማንያ አሳቱ ኡንቱንታ ከቲደ ኦግያን ማድሸን፡ አይሁዳ ግደናዋንቱ ጸሳኮ ሰሜዳዋ ኦዲደ፡ ጥንቂያናነ ሳማርያና አዲድኖ፤ ሄዌ እሻቱዋ ኡባ ሎይሶ ናሽቼዳ።

4 ኡንቱንቱ የሩሳላመ ጋኬዳ ዋደ፡ አማንያዋንቱ፡ የሱስ ኪቴዳዋንቱን ጭማቱ ኡንቱንታ ሞኬድኖ፤ ጸሳይ ባረንቱን አሌዳዋ ኡባ ኦዴድኖ።

5 ሸን ፓርሳዋቱዋ ባጋጥ አማኔዳ እት እት አሳቱ ደንድ ኤቂደ፡ “ህንተንቱ ኡንቱንታ ቃጸራናጧነ ሙሴ ህግያ ናጋና ማላ አዛዛናጧ በሴ” ያጌድኖ።

6 የሱስ ኪቴዳዋንቱን ጭማቱ ሄዋ ዞረታናጧ ሺቁድኖ።

7 ሎይሶ ሃሳዬዳዋጥ ጉይያን፡ ጳጵርሰ ደንድ ኤቂደ፡ ኡንቱንታ ሀዋዳን ያጌዳ፤ “ታናዳን አማንያዋንቶ፡ አይሁዳ ግደናዋንቱ ዋንጋላ ሞሽራቹዋ ቃላ ታ ደናጥ ሰሲደ አማናና ማላ፡ ታና ጸሳይ ህንተ ግደጥ በን ደራዳዋ ህንተንቱ ኤሪታ።

8 አሳ ዋዛና ኤርያ ጸሳይ ጌሻ አያና ኑጧ እሜዳዋዳን፡ ኡንቱንቶካ እሚደ ቱማዬዳ።

9 ኡንቱንቱ አማኔዳ ድራጧ፡ እ ኡንቱንቱ ዋዛና ጌሺደ፡ ኑ ግዲዋንን ኡንቱንቱ ግዲዋን ዲማተላ ዋሰቤና።

10 ሄዋ ድራጧ፡ ኑ አዎቱን ኑን ቶካናጧ ዳንዳይቤና ዋልቃማ ቶኩዋ ካልያዋንቱ ሞርግያን ዋሊደ፡ ሀእ ህንተ አያጧ ጸሳ ፓጪቱ?

11 ሸን ጎዳ የሱስ ክርስቶስ አጾ ከካተላን ኢንቲንቱ አቴዳዋዳን፣ ኑንካ አቴዳዋ አማኔቶ” ያጌዳ።

12 አሳይ ኡባይ ጮኡ ጊደ፣ ባርናባሰነ ጳውሎስ አይሁዳ ግደና አሳ ግደን ባረንቱ ባጋና ጸሳይ ኦፊዳ ማላታነ ኦራፋባ ኡባ ኦድሽን ሰሴ።

13 ኢንቲንቱ ሃሳያ ዉርሴዳዋፕ ጉይያን፣ ያቆብ ሀዋዳን ያጊደ ዛሬዳ፤ “እሻቶ፣ ታን ግያዋ ሰሰተ።

14 ጸሳይ አይሁዳ ግደናዋንቱ ግደፕ ባረዉ ሀንያ አሳ አካናዉ አይሁዳ ግደናዋንቶ ኮይሮ ዋት ቆፔደንቶ ሰሞን ኦዴዳ።

15-18 ናብያ ቃላይ ሀዋና ጊጌ፤ ጎዳይ ዳሮ ዋድያፕ ዶሚደ፣ አሳ ሀዋ ኤርሲደ፣ ጸሳ ማጸፋን ሀዋዳን ያጌዳ፤

“ ሀዋፕ ጉይያን፣ ሳኣን ደኣያ ሀራ አሳይ ኡባይ፣  
ታዋ ግዳናዉ፣  
ታን ጴሴዳ አይሁዳ ግደና አሳይ ኡባይ፣  
ጎዳ ኮያና ማላ፣ ታን ሰማና።

ታን ኮለቲደ ኩንዴዳ ጎልያዳን፣  
ሀኔዳ ዳዊተ ካዉተላ ደንፋና።

ኮለቲዳዋካ ዛራደ ኬጻና፤  
ታን ላኤንሉዋ አ ኤሳና’  
ያጌዳ።

19 “ሄዋ ድራዉ፣ ታ ቆፋ ግደፕ፣ አይሁዳ ግደናዋንቱፕ ጸሳኮ ሰሞያዋንታ ኑን መቶፋናዉ ኮሸና።

20 ሸን ኢንቲንቱ ኤቃን ቱኔዳዋ ሜና ማላ፣ ዋሹመና ማላ፣ ባኩቲዳ መሀያ አሹዋ ሜና ማላነ ሱፋ ኡሸና ማላ፣ ኢንቲንቶ ኑን ዳብዳቢያ ጸፋናዉ ኮሼ።

21 አያዉ ጎፕ፣ ሙሴ ሀግያ ካሰ የለታፕ ዶሚደ ሳሞባታን ሳሞባታን አይሁዳ ዋሳ ጎለቱዋን ናባቢደ፣ አ ቃላ ካታማ ኡባን ኦድያዋንቱ ደኣና” ያጌዳ።

22 ሄዋፕ ጉይያን፣ የሱስ ኪቴዳዋንቱን ጭማቱ ዋሳ ጎለ አሳ ኡባና እትፕ ባረንቱ ግደፕ አማሬዳ አሳቱዋ ዶሪደ፣ ጳውሎሳናን ባርናባሳና አንጾክያ የዳናዉ ቆፋ ቃቼድኖ፤ ኢንቲንቱ ዳሮ ቦንቼቲዳ ላኡ አሳቱዋ ባርሳባ ጌተትያ ይሁዳነ ሰላሳ ዶሬድኖ።

23 ያቲደ ሀዋዳን ግያ ዳብዳቢያ ጸፊደ፣ ኢንቲንቱ ቦላ ኪቴድኖ፤ “ኑን የሱስ ኪቴዳዋንቱን ጭማቱ ሀንተ እሻቱ፣ አንጾክያን፣ ሶርያንን ክልቂያን ደኣያ አይሁዳ ባጋ ግደና እሻቶ ኑ ሳሮታ ኪቴቶ።

24 “ኑን አዛዝቤና አሳቱ ኑ ግደጥ ቢደ፣ ‘ህንተንቱ ቃጸረታናውን ሙሴ ህግያ ናጋናው በሴ’ ጊደ፣ ህንተንታ መቶሴዳዋን ይሎዬዳዋ ሰሲደ።

25-26 ኑ ጎዳ የሱስ ክርሰቶሳ ሱንላ ድራው፣ ባረንቱ ሸምጥዋ ኦሌዳ ኑን ሲቅያ ባርናባሳናን ጳውሎሳና ዶረቲዳ አሳቱዋ ህንተንቱኮ ኪታናው እት ዋዛናን ኑ ቆፋ ቃቹደ።

27 ሄዋ ድራው፣ ኑን ጳፌዳዋ ኡንቱንቱ ባረንቱ ሁጳው ባረንቱ ደናን ህንተንቶ ኑዳና ማላ፣ ይሁዳነ ሰላሳ ከቲደ።

28-29 “አያው ጎጥ፣ ኤቃው ያርሼዳዋ ሞጥተ፤ ሱላ ኡሸጥተ፤ ባኩቲዳ መሀያ አሹዋ ሞጥተ፤ ዋሹሞጥተ። ሀ ኮሽያዋንቱጥ አትን፣ ሀራ ዴጽያ የወዋ ህንተንታ ቶሰና ማላ፣ ኑንን ጌሻ አያናይ የወዋ ኤኖ ጊደ አኬዶ፤ ሀ ኡባባጥ ህንተ ሁጳያ ናጎጥ፣ ህንተንቱ ሎኦባ ኦሊታ። ሰም ሳሮ ደአተ” ያጌድኖ።

30 ሄዋ ድራው፣ ኪተቴዳዋንቱ ሞይዘት፣ አንጾክያ ዋዲደ፣ አማንያ አሳ ሺሺደ፣ ዳብዳቢያ አሳው እሜድኖ።

31 ኡንቱንቱ ሄ ምንሰያ ዳብዳቢያ ናባቤዳ ዋደ፣ ናሽቲድኖ።

32 ቃይ ይሁዳይነ ሰላስ ባረንቱ ሁጳው ናባቱዋ ግድያ ድራው፣ እሻቱዋ ሎይሰ ማቂደ ምንሴድኖ።

33 ኡንቱንቱ አንጾክያን አማሬዳ ጋላሳ ኡቴዳዋጥ ጉይያን፣ እሻቱ ሳርተላን ሞይዘና፣ ባረንታ ኪቴዳዋንቱኮ ሰሜድኖ።

34 ሸን ሰላስ ያን አታናው ባረ ቆፋ ቃቹዳ። \*

35 ቃይ ጳውሎስን ባርናባስ ሀራ ጮራ አሳቱዋና እትጥ ጎዳ ቃላ ታማርሲደነ ዋንጋላ ምሽራቹዋ ኦዲደ፣ አንጾክያን ኡቴድኖ።

**ጳውሎስን ባርናባስ ሻከቲድኖ**

36 አማሬዳ ጋላሳጥ ጉይያን፣ ጳውሎስ ባርናባሳ፣ “ኑን ጎዳ ቃላ ኦዴዳ ካታማ ኡባን ኑ እሻቱ ዋት ደኢኖንቶ፣ ጉየ ሰሚደ፣ ጸሞስ በአይተ” ያጌዳ።

37 ሄዋጥ ጉየ ባርናባስ ማርቆሳ ጌተትያ ዮሃንሳ ባረንቱና አፋናው ኮዬዳ።

38 ሸን ጳውሎስ ማርቆሳ ባረንቱና አፋናው ኮይቤና፤ አያው ጎጥ፣ እ ኡንቱንቱጥ ጵንፍልያን ሻከቲዳ፤ ቃይ ኡንቱንቱና ኦሶ ብቤና።

39 ኡንቱንቱ ግዲዋን ሎኤና ዋላሳይ ከሰና፣ እቱ እቱዋጥ ሻከቲዳ፤ ባርናባስ ማርቆሳ አኪደ፣ ማርካብያን ቆጲሮሳ ቤዳ።

\* 15:34 ሰላስ አንጾክያን አታናው ባረ ቆፋ ቃቹዳ፣ ግያዌ ጮራ ሀራ ቃላ ብለላን ባዋ።

40 ሸን ጳውሎስ ሰላሳ አክና። እሻቱ አ ሀዳራ ጾሳ አቶ ከካተፋዉ እማዳዋፕ ጉይያን ቤዳ።

41 ያቲደ እማንያ አሳቱዋ ምንሲደ። ሶርያና ክልቂያና አቋዳ።

# 16

## ጽዋቶስ ጳውሎሳና ሰላሰና ጋከቲዳ

1 ጳውሎስ ቃይ ደርበነ ልስጽራ ቤዳ፤ ሄዋን ጽዋቶሳ ጌተትያ ካልያዌ። እት እማንያ አይሁዳ ምሽራት ናአይ ደኤ፤ አ አቡ ግሪክ አሳ።

2 ልስጽራንን እቆንዮንን ደእያ እሻቱ ጽዋቶሳባ ሎይሰ ማርካቲድኖ።

3 ጳውሎስ አ ጽዋቶሳ ባረናና አፋናዉ ኮዬደ። አ አቡ ግሪክ \* አሳ ግዳዳዋ ሄዋን ደእያ አይሁዳ ኡባይ ኤርያ ድራዉ። አ ኦይቂደ ቃጸሬዳ።

4 ኡንቲንቱ ካታማቲዋና ቢደ። የሱስ ኪቴዳ የሩሳላሙን ደእያዋንቲን ጭማቱ ዋጭዳ ሀግያ እማንያዋንቲ ናጋና ማላ። ኡንቲንቶ ኦዲደ አቋድኖ።

5 ሄዋ ድራዉ። እማንያዋንቲ እማኑዋን ምን። ፓይዱዋንካ ጋላሳፕ ጋላሳን ዳር ዳር ቤድኖ።

## ጳውሎስ ማቅዶንያ ባናዳን ጸገቲዳ

6 ኢሰያን ቃላ ኦደና ማላ። ጌሻ አያናይ ኡንቲንታ ድጌዳ ድራዉ። ፕርግያ ጋድያና ጋላትያ ጋድያና አቋድኖ።

7 ኡንቲንቱ ሚሰያ ዛዋ ጋኬዳ ዋደ። ቢታንያ ባናዉ ኮዬድኖ፤ ሸን የሱሳ አያናይ ኡንቲንታ ድጌዳ።

8 ሄዋ ድራዉ። ኡንቲንቱ ሚሰያ ማታና አቋድደ። ጽሮኣዳ ዋቋድኖ።

9 ጳውሎስ ቃማ ሳዳን እት ማቅዶንያ ብታኒ ባረና። “ማቅዶንያ ፕናደ ኑና ማዳርኪ” ያጌደ ኤቂ ዋሰሸን በኤዳ።

10 ሳፃ አ በኤዳዋፕ ጉይያን። ኑን ኤለካ ማቅዶንያ ባናዉ ኮዬደ፤ እያዉ ሳፕ። ዋንጋላ ምሽራቹዋ ያን ደእያ አሳዉ ኦዳናዉ። ጳሳይ ኑና ጸሴዳዋ ኑዉ ማላቲዳ።

## ሊዳ ፕልጽሰዮሳን ክርሰቶሳ እማናዱ

\* 16:3 አ አቡ ግሪክ አ ኦይቂደ ቃጸሬዳ- ግሪክ አሳይ ባረንቱ ናና ቃጸርክኖ። ሸን ጽዋቶስ ቃጸረታና ጳዮፕ። አይሁደ አሳይ አ አከና ድራዉ። ጳውሎስ አ ኦይቂደ ቃጸሬዳ።

11 ሄዋ ድራው፡ ጽሮአዳፕ ደንዲደ፡ ሰት ጊደ ማርካብያን ሳሞትራቀ ቤደ፤ ዋንተላ ጋላስ ናጹለ ቤደ።

12 ሄዋፕ ፕልጽሰዮሳ ቤደ፤ ፕልጽሰዮሰ ማቅዶንያ ቢታው ሁጳ ካታማ፤ ቃይ ሮመ አሳይ ደእያ ካታማ፤ ኑን ሄ ካታማን አማራዳ ጋላሳ ኡቲድ።

13 ሳሞባታ ጋላስ፡ ካታማፕ ጋጸን ሻፋ ዶናን አይሁዳቱ ጸሳ ዋሰያ ሳአይ ደእያዋ አኬኪደ ቤደ፤ ሄዋን ኡቲደ ሺቄዳ ማጫ አሳው ቃላ ኦዴድ።

14 እት ሊድያ ጌተተውና፡ ትያጽርና ካታማፕ ያደ ጸሳ አማነውና፡ ዞኑ ማዩዋ ዛልእያ ሞሽራታ፡ ኑን ኦድያዋ ሰሳዲ፤ ጳውሎስ ኦድያዋካ እዛ ሰሳና ማላ ጸሳይ እ ዋዛና ዶዬዳ።

15 ሊድያ ባረ ሰይ አሳና እትፕ ጸማቀቲዳዋፕ ጉይያን ኑና፡ “ህንተንቱ ታና ጎዳ ቱማተላን አማናው ጊደ ቆፖፕ፡ ታ ሰይን ደእሸተ” ጋደ ዋሳዲ፤ ሞንሳደ ሸባዲ።

**ጳውሎስን ሰላስ ቃሽቲድኖ**

16 ኑን ጸሳ ዋሰያሳ ቢሸን፡ ኢታ አያናይ እዝ ቦላ አቅና ካይያ እት ቆማ ናታ ኑናና ጋከታዲ፤ ሄ ናታ ካያደ ዳር ሚሻ ባረ ጎዳቶ ደማዲ።

17 ጋከታደ ጳውሎስን ኑና ካላደ፡ “ሀዋንቱ ህንተንቶ አታና ኦግያ ኦድያዋንቱ፡ ኡባፕ ቦላ ጸሳ አይለቱዋ” ጋደ ኮሻ ቋቄ ኦላደ ሃሳያው።

18 ኡባ ጋላስ ሄዋዳን ጋው፤ ሸን ጳውሎስ ይሎቲደ ጉዮ ሰም፡ ሄ ኢታ አያና፡ “ኔን ኢፕ ከሳና ማላ ዮሱስ ክርሰቶሳ ሱንላን ኔና አዛዛይ” ያጌዳ፤ ሄ ማንእያን ኢታ አያናይ ኢፕ ከሰ አጌዳ።

19 ሸን እዝ ጎዳቱ ባረንቱ ሚሻ ደማና ኦጊ ቆዬዳዋ በኢደ፡ ጳውሎስን ሰላሳ ኦይቂድ፡ ገያ ሳኣን ደእያ ዳናቱዋ ሰንላ ጎቾ ከሴድኖ።

20 ዳናቱዋ ሰንላ ኡንቱንታ አፊደ፡ “ሀዋንቱ አይሁዳ አሳ ግዲደ፡ ኑ ካታማ አሳ ሎይሰ ሙቶሲኖ።

21 ኑን ሮመ ጋድያ አሳ ግዲደ፡ አካናውነ ኦላናው ዋጋ ግደናባ ታማርሲኖ” ያጌድኖ።

22 አሳይ እት ባጋ ግዲደ፡ ጳውሎስን ቦላንን ሰላሳ ቦላ ደንዴዳ፤ ዳናቱካ ኡንቱንቱ ማዩዋ ቃር አኪደ፡ ጸምኣን ኡንቱንታ ሸጫና ማላ አዛዜድኖ።

23 ኡንቱንቱ ዳርሰ ዋዴዳዋፕ ጉይያን፡ ቃሾ ጎልያን ዮጌድኖ። ቃሾ ጎልያ ናግያዌካ ኡንቱንታ ሞንሰ ናጋናዳን አዛዜድኖ።

24 ቃሾ ጎልያ ናግያዌ ሄ አዛዙዋ አኪደ፡ ጳውሎሳነ ሰላሳ ቃሾ ጎልያ ቆልኦ ገልሴዳ፤ ኡንቱንቱ ገድያካ ምላና ጋል ዳራጺደ ቃቼዳ።

25 ሸን ቃማ ብላሄ ግድያ ሄራን ጳውሎሰነ ሰላሰ ጸሳ ዋሲደ፡ ማዘሙርያ የጺደ ጸሳ ጋላቲኖ፤ ቃሸቶ አሳይ ኡንቱንቱ ግያዋ ሰሴ።

26 ቃሾ ጎልያ ጸጹ ቃጸና ጋካናዉ ዋዛና አፍን ቢታይ ዳርሰ ቃጾዳ፤ ሄ ማንእያን ፕንጊካ ኡባይ ደየት አገና፡ ቃሸቱዳ አሳ ኡባ ሳንላላታይ ብለት ዋጂዳ።

27 ቃሾ ጎልያ ናግያዌ ገምእሹዋፕ ሴጎትያ ዋደ፡ ቃሾ ጎልያ ፕንጊካ ኡባይ ደየቲዳዋ በኢደ፡ ቃሸቶ አሳይ ከሰ አኪደ ብድጌዳዋ አዉ ማላትና፡ ባረና ዋቆናዉ ቆፒደ፡ ጨብያ አኩዳ።

28 ሸን ጳውሎሰ ከሻ ቶቁ ኦሊደ፡ “ኔን ኔና አያነ ኦፓፓ፤ አያዉ ሳፕ፡ ኑን ኡባይ ሀዋን ደኤቶ” ያጌዳ።

29 ቃሾ ጎልያ ናግያዌ ጸምፕያ ዋሰ አኪደ፡ ኤላካ ቆልኦ ዋጾዳ፤ ኮኮሪደ ጳውሎሳ ሰንሳንነ ሰላሰ ሰንሳን ጉፋኔዳ፤

30 ኡንቱንታ ካረ ከሲደ፡ “ታ ጎዳቶ፡ ታን አታናዉ አያ ኦላና በሲ?” ያጌዳ።

31 ጳውሎሰነ ሰላሰ አ፡ “ጎዳ የሱሰ ክርሰቶሳ አማና፤ ኔን አታና፤ ነ ሶይ አሳይካ” ያጌድኖ።

32 ኡንቱንቱ አዉነ አ ሶይን ደእያ ኡባዉ ጎዳ ቃላ ኦዴድኖ።

33 ቃማ ሄ ሳትያንካ ቃሾ ጎልያ ናግያዌ ኡንቱንታ አፊደ ኡንቱንቱ ማይላ ሜጨዳ፤ ሄ ማንእያን ባረ ሶይ አሳ ኡባና ጸማቀት አጌዳ።

34 ጳውሎሳነ ሰላሳ ፑደ ባረ ሶይ አፊደ፡ ኡንቱንቶ ቁማ አጫዳ፤ አ ባረ ሶይ አሳ ኡባና ጸሳ አማኔዳ ድራዉ፡ ናሸቱዳ።

35 ዋንትና ዳናቱ፡ “ሄ አሳቱዋ ብላ” ያጊደ፡ ፖልሰያ ካፓቱዋ አኮ ኪቲድኖ።

36 ሄዋፕ ጉየ ቃሾ ጎልያ ናግያዌ፡ “ሀንተንቱ ብለታና ማላ፡ ዳናቱ ታዉ ኪቲድኖ፤ ሰም ሀእ ከሲደ ሳርተላን ቢተ” ያጊደ ሄ ኪታ ጳውሎሳዉ ኦዴዳ።

37 ሸን ጳውሎሰ ሄ ፖልሰያ ካፓቱዋ፡ “ኑን ርመ ጋደ አሳ † ግድሸን፡ ኡንቱንቱ ኑና ፕርዳይ ባይናን አሳ ሰንሳን ዋጂደ፡ ቃሾ

† 16:37 ርመ ጋደ አሳ፡ ርመ ካዉተላን ኤረቲደ ደእያ ጉላ አሳይ ሄ ጋደ አሳቱዋ ጌተቲኖ። ሄዋንቶካ ቃይ ሀራቱዋፕ ዲማትያ ማታይነ ካጫይ ደኤ።

ጎልያን የጌድኖ። ሀእ ኑና ጌማን ከሰ የዲና? ሀነና፤ ኡንቱንቱ ባረንቱ ሁጸጫ ዪድ፣ ኑና ከሰኖ” ያጌዳ።

38 ፖልሰያ ካፓቱ ዳናቶ ሄዋ ኦድና፣ ጳውሎስን ሰላስ ርመ ጋደ አሳ ግዴዳዋ ሰሴዳ ዋደ፣ ያዬድኖ።

39 ሄዋ ድራወ፣ ዳናቱ ዪደ ኡንቱንታ፣ “ኑን ሀንተንታ ናቄዶ” ጌድኖ። ቃሾ ጎልያፕ ካረ ኡንቱንታ ከሲደ፣ ካታማፕ ከሲደ ባና ማላ ዋሴድኖ።

40 ጳውሎስን ሰላስ ቃሾ ጎልያፕ ከሲደ፣ ሊድያ ሶይ ቤድኖ፤ ያን እሻቱዋና ጋከቲደ፣ ኡንቱንታ ሞንሲደ ሄዋፕ ቤድኖ።

# 17

## ተሰሎንቀን ደንዴዳ ዋላሳ

1 ጳውሎስን ሰላስ፣ አምፕጸሊሳናን አጸሎንያና አጲደ፣ ተሰሎንቀ ዬድኖ፤ ተሰሎንቀን አይሁዳ ዋላ ጎሊ ደኤ።

2 ጳውሎስ ባረ ደያዳንካ ያ ገሌዳ፤ ሄዋን ሄዙ ሳምባታ ጋላሳቱዋን ጸሳ ማጸፋቱዋፕ አሳና ሃሳዬዳ፤

3 ክርስቶስ ዋይያ አካናወን ሀይቁዋፕ ደንዳናወ በሰያዋ ኡንቱንቶ ብሊደ ኦዲድነ ቱማ ግዴዳዋካ ኡንቱንታ ኤርሲደ፣ “የሱስ ሀ ታን ሀንተንቶ ኦድያዌ ክርስቶሳ” ያጌ።

4 ኡንቱንቱፕ እቱ እቱ የወ ቱማ ግዴዳዋ አኬኪደ፣ ጳውሎስናን ሰላስና ጋከቲድኖ፤ ሀዋዳንካ፣ ጸሳወ ጎይንያ ጮራ ግሪክ አሳይን ጮራ ቦንቼቲዳ ማጫዋንቱ፣ ጳውሎስናን ሰላስና ጋከቲድኖ።

5 ሽን አይሁዳቱ ቃናቲደ፣ እት እት ኦሱ ባይና ኢታ አሳቱዋ ቆጫፕ ሺሺደ ካታማ አሳ ዋላሴድኖ፤ ጳውሎስን ሰላሳ አሳኮ ከሳና ማላ ኮዪደ፣ ያሶና ጎልያ ደዴድኖ።

6 ጳውሎስን ሰላስ ኡንቱንቶ ቤተናን እጽና፣ ያሶናን እት እት እሻቱዋ ካታማ ካፓቱዋኮ አፊደ፣ “ሀዋንቱ ጋድያ ኡባ መቶጼዳዋንቱ፣ ሀዋካ ዬድኖ።

7 ያትና ያሶን ኡንቱንታ ባረ ሶይን ዋሌዳ፤ ሀዋንቱ ኡባይ፣ “የሱሳ ግያ ሀራ ካቲ ደኤ” ገደ ቄሳረ አዛዙዋ ሞንሲኖ” ያጌደ፣ ኮሻ ጶቁሲደ ሃሳዬድኖ።

8 ሺቄዳ አሳይን ካታማ ካፓቱ ሄዋ ሰሲደ መቶቲድኖ።

9 ካፓቱ ያሶናን ሀራቱዋ ዋሰያን ብሌድኖ።

## ጳውሎስን ሰላስ ቤርያ ቤድኖ

10 አማንያዋንቱ ጳውሎስን ሰላሳ ሳአይ ቃምያዋን ኤለካ ቤርያ የዴድኖ። ያ ጋኪደ፣ አይሁዳ ዋላ ጎሊ ገሌድኖ።

11 ቤርያ አሳቱ ተሰሎንቀን ደእያ አሳቱዋጥካ እቋ ደየቶ ዋዛናይ ደእያ ድራዉ፡ “ጳውሎስ ጌዳዌ ቱመንቶን” ያጊደ፡ ኡባ ጋላስ ጸሳ ማጻፋቱዋ ታማሪደ፡ ቃላ ኩመንጎላ ላሞታን እኬድኖ።

12 ሄዋ ድራዉ፡ ኡንቱንቱፕ ጮራቱ፡ ግሪካቱዋፕ ቦንቹቴዳ ጮራ ማጫዋንቱን ጮራ አቱማ አሳቱ አማኔድኖ።

13 ሸን ተሰሎንቀን ደእያ አይሁዳቱ ጳውሎስ ጸሳ ቃላ ቤርያንካ ኦዳዳዋ ሰሴዳ ዎደ፡ ቤርያ ዪደ፡ አሳ አናና ዋላሴድኖ።

14 ሄዋፕ ጉይያን፡ እሻቱ ኤለካ ጳውሎሳ አባ ማታን የድ አጌድኖ፤ ሸን ሰላሰነ ጽሞቶስ ቤርያን አቱድኖ።

15 ጳውሎሳ ሞይዜዳ አሳቱ አቱና ጋፊድኖ፤ ሄ አሳቱ ሰላሰነ ጽሞቶስ ባረንቶ ዳንዳየቱዳዋዳን፡ ኤለካ ባረኮ ያና ማላ፡ ጳውሎስ ኪቴዳ ኪታ አኪደ፡ ቤርያ ሰሜድኖ።

**ጳውሎስ አቱና ቤዳ**

16 ጳውሎስ አቱናን ሰላሳነ ጽሞቶሳ ናጊደ፡ ካታማን ኤቃይ ኩሜዳዋ በእደ ይሎቴዳ።

17 ሄዋ ድራዉ፡ አይሁዳ ዎሳ ጎልያን አይሁዳቱዋናን ጸሳዉ ጎይንያ አይሁዳ ግደና አሳቱዋና ፓሉመቴ፤ ቃይ ኡባ ጋላስ ገያን ባረናና ጋከትያ አሳናካ ፓሉመቴ።

18 ቃይ ኤፕቆርሳፕ \* እሰጸእክያፕ † ዩዳ እት እት ኤራንቻቱ ጳውሎሳና ፓሉመቴድኖ፤ ኡንቱንቱፕ እቱ እቱ፡ “ሀ ቶፊናይ አያ ሃሳያናዉ ኮዪ?” ያጌድኖ።

ሀራቱ ጳውሎሳ የሱሳባነ ሀይቁዋፕ እ ደንዳዳዋ ባረንቶ ኦድያ ድራዉ፡ “ኦራላ ጸሳቱባ ኦድያዋ ማላቴ” ያጌድኖ።

19-20 ጳውሎሳ ኦይቂደ፡ “ሀ ኔን ታማርሰያ ኦራላ የዉ አየንቶ ኑና ኤርሳርኪ? አያዉ ጎፕ፡ ኔን ኑዉ ኦራላባ ኦዳሳ፤ ሰሞ ሀዌ አየንቶ ኑን ኤራናዉ ኮዪቶ” ያጊደ ጳውሎሳ አርዮሰፓጎሳ ጌተትያሳ አፌድኖ።

21 አቱና አሳይ ኡባይን ሄዋን ደእያ እማላቱ ኦራላባ ሃሳዪድነ ሰሲደ ፔሽያዋፕ አትን፡ ሀራባን ፔሽክኖ።

22 ጳውሎስ አርዮሰፓጎሳን ደእያ ሺቁዋ ሰንጎን ኤቂደ፡ ሀዋዳን ያጌዳ፤ “አቱና አሳቶ፡ ጸሳቶ ኡባባን ሀንተንቱ ዳሪ ያይያዋ ታን በእይ።

\* 17:18 ኤፕቆርሳ፡ ሀዌ ጋድያ ግዲደ፡ ሀ ጋድያን ደእያ አሳቱ ናሸቾያ አሳ ደኦ ኮይር ሳእ ኦይቁዳ ያግ ታማርሰያ ኤፕቆርሳ ግያ ብታንያ ትምርትያ ካልያዋንታ።

† 17:18 እሰጸእክያ፡ ሀዌካ ጋድያ ግዲደ፡ ሀ ጋድያ ደእያ አሳቱ፡ ባረና ሞዳሳነ ባረ ቆፋን ካለሰትያዋ አሳይ ታማራና በሴ፡ ያግያ ትምርትያ ታማርሰያ ዜና ያገትያ ብታንያ ትምርትያ ካልያዋንታ።



23 አያው ጎጥ፡ ታን ሀንተንቱ ጎይንያዎ ጸላደ አድሸን፡ ሌረተና ጸሳው፤ ጌተቲደ ጸፈቲዳ ያርሹዋ ሳኣ ቃይ ደማድ፤ ሄዎ ድራው፡ ሀ ሀንተ ኤረናን ጎይንያዎ ታን ሀንተንቶ ኦዳይ።

24 “አላምያን አላምያን ደእያ ኡባባ መጴዳ ጸሳይ ሳሉዋን ሳኣ ጎዳይ፡ አሳይ ኬጾዳ ጌሻ ጎሊያን ደኤና።

25 አየንቶ ፓጮዳ አሳዳን፡ አሳ ኩሽያ እ ጾለና፤ አያው ጎጥ፡ እ ባረ ሁጳው ደኡዋ ሸምጥዋን ኡባባ አሳ ኡባው እሜዳ።

26 ጸሳይ አሳ ዛርያ ኡባ እት ኡራፕ መጴዳ፡ ጋድያ ኡባን ዋሌዳ፤ እ ባረ ሁጳው ኡንቱንቱ ደአና ዋድያን ሳኣ ካሰ ዛዋዬዳ።

27 “እ ሄዎ ኦሌዳዌ ኡንቱንቱ ኦይቂ ኦይቂ ጾሊደ፡ ባረና ኮዩደ፡ ኦን ኤር ደማናዋንቱሻ ግያዋና፤ ግደፕን፡ ጸሳይ ኦፕ ኦሰን ሃኮ ግደና።

28 አያው ጎጥ፡ ሀንተንቱፕ እት እት ኤራንቻቱ፡ ሉን አ ናና፡ ጌዳዋዳን፡ ኦን አን ፓጻ ደኤቶን ቃጸቲቶ።

29 ሰም ኦን ጸሳ ናና ግዴዳ ድራው፡ ጸሳይ አሳ ጭንጨተላንን ቆፋን ዋርቃፕ ዋይ ብራፕ ዋይ ሹቻፕ ኦሰቲዳዋ ማላቲ ያጊደ፡ ቆፓናው በሰና።

30 ሄዎ ድራው፡ ጸሳይ አሳይ ኤርቤና ዋድያ አሌዳ፤ ሸን ሀእ ኡባ ሳን አሳይ ኡባይ ናጋራፕ ሰማና ማላ አዛዜዳ።

31 አያው ጎጥ፡ ጸሳይ ዋድያ ኬር ዋሌዳ፤ ሄ ዋድያን ባረ ዶሬዳ ኡራን ሳኣን ደእያ አሳ ኡባ ቦላ ጽሎ ፕርዳ እ ፕርዳና፤ አሳ ኡባው ሀይቁዋፕ የሱሳ ደንሌዳዋን ሄዎ ቱማዬዳ” ያጊዳ።

32 ኡንቱንቱፕ እት እት አሳቱ ሀይቁዋፕ ደንዲዋባ ጳውሎሳፕ ሰሲደ፡ አ ቦላ ቅሊጮድድና፤ ሸን ሀራ አሳቱ አ፡ “ኦን ሀዋ ኔፕ ጉጂደ ሰሳና ኮዬቶ” ጌድና።

33 ሄዎ ድራው፡ ጳውሎስ ኡንቱንቱ ግደፕ ከሴዳ።

34 ሸን እት እት አቱማ አሳቱ ጳውሎሳና ጋከቲደ አማኔድና፤ ኡንቱንቱ ግዲዋን አርዮሰፓሳን ደእያ ፕርዳ ጎሊ ዳናይ ድናናሰዮሰ፡ ዳማሪሶ ጌተትያ እት ምሽራትና ሀራ አሳቱ ደኤና።

# 18

## ጳውሎስ ቆርንቶሳ ቤዳ

- 1 ሄዋፕ ጉይያን፡ ጳውሎስ አቴናፕ ከሲደ፡ ቆርንቶሳ ቤዳ።
- 2 ሄዋን አቂላ ግያ እት አይሁዳ ብታንያ ደሜዳ፤ አቂላይ ጳንጸሳን የለቲዳ፤ አይሁዳ አሳይ ኡባይ ርመፕ ከሳና ማላ፡

17:24 1 ካታ. 8:27፤ አሳ. 42:5፤ ኪታ 7:48

ቃላወደዮስ አዛዜዳ ድራወ። አማራዳ ዋድያፕ ካሰ። እ ባረ ማቻት ጵርሰቁላና ጸልያፕ ዬዳ፤ ጳውሎስ ኡንቱንቱና ጋከታናወ ቤዳ።

3 አ ኦሱነ ኡንቱንቱ ኦሱ እት ማላ ዲንካንያ ሰካ ግድያ ድራወ። ኡንቱንቱና ኡቲደ። እትፕ ኦሴዳ።

4 ጳውሎስ ሳሞባታ ኡባን አይሁዳቱዋና ግሪካቱዋ አማንላናወ አይሁዳ ዋሳ ጎልያን ፓሉመቱ።

5 ሰላሰነ ጽዋቶስ ማቅደንያፕ ዬዳ ዋደ። ጳውሎስ አይሁዳቶ ዮሱስ ባረ ሁጳወ ክርሰቶሳ ግዴዳዋ ቃላ ኦዲዋ ቶሌዳ።

6 ሽን ኡንቱንቱ ጳውሎሳ ሃሳያ ጳልቁናነ አ ቦርና። ጳውሎስ ባረ ማዩዋፕ ባና ቆቆፊደ። \* “ህንተንቱ ኢታተላይ ህንተንታ ኦይቆ፤ ታን ሄዋን ገልከ፤ ሀዋፕ ህን ባጋን ታን አይሁዳ ግደና አሳኮ ባይ” ያጌዳ።

7 ሄዋፕ ከሲደ። ጳሳወ ጎይንያ ዮሰጸሳ ግያ ብታንያ ሶይ ቤዳ፤ ዮሰጸሳ ጎሊ አይሁዳ ዋሳ ጎልያ ማታን ደኤ።

8 አይሁዳ ዋሳ ጎሊ ካፑ ቃርሰጳስ ባረ ሶይ አሳ ኡባና ጎዳ አማኔዳ፤ ቆርንቶሳ አሳቱዋፕካ ጮራቱ ጳሳ ቃላ ሰሴዳ ዋደ። አማኒደ ጳማቅቲድና።

9-10 ጎዳይ እት ቃማ ሳጸን ጳውሎሳ። “ያዮፓ፤ ኦዳ፤ ጮኡ ጎፓ። ታን ኔና ደእያ ድራወ። ኔና ቆሀናወ ኢታባን የጋና አሳይ ኦንነ ባዋ፤ አያወ ጎፕ። ታወ ሀ ካታማን ጮራ አሳይ ደኤ” ያጌዳ።

11 ጳውሎስ ጳሳ ቃላ አሳ ታማርሲደ። እት ላይላነ ኡሱፑን አገና ኡንቱንቱና ኡቲዳ።

12 ጋልዮስ አካይያ ጋድያ ሞድያ ዋደ። አይሁዳቱ እትፕ ጳውሎሳ ቦላ ደንዲደ። ፕርዳ ጎሊ አ አፊደ።

13 “ሀ ብታኒ ሙሴ ህግያ እጺደ። አሳይ ጳሳወ ጎይናና ማላ ጭሜ” ያጌድና።

14 ጳውሎስ ሃሳያና ህንሽን። ጋልዮስ አይሁዳቱዋ። “አይሁዳቶ። ሄዋ ባላ ኦሱዋ ዋይ ኢታ ናቆ ግድፕ። ታን ህንተንቱባ ዳንዳያደ ሰሳናወ ቦሴ።

15 ሽን ቃላወ ሱንላወነ ህንተ ሁጳ ህግያወ ህንተንቱ ፓሉመቶፕ። ህንተ ሁጳወ ኤርተ፤ ሀዋ ታን ፕርድከ” ያጌዳ።

16 ፕርዳ ጎልያፕ ካረወ ኡንቱንታ ከሴዳ።

\* 18:6 ማዩዋፕ ባና ቆቆፊደ፡- ሀዋ ጉሳይ ገድያፕ ባና ቆቆፍያዋና አታ።

17 ሄዋጥ ጉይያን፣ ግሪክ አሳይ ኡባይ አይሁዳ ዎሳ ጎላ ካፑዋ ሶስተኒሳ ኦይቁደ፣ ፕሮዳ ጎልያ ሰንላን ሾጬድኖ፤ ሽን ጋልዮሳ ሄዌ አይነ መትቤና።

**ጳውሎስ አንጾክያ ቤዳ**

18 ጳውሎስ ዳሮ ዎድያ ቆርንቶሳን ኡቴዳዋጥ ጉይያን፣ እሻቱዋ ሳሮቲደ፣ ጵርስቁልናነ አቁላና ማርካብያን ሶርያ ቤዳ፤ ባረጧ ሸቆዳ ጋሱ ደእያ ድራጧ፣ ክንክርያ ካታማን ባረ ሁጲያ ሜደቲዳ።

†  
19 ኡንቱንቱ ኤፈሶነ ጋኬዳ ዎደ፣ ጳውሎስ ጵርስቁሎነ አቁላ ያን የግ ዬዳ፤ ሽን ባረጧ አይሁዳ ዎሳ ጎላ ገሊደ፣ አይሁዳቱዋና ፓሎመቲዳ።

20 ኡንቱንቱ ባረንቱና ዳሮ ዎድያ ኡታና ማላ ጳውሎሳ ዎሰና እ እጼዳ።

21 ሽን ኡንቱንቱጥ ሻከቲደ፣ “ጸሳይ ጎጥ፣ ላኤንሉዋ ሀንተንቱኮ ሰማና” ያጊደ ኤፈሶናጥ ማርካብያን ቤዳ።

22 ቁሳርያ ጋኬዳ ዎደ የሩሳላመ ቢደ፣ አማንያ አሳ ሳሮቲዳዋጥ ጉይያን፣ አንጾክያ ዎጴዳ።

23 ያን አማራዳ ዎድያ ጋምኢደ ቤዳ፤ ካልያዋንታ ኡባ ሞንሲደ፣ ጋላትያናነ ፕሮግያና አጴዳ።

**አጲሎስ ኤፈሶናነ ቆርንቶሳ ቤዳ**

24 አስክንድርያን የለቲዳ አይሁዳ አሳ እት አጲሎሳ ግያ ሎኦ ሃሳይያዌ ኤፈሶነ ቤዳ፤ ጸሳ ማጻፋቱዋ እ ዳርስ ኤርያ አሳ።

25 ጎዳ ኦግያካ ታማራዳ አሳ፤ ዮሃንሳ ጽንቃታ ጸላላ ኤሪደ፣ አያናነ ባረ ጋርሳን ኤጸቲደ፣ የሱሳባ ሱርሲደ ሃሳዬዳነ ታማርሴዳ።

26 ያቲደ አይሁዳ ዎሳ ጎልያን ያየናን ሃሳያ ደሜዳ። ጵርስቁላይነ አቁላይ እ ኦድያዋ ሰሴዳ ዎደ፣ ባረንቱና ሶይ እ አፊደ፣ ጸሳ ኦግያ ካሰጥ ሱርሲደ፣ አጧ ጌሽ ኦዴድና።

27 አጲሎስ አካይያ ፕናና ኮይና፣ እሻቱ እ ሞንሲደ፣ አካይያን ደእያ ካልያዋንቱ እ ሞካና ማላ፣ ኡንቱንቶ ዳብዳቢያ ጸፊድኖ፤ እ ያ ጋኪደ፣ ጸሳ አጶ ኬካተላን አማንያዋንታ ዳሮ ማዴዳ።

28 አያጧ ጎጥ፣ የሱሰ ባረ ሁጲጧ ክርስቶሳ ግዴዳዋ አይሁዳቶ ጸሳ ማጻፋቱዋ ቆንጭሲደ፣ አሳ ሰንላን ሞንሲደ ኦዴዳ።

† 18:18 ሁጲያ ሜደቲዳ- ጳውሎስ ጉላ ዎድያዎ “ዳማታና” ጊደ ጫቆዳ። ሀዋ ጉሳይ፣ ባረ ሁጲያካ ሜደቲና፤ ዎይንያካ ኡሸና ጉሳ። ሽን እ ጫቆዳ ዎዲ ጧሮደ፣ ባረ ሁጲያ ሜደቲደ ጸሳጧ ያርሹዋ ያርሻናጧ በሴ ጉሳ። 18:18 ፓይ. 6:18

# 19

ጳውሎስ ኤፊሶን ቤዳ

1 እጲሎስ ቆሮንቶሳን ደእሸን፤ ጳውሎስ ቆሞ ባጋና አዲድ፤ ኤፊሶን ቤዳ፤ እት እት ካልያዋንታ ደሜዳ።

2 ጳውሎስ ኢንቱንታ፡ “ህንተንቱ አማኔዳ ዋደ ጌሻ አያና አኬድቲ?” ያጊደ አቼዳ።

ኢንቱንቱ፡ “ቲይት፡ አክባይኮ፤ ሀራይ አቶ፡ ጌሻ አያናይ ደእያዋካ ሰሰባይኮ” ያጌድኖ።

3 ጳውሎስ ኢንቱንታ፡ “ያትና፡ አያን ጸማቀቲድቲ?”\* ያጌዳ። ኢንቱንቱ፡ “ኑን ዮሃንሳ ጽንቃታን ጸማቀቲድ” ያጊደ ዛሬድኖ።

4 ጳውሎስ፡ “ዮሃንስ ባረጥ ጉይያን ይያ የሱስ ክርስቶሳን አሳይ አማናና ማላ፤ አሳዉ ኦዲድ፤ ናጋራጥ ሰምያ ጽንቃታን ጸማቁዳ” ያጌዳ።

5 ኢንቱንቱ ሄዋ ሰሴዳ ዋደ፡ ጎዳ የሱስ ክርስቶሳዉ ግዳናዉ ጸማቀቲድኖ።

6 ጳውሎስ ባረ ኩሽያ ኢንቱንቱ ቦላ ዋሴዳ ዋደ ጌሻ አያናይ ኢንቱንቱ ቦላን ዋድና፡ ዱማ ዱማ ቃላን ሃሳዬድኖ፤ ቃይ ትምቢትያካ ኦይድኖ።

7 ሄዋን ታማን ላኡ አሳቱዋ ግድያዋንቱ ደአኖ።

8 ጳውሎስ አይሁዳ ዋሳ ጎላ ገሊድ፤ ጳሳ ካዉተላባ ፓሉመቲድን አኬክሲድ፤ አሳና ሄዙ አገና ግድያዋ ኬና ያየናን ሃሳዬ።

9 ሸን ኢንቱንቱጥ እቱ እቱ ማካሊድ፤ ጮራ አሳ ሰንላን ጎዳ ኦግያ ቦሪድ አማነናን እጽና፤ ጳውሎስ ኢንቱንቱጥ ሻከት፤ ባረና ካልያዋንታ ባረናና አፌዳ፤ ጽራኖሳ ግያ ትምርተ ጎልያን ኡባ ጋላስ ፓሉመቲ።

10 ጳውሎስ ላኡ ላይላ ጋካናዉ ቃላ ኦይዳ፤ ሄዋ ድራዉ፤ ኢሰያን ደእያ አሳይ ኡባይ፤ አይሁዳቲካ አይሁዳ ግድናዋንቱካ ጎዳ ቃላ ሰሴድኖ።

ጳሳይ ጳውሎሳ ኩሽያን ኦሴዳ ኦራላባ

11 ጳሳይ ጳውሎሳ ባጋና ዱማ ማላታ ኦሴዳ።

12 ሄዋ ድራዉ፡ አሳይ አ ቦላይ ቦቼዳ ማራብያ ዋይ ማዩዋ ሀርጋንቻቶ አፌ፤ ሀርጋንቻቲካ ፓጺኖ፤ ኢታ አያናቲካ ኢንቱንቱጥ ከሲኖ።

\* 19:3 አያን ጸማቀቲድቲ? ሀዋ ጉሳይ ኦ ሱንላን ጸማቀቲድቲ፡ ጉሳ።

13 ኢታ አያናቱዋ ከሲደ ዩይያ አይሁዳቱዋጥ እቱ እቱ፡ “ጳውሎስ ቃላ ኦድያ የሱሳ ሱንሳን ኑን ህንተንታ ከሰተ ጊደ አዛዜቶ” ያጊደ፡ ኢታ አያናቱ ደእያ አሳቱዋ ቦላን ጎዳ የሱሳ ሱንሳ ጸሰ በኤድኖ።

14 ቄሳቱዋ ካጥዋ አሰቁዋ ግያ እት አይሁዳ ብታንያዉ ሄዋ አሌዳ ላፑ ናናይ ደእኖ።

15 ኢታ አያናይ ኡንቱንቶ ዛሪደ፡ “ታን የሱሳ ኤራይ፤ ጳውሎሳካ ኤራይ። ሽን ህንተንቱ ኦኔ?” ያጌዳ።

16 ኢታ አያናይ ደእያ ብታኒ ኡንቱንቱ ቦላ ጉፕ ዋድና፡ ኡንቱንቱ ማሱንጺደ፡ ሄ ጎልያፕ ካሎ ዋጸና ጋካናዉ፡ ዋልቃሚደ ጸኔዳ።

17 ኤፈሶንን ደእያ አይሁዳቱን አይሁዳ ግደናዋንቱ ኡባይ ሄዋ ሰሲደ ኡባይ ዳሮ ያዬድኖ፤ ጎዳ የሱሳ ሱንሳይካ ዳሮ ቦንቼቱዳ።

18 አማንያዋንቱፕ ጮራ አሳቱ ባረንቱ ኦሌዳዋ ፓጺድን ቆንጭያን ኦዲደ ዪኖ።

19 ብትያዋንቱፕ ጮራቱ ባረንቱ ማጻፋቱዋ ሺሺደ፡ አሳ ኡባ ሰንሳን ጉዳድኖ፤ ሄ ማጻፋቱዋ ጋትያ ሄትያ ዋደ፡ እሻታሙ ሻአ ብራ ሳንትሞያ ግዴዳ።

20 ሄዋ ማላ ዋልቃማ ኦግያን ጸሳ ቃላይ ድጨኑ አኬ።

**ኤፈሶን ካታማን ዋላሳይ ደንዴዳ**

21 ሄዋ ፖላቲዳዋጥ ጉይያን ጳውሎስ፡ “ታን የሩሳላሙ ባደ ሮሙካ ቃይ በአናዉ በሴ”፥ ያጊደ፡ ማቅዶንያናን አካይያና አጲደ፡ የሩሳላሙ ባናዉ ቆፋ ቃቼዳ።

22 ቃይ ባረና ማድያዋንቱፕ ላአቱዋ ጽሞቶሳን ኤራሰጸሳ ማቅዶንያ ከቲደ፡ ባረዉ ኢሰያን አማራዳ ዋድያ ጋሞኤዳ።

23 ጎዳ ኦግያ ድራዉ፡ ሄ ዋደ ዳሮ ዋላሳይ ከሴዳ።

24 እያዉ ጎፕ፡ ጸጋራ ብራ ሙሽሲደ ትግ ሙድያ ድመጽሮሳ ግያ እት ብታኒ አርጸሚሰ ጌሻ ጎልያ ሞሰልያ ብራፕ ትግ ትጊደ፡ ኦሳንቻቶ ዳሮ ዋድያ ደሜ።

25 ሄዋንታን ኡንቱንቱዋ ማላ ኦሱዋ አላያዋንታ እትፕ ሺሺደ፡ ሀዋዳን ያጌዳ፤ “አሳዉ፡ ኑ ዱረተሳይ ሀ ኦሱዋና ግድያዋ ህንተ ኤሪታ።

26 ሄዋ ጳውሎስ፡ “አሳ ከሺ ሙዴዳዋንቱ ጸሳቱዋ ግድክኖ” ያጊደ፡ ኤፈሶን ጸላላን ግደናን አማራዳ ጋዳቱዋጥ አትን፡ ኢሰያን ኡባን ጮራ አሳዉ ኦድ አማንሌዳዋ ህንተንቱ በኤድታን ሰሴድታ።

† 19:21 ጳውሎስ ሀዋ እያና ጌሻን ካለሰቲደ ሃሳዬዳዋ።

27 ሎኤናባይ፡ ኑ ኦሱ ካጋታናዋ ጸላላ ግደና፤ ሸን ኢሰያን ደእያ ኡባቱን ሳኣ ኡባን ደእያዋንቱ ጎይንያ ዋልቃማ ጸሳቶ ጌተትያ ኦርጸሚሰ ጌሻ ጎሊ ሲንቼተናን ኦታናዋነ፡ እዝ ዳርተላይ ኩንዳናዋ” ያጌዳ።

28 አሳይ ሄዋ ሰሴዳ ዋደ ሎይሐ ሀንቀቲደ “ኤፈሶን ኦርጸሚሳ ዋልቃማ” ያጌደ ጫቦቴድኖ።

29 ካታማ ኡባን ዋላሳይ ደንዴዳ፤ ጳውሎሳና ሀመትያ ማቅደንያ አሳቱዋ ጋዮሳን ኦርሰጽሮኮሳ ባረንቱና ኦይቂ እኪደ፡ እትፕ ካሳ ሳኣ ዋጾድኖ።

30 ጳውሎሰካ አሳይ ሺቄዳሳ ገላናዉ ኮዬዳ። ሸን ካልያዋንቱ አ ድጌድኖ።

31 ኢሰያ ጋድያ ካፓቱዋፕ ጳውሎሳ ላገላቱዋፕ እቱ እቱ ጳውሎሳዉ ኪቲደ፡ ካሳ ሳኣን ቆንጭያ ከሲደ እ ቤተና ማላ፡ አ ዋሴድኖ።

32 ሺቁዋን ዋላሳይ ደንድና፡ ዳርያ ባጋ አሳይ ሀራይ አቶ አያዉ ሺቄደንቶ ኤረና ድራዉ፡ እቱ እትባዉ ዋላቀትያ ዋደ፡ የኩ ቃይ ሀራባዉ ዋላቀቱ።

33 አይሁዳቱ እሰክንድራ አሐ በሰና፡ እት እት አሳይ እ ሃሳያና ማላ፡ አሳ ግደፕ ሰንላዉ አ አሌዳ፤ አሳይ ጮኡ ጋና ማላ፡ አ ባረ ኩሸያን ጸርሰ በሲደ፡ አሳዉ ሞተታናዉ ኮዬዳ።

34 ሸን እሰክንድረ አይሁዳ አሳ ግዴዳዋ አሳይ ኤሬዳ ዋደ፡ ላኡ ሳተ ግድያዋ ኬና ኡባይ እት ቃላን፡ “ኤፈሶን ኦርጸሚሳ ዋልቃማ” ያጌደ ጫቦቴድኖ።

35 ካታማዉ ጳፈ ግዴዳዌ አሳ ጮኡ ኦሊደ፡ ሀዋዳን ያጌዳ፤ “ኤፈሶን አሳዉ፡ ኤፈሶን ካታማይ ዋልቃማ ኦርጸሚሰሰን ሳሉዋፕ ዋዴዳ ኤቃ ሹቻዉ ኤቃ ጎልያ ናግያዋ ግዴዳዋ ኤረና አሳይ ኦኔ?

36 ሀዋ ካድያ አሳይ ባይና ድራዉ፡ ሀንተንቱ ዋፑ ጋናዉን ድርበናን አጋናዉ በሴ።

37 አያዉ ጎፕ፡ ሀዋንቱ ጌሻ ጎልያ ሚሻ ዉእቤናዋንታ ኑ ጸሳቱዋካ ቦርቤናዋንታ አሄድታ።

38 ሄዋ ድራዉ፡ ድመጽሮሰን አናና ደእያ ኦሳንቻቱ አሳ ሞታናዉ ኮዮፕ፡ ፕርዳ ጎሊ ደያ ደኤ፤ ቃይ ጋድያ ሞድያዋንቱካ ደኢና፤ ኡንቱንቱ ባረንቱ ግድን ሞተቲኖ።

39 ሸን ሀንተ ሀራ የዉዋ ኮዮፕ፡ ሀግያ ሺቁዋን የዉዋ ቃቻና።

40 አያዉ ጎፕ፡ ሀቼ ሀኔዳዋ ሻቢረላ ጌደ፡ ሮመ ጋድያ አሳቱ ኑና ሞታና፤ ሀ ሺቆካ ጋሱ ባይና ድራዉ፡ ኑን ጋሱዋ ኦዳናዉ ዳንዳዮኮ”

41 ያጊደ ሺቁዋ ላሌዳ።

## 20

ጳውሎስ ማቅደንያን ግሪክ ቤዳ

1 ዋላሳይ እርጾዳዋጥ ጉይያን፣ ጳውሎስ ካልያዋንታ አህሲደ ዘራዳ፤ ኡንቱንታ፣ “ሳሩዋን ደእተ” ጊደ፣ ማቅደንያ ባናዉ ከሴዳ።

2 ሄ ጋድያና አዲደ፣ ቃላ ኦዲደ፣ አሳ ሎይል ምንሴዳዋጥ ጉይያን፣ ግሪክ ጋደ ዬዳ።

3 እ ሄዋን ሄዙ አገና ኡቲደ፣ ማርካብያን ሶርያ ባናዉ ቆፕሽን፣ አይሁዳቱ ባረና ዋዳናዉ ኮይያዋ በኢደ፣ ማቅደንያና ጉዩ ሰማናዉ ባረ ቆፋ ቃቹዳ።

4 ጳውሎስ ሞይዜዳዋንቱ፣ ቤርያፕ ጳርሃሳ ናኣ ሶሲጳጽሮሳ፣ ተሰሎንቀፕ አርሰጽሮኮሳን ሰኮንድሳ፣ ደርበፕ ጋዮሳን ኢሰያፕ ትክቆሳን ጽሮፍሞሳ፣ ቃይ ጽሞቶሳ።

5 ሄዋንቱ ሰንጻዉ ቢደ፣ ኑና ጽሮኣዳን ናጊና።

6 ኑን ኡክላ ባላ ጋላሳ ቦንቾዋጥ ጉይያን፣ ፕልጽሰዮሳ ግያ ጋድያፕ ማርካብያን ደንዲደ፣ እቼሹ ጋላሳን ጽሮኣዳን ኡንቱንታ ጋኪደ፣ ያን ላፑ ጋላሳ ኡቴደ።

ጳውሎስ ጽሮኣዳ ቤዳ

7 ኑን ዋጋ ጋላሰ \* ኡክላ መንጻናዉ ሺቅ ደእሸን፣ ጳውሎስ ዋንትና ባናዉ ቆፔዳ ድራዉ፣ ኡንቱንቶ ቃላ ኦዲደ፣ ቃማ ብላሂ ጋካናዉ የዉዋ እዲሴዳ።

8 ኑን ሺቅ ኡቴዳ ፖቅያን ጮራ ጸምፒ ደኤ።

9 ኤዉጽኮሳ ግያ እት ዋዳላይ ማሰኮትያ ቦላ ኡቲደ፣ ዳርሰ ገሞእሹዳ። ጳውሎስ ሃሳያ አዲሴዳ ዋደ፣ ኤዉጽኮሰ ገሞእሹዋን ሀይራዳዌ ሄዘንልያ ፖቅያፕ ሳኣን ኩንዲደ ሀይቄዳዋ አሳይ ደንሴዳ።

10 ሸን ጳውሎስ ዋዲደ፣ አ ቦላ ጉፋኔዳ። አ እድሚደ፣ “ኣ ሸምፑ ከሰቤና ድራዉ ሀርጎፕተ” ያጌዳ።

11 ያቲደ ፑደ ፖቅያ ከሲደ፣ ኡክላ መንጻዲ ሜዳ፤ ሳአይ ዋንታና ጋካናዉ፣ ዳር ዋድያ ሃሳዬዳዋጥ ጉይያን ቤዳ።

12 ዋዳላይ ፓጽና፣ ሶይ አፊደ፣ ዳርሰ ናሸቴድና።

ጳውሎስ ጽሮኣዳፕ ሞሊጸ ቤዳ

\* 20:7 ዋጋ ጋላሰ፡- ግሪክያ ማጻፋን፣ ሳምባታቱዋጥ እቱዋን ያጌ።

13 ሸን ጳውሎስ ባረና ያፕ ኑን ሞካና ማላ፡ ኑዉ ኦዴዳ ድራዉ፡ ካሰቲደ ማርካብያኮ ቢደ፡ አሰሳ ባናዉ ደንዴደ፤ አያዉ ጎፕ፡ ገድያን ባናዉ እ ቆፔዳ ድራዉ ኑና ሄዋዳን አዛዜዳ።

14 እ ኑናና አሰሳን ጋከትና፡ ማርካብያን አ አኪደ ሞጽሊን ዩደ።

15 ዋንተላ ጋላስ ያፕ ማርካብያን ደንዴደ፡ ክዮሳ ሄራ ጋኬደ፤ ቃይ ዋንተላ ጋላስ ሳሞሳ ፕኔደ፤ ትሮግልዮመን አቂደ፡ ዋንትና ሞሊጸ ዩደ።

16 አያዉ ጎፕ፡ ጳውሎስ ኢስያን ዳሪ ጋምኤናን ኤፊሶን ላንቂያና አቆናዉ ባረ ቆፋ ቃቹዳ፤ ባረዉ ዳንዳየቶፕ፡ ጸንጸቆስተ ጌተትያ ጋላስ የሩሳላመ ጋካናዉ ኤሌሌ።

**ጳውሎስ ኤፊሶን ጭማቶ ወርሰላ ሃሳያ ሃሳዬዳ**

17 ጳውሎስ ሞሊጸፕ ኤፊሶን ኪቲደ፡ አማንያ አሳ ካለልያዋንታ ጸግሴዳ።

18-19 ዋሳ ጎለ ጭማቱ ጳውሎሳኮ ዩና፡ ኤንቱንታ እ ሀዋዳን ያጌዳ፤ “ታን ኢስያ ገሌዳ ኮይሮ ጋላሳፕ ደምና፡ ካዉሻተላንን ዳሮ አሮላን ጎደዉ ኦላደ፡ አይሁዳቱዋ ሸቁዋፕ ታና ጋኬዳ ፓጩ ግዴዳ ዋድያ ኡባን ህንተንቱና ዋናደ ደአድታንቶ ህንተንቱ ኤሪታ።

20-21 ናጋራፕ ጸሳኮ ሰምያዋን ኑ ጎዳ የሱስ ክርስቶሳ አማንያዋ አይሁዳቶን አይሁዳ ግደናዋንቶ ማርካታደ፡ ሸቁዋንካ ህንተንቱ ጎለን ጎለንካ ህንተንቶ ኦዳደ ታማርሴዳዋፕ አትን፡ ህንተንታ ጎእያባፕ እትባን ፓጭሳ በይከ።

22 “በእተ፤ ሀእካ ታን ጌሻ አያናዉ አዛዘታደ፡ የሩሳላመባይ፤ ያን ታዉ አዬ ከሳንቶን ኤርከ።

23 ጌሻ አያናይ ቃሹን ዋዬ ታና ናግያዋ ካታማ ኡባን ታዉ ኦዴ።

24 ሸን ታ ዋላ ፖላናዉን ጎዳ የሱስ ክርስቶሳፕ ታን አኬዳ ኡሱዋ ጸሳ አዶ ከካተላ ዋንጋላ ሞሽራቹዋ ማርካትያዋ ፖላናዉ፡ ታ ሸምፑዋ ማደናዋዳን ፓይዳይ።

25 “በእተ፤ ታን ሀእካ ጸሳ ካዉተላባ ኦዳደ፡ ህንተንቱ ኡባ ግደን ዩያድ፤ ሰም ሀዋፕ ሰንላዉ ህንተንቱፕ ኦንን ታና በኤናዋ ኤራይ።

26 ሄዋ ድራዉ፡ ህንተንቱፕ እት ኡራይ ባዮፕካ ታን ሄዋን ገለናዋ ሀቼ ህንተንቶ ጌሻደ ኦዳይ።

27 አያዉ ጎፕ፡ ጸሳይ ኦላናዉ ቆፔዳዋ ኡባ ህንተንቶ አይን አሸናን ኦዳድ።



28 “የሱስ ባረ ሱላን ዎዜዳ ጸሳ አማንያዋንታ ናግተ፤ ቃይ ጌሻ አያናይ ህንተንታ ካፓቱዋ ኦሊደ ሱንሌዳ ዉድያ ኡባነ ህንተንቱ ሁጲያ ናግተ።

29-30 ታን ቤዳዋፕ ጉይያን፥ ዉድያዉ ቃረተና ኢታ ዎራካናቱ ህንተንቱ ግዶ ገላናዋንታ፥ ካልያዋንታ ባረንቱ ጌዲዋ ካለላናዉ ዎርዲዋ ሃሳይያ አሳቱ ህንተንቱ ግዶፕ ደንዳናዋ ኤራይ።

31 ሄዋ ድራዉ፥ ታን ሄዙ ላይላ ቃማነ ጋላሳ አፎላን ህንተንታ ሁጲያን ሁጲያን ምንሰያዋ አጋቤናዋ ቆፒደ ገንጭተ።

32 “ሀእካ ህንተንታ ምንሳናዉነ ጌሻ አሳ ኡባ ግዶን ላትሳናዉ ዳንዳይያ ጸሳዉነ አ አጵ ኬካተላ ቃላዉ ህንተንታ ሀዳራ አማይ።

33 “ታን ኦፐነ ብራ ዎይ ዎርቃ ዎይ ማዩዋ አዎታብይከ፤

34 ታን ሀ ታ ኩሽያን ታናነ ታናና እትፕ ደአያዋንታ ኮሼዳዋ ኦሌዳዋ ህንተንቱ ህንተንቱ ሁጲዉ ኤሪታ።

35 ህንተንቱ ሀዋዳን ዳቡር ኦሊደ፥ ዳቡራንቻቱዋ ማዳናዉነ ጎዳ የሱስ ባረ ሁጲዉ፥ ላክያዋፕ እምያዌ እንጀቱዳዋ፣ ጌዳዋዳን፥ አ ቃላ ህንተንቱ ዎዛና አላናዉ በሰያዋ ታን ጮራ ኦግያን ህንተንታ በሳድ” ያጌዳ።

36 ጳዉሎስ ሄዋ ሃሳይ ዉርሲደ፥ ኡንቱንቱ ኡባና እትፕ ጉልባቲደ፥ ጸሳ ዎሴዳ።

37 ኡንቱንቱ ኡባይ ጳዉሎሳ እድሚደ፥ ዬኪደ የራድኖ።

38 ኡባፕ እ፥ “ታና ላኤንሉዋ ኡባካ በእክታ” ያጌዳ ቃላይ ኡንቱንታ ዳር ቃረላና ማርካብያ ጋካናዉ አ ዋይዜድኖ።

# 21

## ጳዉሎስ የሩሳላጠ ቤዳ

1 ኑን ኤፈሶነ ጭማቱዋፕ ሻከቲደ፥ ቆሳ ጌተትያ ሃላን ደደቶ ሳኣ ዪ እጌደ፤ ዎንትሳ ጋላሰ ሮዳ ጋኬደ፤ ሄዋፕ ጳጵራ ቤደ።

2 ፕንቀ ፕንያ ማርካብያ ደሚደ፥ አን ገሊደ ባናዉ ደንዴደ።

3 ኑን ቆጲሮሳፕ በአናዉ ዳንዳይያሳ ዪደ፥ አዋይ ከሰያሳ ጴልያ ዎደ ቆጲሮሳ ሀድርሳ ባጋ የጊደ፥ ሶርያ ቤደ፤ ሄዋፕ ጉይያን ጲሮሳ ጋኬደ፤ አያዉ ጎፕ፥ ማርካቢ ባረ ጫና ጲሮሳን ዎሌ።

4 ያን ካልያዋንታ ደሚደ፥ ኡንቱንቱና ላፑ ጋላሳ ኡቱደ፤ ጳዉሎስ የሩሳላጠ ቤና ማላ፥ ኡንቱንቱ አዉ አያናን ኦዴድኖ።

5 ኑን ኡንቱንቱና ኡትያ ዎዲ ዉርና፥ ከሲደ ቤደ፤ ኡንቱንቱ ኡባቱ ባረንቱ ማጫዎንቱናን ባረንቱ ናናና እትፕ ካታማፕ ካረዉ ከሳና ጋካናዉ፥ ኑና ሞይዜድኖ፤ ኑን አባ ዶናን ጉልባቲደ፥ ጸሳ ዎሴደ።

6 ሄዋጥ ጉይያን፣ እቱ እቱዋ ሳርቲደ፣ ማርካብያን ገሌደ፤ ኡንቱንቱ ባረንቱ ሶይ ሰሜድኖ።

7 ኑን ከባ ኦግያ ዉርሲደ፣ ጲርሳጥ ጳጳላማይሰ ጋኬደ፤ እሻቱዋ ሳርቲደ፣ ኡንቱንቱ ማታን እት ጋላሳ ፔሼደ።

8 ዋንትሳ ጋላሰ ከሲደ፣ ቁሳርያ ቤደ፤ ዋንጋላ ሞሽራቹዋ ኦድያ ፕልጳሳ ሶይ ጋኪደ፣ ኦ ማታን ኡቴደ፤ የሩሳላመን ዶረቲዳ ላፑናቱዋጥ እ እቱዋ።

9 ፕልጳሳዉ ናባቱዋ ግዴዳ ኦይዱ ዋዶሮ ማጫ ናናቱ ደኢኖ።

10 ኑን ኡንደኔዳ ጋላሳ ኡቴዳ ዋደ፣ ናብያ ኦጋሶሳ ግያ ብታኒ ይሁዳጥ ቁሳርያ ዬዳ።

11 ኑኮ ዪደ፣ ጳዉሎሳ ሳቂያ ኦኪደ ባረ ኩሽያን ባረ ገድያ ቃቺደ፣ “ጌሻ ኦያናይ ግያዌ ሀዋ፤ ሀ ሳቂያ ጎዳ የሩሳላመን ኦይሁዳቱ ሀዋዳን ቃቺደ፣ ኦይሁዳ ግደና ኦሳቶ ኦሊደ እማና” ያጌዳ።

12 ኑን ሄዋ ሰሴዳ ዋደ፣ ኑንን ያን ደኦያ ኦሳቱ ጳዉሎሰ የሩሳላመ ቤና ማላ ዋሴደ።

13 ሸን ጳዉሎሰ ዛሪደ፣ “ህንተንቱ ዬኪደነ ታ ዋዛና ቃረትሲደ ዋኒቱ? ታን ጎዳ የሱሳ ሱንሳ ድራዉ ቃሸታናዋ ጳላላ ግደናን፣ ሀራይ ኦቶ የሩሳላመን ሀይቃናዉካ ገጋ ኡታድ” ያጌዳ።

14 ዘርያ እ ኦከናን እጽና፣ “ጎዳይ ጌዳዌ ሀኖ” ያጌደ ጮኡ ጌደ።

15 ያን ኦማራዳ ዋድያ ጋሞኤዳዋጥ ጉይያን፣ ገገቲደ የሩሳላመ ባናዉ ከሴዳ።

16 ቁሳርያን ደኦያ ካልያዋንቱጥ ኦማራዳዋንቱ ቃይ ኑናና ቤድኖ፤ ኡንቱንቱ ኑን ኦቃናሳ ሞናሶና ግያ ቆጲሮሳ ብታንያ ሶይ ኑና ኦፌድኖ፤ ሞናሶን ዳሮ ዋድያጥ ደሚደ ካልያዋ።

**ጳዉሎሰ የሩሳላመን ያቆባ ኦቹዳ**

17 ኑን የሩሳላመ ጋኬዳ ዋደ፣ እሻቱ ኑና ናሽቻን ሞኬድኖ።

18 ዋንትሳ ጋላሰ፣ ጳዉሎሰነ ኑን ያቆባና ጋከታናዉ ቤድ። ዋሳ ጎላ ጭማቱ ኡባቱካ ደኢኖ።

19 ጳዉሎሰ ኡንቱንታ ሳርቲዳዋጥ ጉይያን፣ ኦይሁዳ ግደና ኦሳ ግደን ባረ ባገና ጳላይ ኦጮዳዋ ኡንቱንቶ ዉርሲደ ኦዴዳ።

20 ኡንቱንቱ ሄዋ ሰሴዳ ዋደ ጳላ ጋላቲደ፣ ጳዉሎሳ ሀዋዳን ያጌድኖ፤ “ኑ እሻዉ፣ ኦይሁዳቱዋ ግደን ጳላ ኦማኔዳዋንቱጥ ኦቹን ሻኦይ ደኢኖንቶ በኦሳ፤ ኡንቱንቱ ኡባይ ሀግያ ሞንሰ ናጊኖ።

21 የሩሳላመ ኦይሁዳቱ፣ ኦይሁዳ ግደናዋንቱ ጋድያን ደኦያ ኦይሁዳ ኡባቱ ባረንቱ ናና ቃጻረና ማላ፣ ዋይ ኦይሁዳቱ ኦሳያዋ

ካለና ማላ፡ ሙሴ ህግያካ ባይዛና ማላ ኔን ታማርሰያዋ ሰሴድኖ።

22 ያትና፡ አዬ ሎኡ? ኔን ዬዳዋ ጮራቱ ሰሰያ ድራው፡ ሺቀናን አግክኖ።

23 “ሄዋ ድራው፡ ሀዋ ኑን ነዉ ኦድያዋ ኦላ፤ እትፕ ሺቁ ደእያ ኦይዱ አሳቱ ኑ ማታን ደእኖ።

24 ኡንቱንታ አካደ ኡንቱንቱና ጌያ፤ ቃይ ኡንቱንቱ ባረንቱ ሁጲያ ሜደታና ማላ፡ ኡንቱንቶ ሚሻ እማ፤ ኡንቱንቱ ኡባይ ነዋ ሲሴዳዌ ቱማ ግደናዋን ኔን ነ ሁጲዉካ ቃይ ሙሴ ህግያ ናጋደ ማራን ደእያዋ ኤራና።

25 “ሸን አማኔዳ አይሁዳ ግደና አሳቱዋ ግደፕ፡ ኡንቱንቱ ኤቃዉ ያርሼዳዋ ሜና ማላን ሱላ ኡሸና ማላ፡ ባኩቲዳ ሙህያ አሹዋ ሜና ማላን ዋሹመና ማላ፡ ኑን የዉዋ ቃቺደ፡ ኡንቱንቶ ዳብዳቢያ ጻፊደ” ያጌድኖ።

26 ሄዋፕ ጉይያን፡ ጳዉሎስ ዋንትሳ ጋላስ አሳቱዋ አኪደ፡ ኡንቱንቱና ጌዬዳ፤ እ ባረንታ ጌሹሳ አዉደ ፖልንቶ ኤርሳናዉን ቃይ ያርሹዋ ሁጲያን ሁጲያን አዉደ እማንቶ ኤርሳናዉ ጌሻ ጎልያ ገሌዳ።

**ጳዉሎስ ጌሻ ጎልያን ኦይቀቲዳ**

27-28 ላፑ ጋላሳይ ዉራና ሀኖደ፡ ኢሰያፕ ዬዳ አይሁዳቱ ጌሻ ጎልያን ጳዉሎሳ በኢደ፡ አሳ ኡባ ሀንቀሲደ፡ “እስራኤልያ አሳዉ፡ ኑና ማድተ፤ እስራኤልያ አሳ፡ ሙሴ ህግያን ሀ ጌሻ ጎልያ እጲደ፡ ኡባ ሳን አሳ ኡባ ታማርሰያዌ ሀ ብታንያ፤ ጉጂደ ቃይ ግሪክ አሳካ ጌሻ ጎልያ ገልሲደ፡ ሀ ጌሻ ሳኦ ቱንሴዳ” ያግ ዋሲደ፡ ጳዉሎሳ ኦይቁድኖ።

29 ኡንቱንቱ ካስ ኤፈሶንን ደእያ ጽሮፍሞሳ ጳዉሎሳና ካታማን በኤዳ ድራው፡ ጌሻ ጎልያ ጳዉሎስ አ ገልሴዳዋ ኡንቱንቶ ማላቲዳ።

30 ካታማ ኡባይ ሻቢረቲዳ፤ አሳይ ኡባይ ሸቂደ ጳዉሎሳ ኦይቁደ፡ ጌሻ ጎልያፕ ካረዉ ጎቾ ከሴዳ፤ ሄ ማንእያን ጌሻ ጎልያ ፕንገቱ ቃሸት አጌድኖ።

31 አሳይ ጳዉሎሳ ዋቆና ሀንሸን፡ “የሩሳላመ ካታማይ ሙለካ ሻቢረት ድጌዳ” ግያ ሃሳያይ ሮመ ጋድያ ኦላ ካፖ ጋኬዳ።

32 ሄ ኦላ ካፑ ዋታዳራቱዋን ጸታቱዋ ካፓቱዋ እትፕ አኪደ፡ ዋጺደ አሳ ቦላ ከሰ ዋጺደ፤ አሳይ ኦላ ካፑዋን ዋታዳራቱዋ በኤዳ ዋደ፡ ጳዉሎሳ ሾጭያዋ ባሽ አጌዳ።

33 ሄ ዋደ፡ ሄ ኦላ ካፑ ሺቅ፡ ጳዉሎሳ ኦይቂደ፡ ላኡ ሳንላላታን ቃሽታና ማላ አዛዚደ፡ እ ኦንንቶን ቃይ እያ ኦፊደንቶን አሳ ኦቼዳ።

34 አሳፕ ባጋይ እትባዉ ዋሰያ ዋደ፡ ባጋይ ሀራባዉ ዋሴ፤ ዋሱ ጮራዳ ድራዉ፡ ኦላ ካፖ ቱሙዋ ኤራናዉ ዳንዳየተናን እጽና፡ ዋታዳራቱ ጳዉሎሳ ባረንቱ ደኢያሳ አፋና ማላ፡ ኦንቱንታ አዛዜዳ።

35 የጲደ ከሰያ ደላ ጳዉሎሰ ጋኬዳ ዋደ፡ አሳ ሱገላ ድራዉ፡ ዋታዳራቱ ኦ ቶኬድኖ።

36 አያዉ ጎፕ፡ ጮራ አሳይ፡ “ኦ ዋቆ!” ያጊድን ዋሲደ ካሌ።

**ጳዉሎሰ ዋቶ ዛሩዋ እሜዳ**

37 ዋታዳራቱ ጳዉሎሳ ባረንቱ ደኢያሳ አፋና ሀንሽን ጳዉሎሰ ኦላ ካፑዋ፡ “ታን ነዉ እትባ ኦደ?” ያጌዳ።

ሄ ኦላ ካፑ ጳዉሎሳ፡ “ኔን ግሪከ ቃላ ኤራይ?”

38 ኔን ሀዋፕ ካሰ ዋደ፡ ዋላሳ ከሳደ ሸዋፑዋ ዋጺዳዋንቱፕ ኦይዱ ሻኦ አሳቱዋ አሳይ ባይና ሙላ ሳኦ ካለፊዳ ግብጹ ብታንያ ግድኪ?” ያጌዳ።

39 ሽን ጳዉሎሰ፡ “ታን አይሁዳ አሳ፤ ቃይ ክልቂያን ደእያ ጸርሴሰን የለቱዳ ሁጳ ካታማን ደእያ አሳ። ሀያና ታና አሳዉ ሃሳይሳርኪ?” ያጌዳ።

40 ኦላ ካፑ ኦ፡ “ሃሳያ” ያግና፡ ጳዉሎሰ የጲደ ከሰያ ደላን ኤቂደ፡ አሳይ ጮኡ ጋና ማላ፡ ባረ ኩሽያን አሳኮ ጸርሴዳ። አሳይ ጮኡ ጊና፡ እብራይስጺ ቃላን ሃሳዪደ፡ ሀዋዳን ያጌዳ።

## 22

1 “ታናዳን አማንያዋንቶ፡ ታ አዋቶ፡ ታን ሀእ ሀንተንቶ ኦድያ የዉዋ ሰሰተ!”

2 ጳዉሎሰ ኦንቱንቶ እብራይስጺ ቃላን ሃሳይያዋ ሰሲደ፡ ካሰፕ ሎይጳ ጮኡ ጊና እ ሀዋዳን ያጌዳ።

3 “ታን ክልቂያን ደእያ ጸርሴሰን የለታደ፡ ሀ ካታማን ጋማልያል ታና ታማርሰና ድጫደ፡ ኦ አዋቱዋ ሀግያካ ሞንሳ ታማራደ፡ ሆቼ ሀንተ ኡባይ ሀንያዋዳንካ፡ ታን ጸሳ የዋ ሴለትያ አይሁዳ አሳ።

4 ታን ማጫ አሳን አቱማ አሳ ኦይቃ ኦይቃደ ቃሾ ጎለን የጌዳ አሳን፡ ሀ ኦግያ ካልያ አሳ ዋጵሳና ጋካናዉ ሙቶጴዳ አሳ።

5 ሀዋዳንካ፡ ቃይ፡ ቁሳቱዋ ኡባቱዋ ካፑነ ጭማ ኡባ ሸቆ ታዋ ማርካታናው ዳንዳዬ፤ ታን ዳማሰቆን ደእያ ኡንቱንቱ እሻቱዋ አይሁዳቶ፡ ኡንቱንቱፕ ዳብዳቢያ አካደ፡ ሄዋን ደእያ አሳቱ ቆሄቲደ ሙረታናዳን፡ የሩሳላመ ኡንቱንታ አሀናው ያ ባድ።

ጳውሎስ ክርስቶሳኮ ስሜዳ ባረ ሰማባ ኦዴዳ  
(9:1-19፤ 26:12-18)

6 “ታን ባደ ዳማሰቆ ማቴዳ ዎደ፡ ሴታ ጋላሳ ግድሽን፡ ቆፐናን ሳሉዋፕ ዎልቃማ ፖኡ ታ ማታን ዩይ አዲደ ፖኡዳ።

7 ታን ሳኣን ኩንዳ ኡታደ፡ ‘ሳኣላ፡ ሳኣላ፡ ታና አያወ የደርሳይ?’ ግያ ቃላ ሰሳድ።

8 “ታን ዛራደ፡ ‘ታ ሳዳወ፡ ኔን ኦኔ?’ ያጋድ።

“ሄዋፕ ጉየ፡ ‘ታን ኔን የደርሰያ ናዝሬትያ የሱሳ ያጌዳ።

9 ታናና እትፕ ደእያዋንቱ ፖኡዋ በኢደ ያዬድኖ፤ ሽን ታወ ሃሳይያዋ ቃላ ሰሰበይክኖ።

10 “ ‘ታ ሳዳወ፡ ታን አያ ኦሎ?’ ያጋድ።

“ሳዳይ ታና፡ ‘ደንዳደ ዳማሰቆ ባ። ኔን ኦላናወ ጸሳይ ቆፐዳ ኡባባይ ነወ ያን ኦደታናዋ’ ያጌዳ።

11 ሄ ዎልቃማ ፖኡዋ ድራወ፡ ታ አይፊ ቆቅና፡ ታናና ደእያ አሳቱ ታ ኩሽያ ኦይቂደ፡ ታና ሳቶና፡ ዳማሰቆ ጋካድ።

12 “ዳማሰቆን ደእያ አይሁዳ ኡባይ ሎይሰ ቦንቶያ እት ሀናንያ ግያ ብታኒ፡ ኑ ሀግያወ አዛዘቲደ፡ ጸሳወ እመቲዳ አሳ።

13 ሀናኒ ታኮ ዩደ፡ ታ ማታን ኤቂደ ታና፡ ‘ታ እሻወ ሳኣላ፡ ጸላ’ ያጌዳ። ታን ሄ ዎደ ሄ ማንእያን አኮ ጸላ አጋድ።

14 “እ ታና ሀዋዳን ያጌዳ፤ ‘ኑ አዎቱዋ ጸሳይ ኔን አ ቆፋ ኤራናወ፡ እ ጽሎ ናኣ በአናወን አ ደናፕካ ሃሳያ ሰሳናወ ኔና ካሰና ደሬዳ።

15 አያወ ሳፕ፡ ኔን በኤዳባነ ሰሴዳባ አሳ ኡባ ሰንላን አወ ማርካታናሳ።

16 ሀእካ አያወ ጋዎአይ? ደንዳደ ጸማቀታ፤ አ ሱንላ ጸሳደ፡ ነ ናጋራፕካ ሜጩታ’ ያጌዳ።

17 “ታን ጉየ የሩሳላመ ሰማደ ጌሻ ጎልያን ዎሰሽን፡ ታ አያናን ግዳድ።

18 ጎዳይ ታና፡ ‘ኤሌላደ፡ የሩሳላመ ከሳ አያወ ሳፕ፡ ኔን ታወ ሀዋን ማርካትያዋ አሳይ አከና’ ያግሽን ታን አ በኣድ።

19 “ታን፡ ‘ታ ጎዳወ፡ አይሁዳ ዎሳ ጎልያ ኡባን ኔና አማንያዎንታ ኦይቃደ ዋዴዳዎን ቃሾ ጎልያን የጌዳዋ ኡንቱንቱ ኤሪኖ።

20 ኡንቱንቱ ነ ማርካ እስጵፋኖሳ ዋድያ ዋድ፡ ታን ሄ የወዋ ኤኖ ጋድ። ቃይ ኡንቱንቱ ሞይያን ኤቃድ፡ ኦ ዋድያዋንቱ ማዩዋ ናጋይ፣ ያጌዳ።

21 “ሳዳይ ታና፡ ታን ኔና አይሁዳ ግደና አሳኮ ሃኮ ሳ ኪትያ ድራዉ ባ፣ ጌዳ” ያጌዳ።

**ጳውሎስ ርመ አሳ ግድያዋ ቆንጭሴዳ**

22 ጳውሎስ ሄ ቃላ ሃሳያና ጋካናዉ አሳይ እ ግያዋ ሰሴ፤ ሄዋጥ ጉይያን፡ ባረንቱ ኮሻ ጶቁ ኦሊደ፡ “ሀዋ ጋድያጥ ጳይሳ፤ እ ደአናዉ በሰና” ያጌድኖ።

23-24 ኡንቱንቱ ዋሰሽን፡ ባረንቱ ማዩዋ ቦላዉ ኦልሺንነ ባና ጫርኩዋን ላልሸን፡ ኦላ ካፑ ዋታዳራቱ ጳውሎሳ ባረንቱ ደኢያሳ አፋና ማላ አዛዜዳ። ቃይ አሳይ አያዉ ሄዋዳን ኦ ቦላ ዋሴድኖንቶ ኤራናዉ፡ ጳውሎሳ ልሱዋን ሾጫና ማላ፡ ኡንቱንታ አዛዜዳ።

25 ሽን ዋታዳራቱ ጳውሎሳ ዳፋዋን ሞንሰ ቃቹዳ ዋድ፡ ጳውሎስ ባረ ማታን ኤቁዳ ጴታቱዋ ካፑዋ፡ “ርመ ጋድያ አሳ ፕርዳይ ባይናን ሾጭያዌ ህንተንቶ ዋጌ?” ያጌዳ።

26 ሄዋ ጴታቱዋ ካፑ ሰሴዳ ዋድ፡ ኦላ ካፑዋኮ ቢደ፡ “ሀ ብታኒ ርመ አሳ፡ ኔን አያ ኦላና ቆጋይ?” ያጌደ ኦቹዳ።

27 ኦላ ካፑ ጳውሎሳኮ ሺቂደ፡ “ኔን ርመ አሴ? ታዉ ኦዳ” ያጌዳ።

ጳውሎስ፡ “ኤ” ያጌዳ።

28 ኦላ ካፑ ጳውሎሳዉ ዛሪደ፡ “ታን ሀ ዛረተላ ዳር ሚሻን ሻማድ” ያጌዳ።

ሽን ጳውሎስ፡ “ታን ሄ ዘረላጥ የለታድ” ያጌዳ።

29 ሄዋ ድራዉ፡ ጳውሎሳ ብዳናዉ ቆፔዳዋንቱ ኤለካ አጥ ሻከት አጌድኖ። ኦላ ካፑካ ጳውሎስ ርመ አሳ ግዴዳዋ ኤራዳ ዋደ ያዬዳ፤ አያዉ ጎጥ፡ ሳንላላታን ኦ ቃሽሰ ዋሴዳ።

**ጳውሎስ አይሁዳቱዋ ሻንጋቱዋኮ ሺቂዳ**

30 ዋንተላ ጋላሰ ኦላ ካፑ፡ አይሁዳቱ ጳውሎሳ አያዉ ሞቲድኖንቶን ጌሺደ ኤራናዉ ኮዪደ፡ ጳውሎሳ ብሌዳ። ያቲደ ቁሳቱዋ ካፓቱን አሳይ ኡባይ ሺቃና ማላ አዛዜዳ፤ ቃይ ጳውሎሳ ዲገ ዋሊደ፡ ኡንቱንቱ ሰንሳን ኤሴዳ።

# 23

1 ጳውሎስ ሄዋን ሺቄዳ አሳ ጫድ ጾሊደ፤ “ታናዳን አማንያዋንቶ፣ ታን ሀቼ ጋካናወካ ጸሳ ሰንላን ታ ደኡዋ ኡባን ትላ ዋዛናን ደኣድ” ያጌዳ።

2 ቄሳቱዋ ኡባቱዋ ካቸ ሀናኒ፣ ጳውሎሳ ደና ባቃና ማላ፣ አ ማታን ኤቄዳዋንታ አዛዜዳ።

3 ጳውሎስ ሄ ዎደ አ፣ “ላ ሀ ቦሽንቻን ኦኬዳ \* ጎዳወ፣ ጸሳይ ኔና ባቃና። ኔን ታ ቦላ ሀግያን ፕርዳናወ ኡታደ፣ ዎጋይ ባይናን ታና ባቃና ማላ አዛዛይ?” ያጌዳ።

4 ጳውሎሳ ማታን ኤቄዳዋንቱ አ፣ “ኔን ጸሳ ቄሳቱዋ ኡባቱዋ ካቸዋ ቦራይ?” ያጌድኖ።

5 ሄዋፕ ጉየ ጳውሎስ፣ “ታናዳን አማንያዋንቶ፣ አ ቄሳቱዋ ኡባቱዋ ካቸዋ ግዴዳዋ ታን ኤራቦይከ፤ አያወ ጎፕ፣ ጎ ጋድያ ዋድያዋ ቦላ ኢታ ቃላ ሃሳዮፓ፣ ጌተቲደ ጸሳ ማጻፋን ጸፈቲዳ” ያጌዳ።

6 ሽን ጳውሎስ ባጋቱ ሳዲቃዋናቱዋ፤ ባጋቱ ፓርሳዋቱዋ ግዴዳዋ በኢደ፣ “ታናዳን አማንያዋንቶ፣ ታን ፓርሳዊያን ፓርሳዊያ ናኣ፤ ‘ሀይቄዳዋንቱ ሀይቄዋፕ ደንዳናዋንታ’ ጋይ ታን ናሽቻን ናግያ ድራወ፣ ኡንቱንቱ ታ ቦላ ፕርዲኖ” ያጌደ፣ ቶቄ አሲደ ሃሳዬዳ።

7 ጳውሎስ ሄዋ ያግና፣ ፓርሳዋቱዋ ግደንነ ሳዲቃዋናቱዋ ግደን ዋላሳይ ከሰና፣ ሺቄዳ አሳይ ላለቲዳ።

8 አያወ ጎፕ፣ ሳዲቃዋናቱ፣ “ሀይቄዳ አሳይ ደንደና፤ ኪታንቻይካ አያናይካ ባዋ” ያጌድኖ፤ ፓርሳዋቱ ቃይ ላኡካ ደኢያዋ አማኒኖ።

9 ዎልቃማ ዋላሳይ ደንዴዳ፤ ፓርሳዋቱዋ ባጋፕ ሙሴ ሀግያ ታማርሰያዋንቱ ደንድ ኤቄደ፣ “ሀ ብታንያ ቦላ አይነ ባላ ደምበይኮ፤ አወ አያናይ ዎይ ኪታንቻይ ሃሳየናን አገና” ያጌደ ፓሉመቲድኖ።

10 ዋላሳይ ዳርና፣ አላ ካቸ ጳውሎሳ ኡንቱንቱ መንፍቅሬላንቶን ግ ያዱደ፣ ባረ ዎታዳራቱ ዎዲደ፣ ኡንቱንቱ ግደፕ አ ኤለካ ከሲደ፣ ባረንቱ ደኢያሳ አፋና ማላ አዛዜዳ።

11 ሄ ቃማ ጎዳይ ጳውሎሳ ማታን ኤቄደ፣ “ጳውሎሳ፣ ኔን ታወ የሩሳላመን ማርካቲዳዋዳን፣ ሮመንካ ማርካታናወ በሴ፤ ሞና፤ አይነ ባዋ” ያጌዳ።

\* 23:3 ቦሽንቻን ኦኬዳ- አት ኡራይ ሎአ ማላታና ማላ ኦሱሳ፣ ሽን ግደና።  
23:5 ከሳ 22:28

**ጳውሎስ ጥቅናዎ አስቲዳ ማቁዋ**

12 ዋንትሳ ጋላስ፡ አይሁዳቱ ጳውሎስ ጥቅና ጋካናዉ፡ ማናዳንነ ኡሸናዳን፡ ጫቀቲደ ገብቲድና።

13 ጳውሎስ ቦላ ሄዋ ማቀቴዳ አሳቱ ኦይታሙዋ፡ ዳሪና።

14 ኡንቱንቱ ቄሳቱዋ ካፓቱዋኮነ ጭማቱዋኮ ዪደ፡ “ኡን ጳውሎስ ጥቅና ጋካናዉ፡ አይነ ባረናዳን፡ ገብት ኡቲደ።

15 ሄዋ ድራዉ፡ ህንተንቱነ ሺቄዳ አሳይ ጳውሎስባ ጌሺደ ብድያዋ ማላቲደ፡ ኦላ ካፑ ኦ ህንተንቱኮ ዲገ ዋላና ማላ ኦቕተ፤ ኡን ኦ ሃ ሺቃናፕ ካስና ኦ ጥቅናዉ ገግ ኡቲደ” ያጌድና።

16 ሸን ጳውሎስ ምቻት ናኦይ ሄ ማቁዋ ሰሴዳ ዋደ፡ ቢደ ዋታዳራቱ ደኢያሳ ገሊደ፡ ጳውሎስዉ ኦዳዳ።

17 ጳውሎስ ጴታቱዋ ካፓቱዋ፡ እቱዋ ጴሲደ፡ “ሀ ናኦ ኦላ ካፑዋኮ ኦፋ፤ ኦላ ሳፕ፡ ኦላ ካፕ ኦ ኦድያዌ ደኤ” ያጌዳ።

18 ሄዋ ድራዉ፡ ጴታቱዋ ካፑ ናኦ ኦላ ካፑዋኮ አፊደ፡ “ቃሾ ጎሊን ደኢያ ጳውሎስ፡ ሀ ናኦይ ነዉ አየንቶ ኦድያባይ ደኢያ ድራዉ፡ ታና ባረኮ ጴሲደ፡ ኦ ኔኮ አሀናዳን፡ ታና ዋሴዳ” ያጌዳ።

19 ኦላ ካፑ ናኦ ኩሸያ ኦይቄደ፡ ዲማ ጋጸ ከሲደ፡ “ኡን ታዉ ኦዳናባይ አዬ?” ያጊደ ኦቼዳ።

20 ናኦይ ኦላ ካፕ፡ “አይሁዳቱ ጳውሎስባ ካስፕ ምንሰ ኦቕያዋ ማላቲደ፡ ኔን ሺቄዋ ኦ ኡትሳናዳን፡ ኔና ዋንት ዋሳናዉ ዘረታ ቃቼድና።

21 ሸን ኔን ኡንቱንቱ ግያዋ ሰሶፓ፤ ኦላዉ ሳፕ፡ ኦይታሙዋ፡ ዳርያ አሳቱ ጳውሎስ ጥቅና ጋካናዉ፡ ቁማ ማናዳንነ ሃላ ኡሸናዳን፡ ጫቀቲደ ጌመት ኡቲደ ኦ ናጊና፤ ኔን ግያዋ ሰሳናዉ ሀእካ ገብት ኡቲደ ናጊና” ያጌዳ።

22 ሄዋ ድራዉ፡ ኦላ ካፑ ናኦ፡ “ሀ የወዋ ኔን ታና ኤርሴዳዋ ኦስነ ኦደፓ” ያጊደ አዛዜዳዋ፡ ጉይያን፡ ኦ የዴዳ።

**ጳውሎስ ጋድያ ሞድያ ፍልክሳ ሰንላ ሺቄዳ**

23 ኦላ ካፑ ጴታቱዋ ካፓቱዋ፡ ላኡዋ ጴሲደ፡ “ቁሳርያ ባናዉ፡ ላኡ ጴቱ ዋታዳራቱዋ፡ ላፑን ታሙ ፓራ ኦይቄዳ አሳቱዋነ ላኡ ጴቱ ቶራንቻቱዋ ቃማ፡ ሄዙ ሳትያን ገግሰተ፤

24 ጋድያ ሞድያ ፍልክሳኮ ጳውሎስ ሳርተላን ጋላናዉ ቶግሰያ መሀያነ ገግሰተ” ያጊደ፡ ኡንቱንታ አዛዜዳ።

25 ኦላ ካፑ ሀዋዳን ግያ ዳብዳቢያ ጳፊዳ።

26 “ቃላዉደየሳ ሉሰየሳ፤ ጋድያ ሞድያ ቦንቼቴዳ ፍልክሳ፡ ሳርተላይ ነዉ ግደ።



27 አይሁዳቱ ሀ ብታንያ ኦይቂደ ዋቋና ሀንሸን፣ ሮመ ካታማ አሳ እ ግዴዳዋ ኤራደ፣ ዋታዳራቱዋና ጋካደ አ አሻድ።

28 ኡንቱንቱ አ አያዉ ሞቴድኖንቶ ኤራናዉ ኮያደ፣ ዱገ ኡንቱንቱ ሺቆ አ አፋድ።

29 ኡንቱንቱ ባረንቱ ሀግያባ እ ኦቼዳዋ አ ሞቴዳዋፕ አትን፣ አ ዋድሰያ ዋይ ቃሽሰያ ሞቶ ግደና።

30 ኡንቱንቱ ሀ ብታንያ ቦላ ማቀት ኡቴዳ ዝግርሳይ ታና ጋክና፣ ታን ሄ ማንእያን አ ኔኮ የዳ አጋድ፤ አ ሞትያዋንቱካ ቢደ፣ ነ ሰንላን ሞታና ማላ ኦዳድ፤ ሳሮ ደአ” ያጌዳ።

31 ሄዋ ድራዉ፣ ዋታዳራቱ አዛዘቴዳዋዳንካ ጳዉሎሳ አኪደ፣ ቃማ አንትጳጽሪሳ ጋጤድኖ።

32 ዋንትሳ ጋላስ አናና ባና ማላ ፓራ ቶሳ አሳቱዋ ዋሉደ፣ ገድያን ብያዋንቱ ጉየ ዋታዳራቱ ደኢያሳ ሰሜድኖ።

33 ፓራዋንቱ ቂሳርያ ገሊደ፣ ዳብዳቢያ ጋድያ ሞድያዋ እሚደ፣ ጳዉሎሳ አ ሰንላ አጤድኖ።

34 ጋድያ ሞድያዋ ዳብዳቢያ ናባቤዳዋፕ ጉይያን፣ ጳዉሎስ ሀቃ አዉራጃ አሰንቶ አ ኦቼዳ፤ ክልቂያ አሳ እ ግዴዳዋ ኤራዳ ዋደ።

35 “ታን ነባ ኔና ሞትያዋንቱ ይያ ዋደ ሰሳና” ያገደ፣ ዋታዳራቱ ሄሮድሳ ካዉተላ ጎለን አ ናጋና ማላ አዛዘዳ።

# 24

## ጳዉሎሳ አይሁዳቱ ሞቴድኖ

1 እቼሹ ጋላሳፕ ጉይያን፣ ቂሳቱዋ ኡባቱዋ ካቸ፣ ሀናንያ፣ ጭማቱዋናኔ ጳርጳሉሳ ግያ እት ጳባቃና ዱገ ቂሳርያ ዋዴዳ፤ ኡንቱንቱ ጋድያ ሞድያዋ ቦላ ጳዉሎሳ ሞቴድኖ።

2-3 ጳዉሎስ ጴሰቴዳ ዋደ፣ ጳርጳሉስ አ ሀዋዳን ያገደ፣ ሞቴዋ ደሜዳ።

“ቦንቼቴዳ ፍልክሳ፣ ኑን ነ ባጋና ዳሮ ሳሮተላ ደሜደሸን፣ ነ ቆፋን ሀ ጋድያዉ ኡባባን ኡባሳንካ ሎኦ ላሚ ቤትያዋ ኔና ሎይላ ጋላቲደ፣ ሀዋ አኬቶ።

4 ሸን ታን ኔና ጋምኤ□ናን፣ ደያ ግዴዳ ነ ኬካተላን ኑባ ኔን ቃንላን ሰሳና ማላ፣ ኔና ዋሳይ።

5 አያዉ ጎፕ፣ ሀ ብታኒ ቆቦ ግዲደ፣ ሳአ ኡባን ደእያ አይሁዳቱዋ ግድን ዋላሳ ደንጤዳ፣ ናዝራዋቱ ባጋ አሳ ካለሰያዋ ግዴዳዋ ኤራደ።

6 ሀራይ አቶ ጌሻ ጎልያካ ቱንሳናው ኮይሽን አ ኦይቂደ፣ ኑ ህግያዳን፣ አ ቦላ ፕርዳናው ቆፔደ፤

7 ሽን ኦላ ካፑዋ ሉሰኖሰ ዪደ፣ ዋልቃን ኑ ኩሽያፕ አ ዋል አኬዳ።

8 አ ሞትያዋንቱካ ኔኮ ያና ማላ አዛዜዳ፤ ኔን ነ ሁጳው ሀ ብታንያ ብዳደ፣ ኑን አ ሞትያ የወዋ ኡባ ኤራናው ዳንዳያ” ያጌዳ።

9 አይሁዳቱካ ቃይ፣ “ሀ የወ ቱማ” ጊደ፣ አ ቆፋ አኬድኖ።

ጳውሎስ ፍልክሳ ሰንፋን ሞቶ ዛሩዋ እሜዳ

10 ጋድያ ሞድያዌ ጳውሎሳ ያናዳን ወትና፣ እ ሀዋዳን ያጊደ ዛሬዳ፤ “ኔን ዳር ዋድያፕ ደማደ፣ ሀ አሳው ፕርዳደ ደእያዋ ታን ኤራደ፣ ታ የወዋ ናሽቻን ዛራይ።

11 ታን የሩሳላመ ጎይናናው ከሶደፕ ታማነ ላኡ ጋላሳፕ ዳረናዋ ኔን ነ ሁጳው ኤራና ዳንዳያ።

12 አይሁዳቱ ታና ጌሻ ጎልያን ግድና፣ አይሁዳ ዋሳ ጎለን ግድና፣ ካታማን ግድና፣ ኦናናን ፓሉመትሽን ዋይ አሳ ሺሻደ ማቂሽን፣ እት ኡራናን በእበይክኖ።

13 አንቱንቱ ሀእካ ታና ሞትያዋ ሻትማናው ዳንዳይክኖ።

14 “ሽን ታን ሀዋ ነዉ ኦዳይ፤ ታን ሙሴ ህግያን ደእያዋን ናባቱ ጳፌዳ ኡባባ አማናናዳን፣ ኑ አዋቱዋ ጳሳው ኡንቱንቱ ዋርዶ ግያ ኦግያን ጎሽታይ።

15 ሀዋንቱ ባረንቱ ሁጳው፣ ሓሳይ ኡባይ፣ ዋርዶካ ጽሉካ ሀይቁዋፕ ደንዳናዋንታ ግያዋዳን፣ ታንካ ኡንቱንቱ ደንድያዋ ጳሳን ሀደታ ዋላደ አሙዋን ናጋይ።

16 ሄዋ ድራው፣ ታን ቃይ፣ ጳሳ ሰንፋንን አሳ ሰንፋን ኡባ ዋደ፣ ፖኩ ባይና ትላ ዋዛናይ ታዉ ደእና ማላ ሞናይ።

17 “ታን የሩሳላመፕ ከሶደፕ ጮራ ላይላፕ ጉይያን፣ ታ ጋደ ሀይሳው ሚሻ እማናውን ያርሹዋ ያርሻናው የሩሳላመ ባድ።

18 ሄዋ አላሽን፣ አሳይ ሺቀናን፣ ዋሳሳይ ደንደናን፣ ታን ጌሻ ጎልያን ጌይሽን፣ ኡንቱንቱ ታና ደሜድኖ።

19 ሽን ኢሲያፕ ዬዳ እት እት አይሁዳቱ ሄዋን ደእና፤ ኡንቱንቱ ታ ቦላ የወዋ ኮኖፕ፣ ዪደ ታና ነ ቦላን ሞታናው በሴ።

20-21 ዋይ ታን ኡንቱንቱ ግደን ኤቃደ፣ ሳይቄዳዋንቱ ደንዳናዋ አማንያ ድራው፣ ሀቺ ህንተ ሰንፋን ታ ቦላ ፕርዳኖ፣ ጋደ ሃ ጳቂሳደ ሃሳዬዳ እት ቃላፕ አትን፣ ሺቁዋ ሰንፋን ኤቂሽን፣ ታ ቦላ እት ባይዙዋ ደሜዳዋ ግደፕ፣ ሀዋንቱ ባረንቱ ሁጳው ሀዋን ኦዳናዋንታ” ያጌዳ።

22 ሸን ፍልክስ ጸሳ ኦግያባ ጌሽ ኤሬዳ ድራው፡ “ታን ህንተ የወዋ ኦላ ካቸዋ ሉሰዮስ ይያ ዎደ ኦግያ ኦይፋና” ያጊደ፡ ፕርድያ ዎድያ ሰንፋዉ ኬሬዳ።

23 ፍልክስ ቃይ ጳውሎሳ ቃቼናን ናጋና ማላነ ኦ ዳባቱዋፕ ኦንነ ኦዉ ኦሐሽን፡ ዎይ ኦኮ ዪሽን ድገና ማላ፡ ጴታቱዋ ካቸዋ ኦዛዜዳ።

**ጳውሎስ ፍልክሳነ ድሩሰላ ሰንፋ ሸቄዳ**

24 ኦማሬዳ ጋላሳፕ ጉይያን፡ ፍልክስ ኦይሁዳ ኦሳ ዛረ ግዴዳ ባረ ማቻት ድሩሰልና ዪደ፡ ጳውሎሳ ኪት ኦህሲደ፡ የሱስ ክርስቶሳን ኦማንያ ኦግያ ኦ ሃሳይሽን ሰሴዳ።

25 ጳውሎስ ጽሎተላባ፡ ባረ ሁጲያ ናጉዋባነ ያና ፕርዳባ ሃሳይሽን፡ ፍልክስ ያዪደ፡ “ኔን ሀኦዉ ባ፤ ታዉ ሚኬዳ ዎደ፡ ኔና ኪታደ ጴግሳና” ያጊደ።

26 ሄ ዎደ ቃይ ጳውሎስ ብለታናዉ፡ ባረዉ ማጋንጸ ኦማንዴሻ ጊደ ቆፔዳ፤ ሄዋ ድራው፡ ዳሮ ዎደ ኦ ኦህስ ኦህሲደ፡ ኦናና ሃሳይ።

27 ላኡ ላይላ ኩሜዳዋፕ ጉይያን፡ ፍልክሳ ኮታ ጸርቂዮሳ ፕሰጸስ ኦኬዳ። ፍልክስ ኦይሁዳቱዋ ናሽቻናዉ ኮዪደ፡ ቃሾ ጎላን ጳውሎሳ ባሽ ኦኬዳ።

# 25

**ጳውሎስ ርመ ካትያኩ ባረ የወዋ ኦኪደ ባናዉ ኦቼዳ**

1 ፕሰጸስ ኦዉራጃ ገሌዳ ሄዘንሐያ ጋላሳፕ ጉይያን፡ ቂሳርያፕ የሩሳላመ ቤዳ።

2 ያን ቂሳቱዋ ካፓቱነ ኦይሁዳቱዋ ካለሐያዋንቱ ጳውሎሳ ሞቲድኖ።

3 ኡንቱንቱ ጳውሎሳ ዎቆናዉ ኦግያን ቆሰት ኡታናዉ፡ ባረንቶ ሎኦባ ኦሲደ ኦ የሩሳላመ ኦህና ማላ፡ ፕሰጸሳ ዎሴድኖ።

4 ፕሰጸስ ኡንቱንቶ፡ “ጳውሎስ ቂሳርያን ቃሽት ኡቴዳ፤ ታን ታ ሁጳዉካ ኤለካ ያ ጉየ ሰማናዉ ቆፓ ኡታድ።

5 ሄዋ ድራው፡ ኦ ኦየንቶ ባይዜዳዌ ደኦፕ፡ ህንተንቱ ግደን ኦዎትያዋንቱ ታናና ቂሳርያ ቢደ፡ ኦ ሞትኖ” ያጊደ ዛሬዳ።

6 ፕሰጸስ የሩሳላመን ሆሰፑን ዎይ ታሙ ጋላሳፕ ኦኩናን ኡቲደ፡ ቂሳርያ ቤዳ፤ ዎንትሳ ጋላስ ፕርድያሳን ኡቲደ፡ ጳውሎሳ ኦህና ማላ ኦዛዜዳ።

7 እ ጋኬዳ ዎደ፣ የሩሳላመፕ ዬዳ አይሁዳቱ አ ማታን ዩይ ኦቲ ኤቂደ፣ ባረንቶ ሻትማናዉ ዳንዳየተና ዳሮ ዴጾ ሞቱዋ አ ቦላ ዎሴድኖ።

8 ጳውሎስ ሞተቲደ፣ “ታን አይሁዳቱዋ ህግያካ ጌሻ ጎልያካ ሮመ ካትያ ቁሳራካ አይነ ናቃቢይከ” ያጌዳ።

9 ፕሰጸስ አይሁዳቱዋ ናሽቻናዉ ኮዪደ ጳውሎሳ፣ “ፑደ የሩሳላመ ከሳደ፣ ሀ የዉዋባ ያን ታ ሰንላን ኦሽታናዉ ኮያይ?” ያጌደ ኦቹዳ።

10 ሽን ጳውሎስ፣ “ታን ኦሽታናዉ በሰያ ቁሳራ ፕርዳ ጎለን ኤቃድ። ኔንካ ሎይሳ ኤርያዋዳን፣ ታን አይሁዳቱዋ አይነ ናቃቢይከ።

11 ሰዎ ታን ናቁዳዋ ዎይ ሀይቃናዉ በሰያዎ ኦሴዳዋ ግደፕ፣ ሀይቁዋፕ አታና ጊከ፤ ሽን ኡንቱንቱ ታና ሞትያ ሞቱ መላ ግዴዳዋፕ ህን ባጋን፣ ኦንነ ታና ኡንቱንቶ አሊደ እማናዉ ዳንዳየና፤ ቁሳረ ታባ ፕርደ ጋደ ኦቻይ” ያጌዳ።

12 ሄዋፕ ጉይያን፣ ፕሰጸስ ባረናና ዘረትያዋንቱና ዘረት ሰሚደ አ፣ “ኔን ቁሳረ ታባ ፕርደ ጋደ ኦቻዳ፤ ቁሳራኮ ባናሳ” ያጌደ ዛሬዳ።

**ፕሰጸስ ጳውሎሳባ አግርጸና ማቀቱዳ**

13 አማራዳ ጋላሳፕ ጉይያን፣ ካትያ አግሪጳይነ ባርኒቀ ፕሰጸሳ ሳርታናዉ ቁሳርያ ቤድኖ።

14 ያን ኡንቱንቱ ጮራ ጋላሳ ኡት ደእሽን፣ ፕሰጸስ ካትያዉ ጳውሎሳባ ሀዋዳን ያጌደ ኦዴዳ፤ “ሀዋን ፍልክስ ቃቺደ ባሽ ቤዳ እት ብታኒ ደኤ።

15 ታን የሩሳላመን ደእሽን፣ ቁሳቱዋ ካፓቱነ አይሁዳ ጭማቱ አ ቦላ ፕርዳና ማላ፣ ታና ዎሲደ፣ አባ ታዉ ኦዴድኖ።

16 ታን፣ “ሞተቱዳ ኡራይ ባረና ሞትያዋንቱና እትፕ ኤቀናንነ ባረና ሞቱዳ የዎ ዛሩዋ እመናን፣ ኦና ግደፕነ አሊደ እምያዌ ሮመ አሳዉ ዎጋ ግደና’ ያጋደ ኡንቱንቶ ዛራድ።

17 “ሄዎ ድራዉ፣ ኡንቱንቱ ሀዋን ሸቁዳ ዎደ፣ ታን ጋምኤናን ዎንትሳ ጋላስ፣ ፕርዳ ጎለ ገላደ ጳውሎሳ አሀና ማላ አዛዛድ።

18 አ ሞትያዋንቱ ኤቂደ፣ ኢታባን አ ሞተናን አግክኖ ጋደ ታን ቆፔዳዋዳን፣ አይነ አ ሞትቢይክኖ።

19 ሽን ኡንቱንቱ ባረንቱ አማኔዳባንቱባነ ጳውሎስ፣ ‘ፓጸ ደኤ’ ግያ ሀይቁዳ እት የሱሳ ጌተትያ ብታንያባ አናና ፓሉመቱድኖ።

20 ታን ሀ የወዋ ዋታደ ብዳ ደማንታንቶ፣ ቆፋ ቃቹናን ደኣደ፣ ጳውሎስ የሩሳላመ ቢደ፣ ሀ የወዋ ያን ኦሽታናው ኮይንቶን ጋደ ኦ ኦቻድ፤

21 ሸን ጳውሎስ ባረ የወዋ አውግስጶስ ቄሳረ ኦግያ ኦይፋና ጋካናው ናገታናዳን ኦቶና፣ ታን ኦ ቄሳራኮ የዳና ጋካናው፣ ኦ ቃሸታና ማላ አዛዛድ” ያጌዳ።

22 ሄዋፕ ጉየ አግሪጶይ ፕሰጶሳ፣ “ታን ታ ሁጳውካ ቃይ ሄ ብታኒ ግያዋ ሰሳና ኮያይ” ያጌዳ።

ፕሰጶስ ኦ፣ “ኔን ዋንት ኦ ግያዋ ሰሳናሳ” ያጌዳ።

23 ዋንትሳ ጋላስ፣ አግሪጶይን ባርኒቀ ዳር ቦንቹዋን ኦላ ካፓቱዋናን ካታማን ደኣያ ዋልቃማ አሳና ዪደ፣ ፕርዳ ጎለ ገሌድኖ፤ ፕሰጶስ ጳውሎሳ አሀና ማላ አዛዛና አሄድኖ።

24 ፕሰጶስ ሀዋዳን ያጌዳ፤ “ካትያ አግሪጶ፣ ሀዋን ኦናና ደኣያ አሳ ኡባው፣ አይሁዳ አሳይ ኡባይ የሩሳላመንካ ሀዋንካ ዋሲደ፣ ኦህ ሀዋፕ ሰንፋው ፓጻ ደኣናው በሰና’ ያጌደ፣ ታና ዋሴዳ ብታንያ ሀዋ በኢታ።

25 ሸን ኦ አይን ሀይቃናው በሰያዋ ኦጼዳዋ ታን ደማበይከ፤ ኦ ባረ ሁጳው፣ ኦአውግስጶስ ቄሳረ ታባ ፕርዶ ያጋደ ኦቻድ” ጌዳ ድራው፣ ቄሳራኮ ኦ የዳናው ታን ቆፓድ።

26 ታን አባ ታ ጎዳ አውግስጶስ ቄሳረው ጸፋናው ቱሙ የወ ታው አይን ባዋ፤ ሄዋ ድራው፣ ኦ ሎይሶ ኦሸቶዋፕ ጉይያን፣ ታን ጸፍያባ ደማና ማላ፣ ሀንተንቱ ሰንፋ፣ ካትያ አግሪጶ፣ ኡባ ነ ሰንፋ ኦ አሃድ።

27 አያው ጎፕ፣ ቃሸቱዳ ኡራ ኪትያ ዋደ፣ ኦ አያው ሞቴደንቶ፣ ኤርሰናን ጮኡ ግ ባሸያዌ ታው ኤያተፋ ማላቱ” ያጌዳ።

## 26

### ጳውሎስ አግሪጶ ሰንፋን ሃሳዬዳ ሃሳያ

1 አግሪጶይ ጳውሎሳ፣ “ኔን ነባ ሃሳያናው ዳንዳያ” ያጌዳ። ሄ ዋደ ጳውሎስ ባረ ኩሽያ ሞጪደ ሀዋዳን ያግ ዛሬዳ።

2-3 “ካትያ አግሪጶ፣ አይሁዳቱዋ ዋጋን ፓሉማ ኡባ ኔን ሎይፋደ ኤርያ ድራው፣ ታና አይሁዳቱ ሞትያ የወዋ ኡባ ሀቹ ታን ነ ሰንፋን ዛርያዋ ታ ካጫይ ዳርሰ ሎኦ ያጋደ ቆፓይ፤ ሄዋ ድራው፣ ኔን ታ ሃሳያ ሳለተናን ሰሳና ማላ፣ ኔና ዋሳይ።

4 “ታን ናኦተፋፕ ደማደ ታ አሳ ግደንን የሩሳላመን ደኤዳ ታ ደኡዋ አይሁዳ ኡባቱ ካሰፕ ደሚደ ኤሪና።

5 ታን ኮይርፕ ደማደ፡ ኑ አማኑዋ ህግያ ኦፐን ምንሲደ ናግያ ፓርሳዋቱዋ ባጋ ፓርሳዌ ግዳደ ደእያዋ፡ ኡንቱንቱ ማርካታናዉ ኮዮፕ ኤሪና።

6 ታን ሀእካ ጸሳይ ኑ አዋቶ እማና ጌዳዋ ናሸቻን ናግያ ድራዉ፡ ፕርደታናዉ ሀዋን ኤቃይ።

7 ቃይ ታማነ ላኡ ኑ አዋቱዋ ዛራቱ ጸሳዉ ቃማነ ጋላስ ኡባደ ምንስ ጎይኒደ፡ ጸሳይ እማና ጌዳዋ አካናዉ ናሸቻን ናግያ፤ ካትያ አግሪጶ፡ እይሁዳቱ ታና ሞትያዌ ታን ሄዋ ናሸቻን ናግያ ድራሳ።

8 እይሁዳቶ፡ ጸሳይ ሀይቄዳዋንታ ደንሐያዋ እያዉ አማንክቱ?

9 “ታን ታ ሁጳዉካ ናዝሬትያ የሱሳ ኤቀታናዉ በሴ ጋደ ካስ ቆፓድ።

10 ታን የሩሳላሙን ኦሌዳዌ ሀዋ፤ ቄሳቱዋ ካፓቱዋፕ ማታ አካደ፡ ጸሳ አሳቱዋፕ ጮራቱዋ ቃሸሳድ፤ ኡንቱንታ ዋድያ ዋደካ ኡንቱንቱ ሀይቄያዋ ደሳድ።

11 እይሁዳ ዋሳ ጎላ ኡባን ዳር ዋደ ኡንቱንታ ሙራደ፡ ባረንቱ አማኑዋ ኡንቱንቱ አጋና ማላ ጎደታድ፤ ታን ዋጋይ ባይናዋ ኡንቱንቶ ሀንቀታደ፡ ሀራይ አቶ፡ ሀራ ጋድያ ካታማ ጋካናዉካ ኡንቱንታ ሙቶላይ።

ጳውሎስ ባረ ሁጳዉ ክርስቶሳ ዋት አማኔደንቶ ኦዳዳ (9:1-19፤ 22:6-16)

12 “ታን ሀ የዋ ቄሳቱዋ ካፓቱዋፕ ማታን አዛዙዋ አካደ ዳማስቆ ባድ።

13 ካተዉ፡ ታን ሴታ ጋላስ ኦግያን ደእሸን፡ አዋ ፖኡዋፕ ሎይሐ አድያ ፖኡ ታናን ታናና ቤዳዋንታ ዩይ አዲደ፡ ሳሉዋፕ ፖእሸን በኣድ።

14 ኑን ኡባይ ሳኣን ኩንዴዳ ዋደ፡ እብራይስጶ ቃላን፡ ‘ሳኣላ፡ ሳኣላ፡ ታና እያዉ የደሳን ሙቶላይ? ኔን ታና እጹሳን ኔና ቆሃሳ’ ያገደ ታዉ ኦድሸን ሰሳድ።

15 “ያታደ፡ ‘ታ ጎዳዉ፡ ኔን ኦኔ?’ ያጋድ።

“ጎዳይ፡ ‘ታን ኔን የደሳን ሙቶላያ የሱሳ።

16 ሸን ደንዳ ኤቃ፤ አያዉ ጎፕ፡ ሀቼ ኔን ታና ቤኤዳዋን ታን ኔና ሰንላፕ በሳናዋ ሀራንቶ ማርካታና ማላ፡ ታዉ አሐያዋ ኡዳደ ኔና ሱንላናዉ ነዉ ቆንጫድ።

17-18 ኡንቱንቱ ታና አማንና፡ ኡንቱንቱ ናጋራይ አቶ ጌተታናዳን፡ ጸሳይ ደራዳ አሳ ግደን ኡንቱንቱ ባረንቱ ደኢያሳ ደማናዳን፡ ቃይ ጲማፕ ፖኡዋ ሰማናዳንን ጸላህያ ጎዳተላፕካ ጸሳኮ ሰማናዳን፡

ኢንቱንቱ አይፍና ኔን ዶያና ማላ፣ እስራኤልያ አሳጥነ ታን ኔና ኢንቱንቱኮ ኪትያ አይሁዳ ግደናዋንቱ፣ ኔና አሻና ያጌዳ።

19 “ካትያ አግሪጳ፣ ሄዋ ድራው፣ ታው ሳሉዋ፣ ሴቴዳ ሳጸው ታን አዛዘታናዋ እጸበይከ።

20 ሸን ታን ካሰታይ፣ ዳማስቆንነ የሩሳላመን ሄዋ፣ ጉይያን፣ ይሁዳ ጋድያ ኡባን ደእያዋንቱሰነ አይሁዳ ግደናዋንቶ ሳረንቱ ናጋራ፣ ሰማና ማላ፣ ቃይ ናጋራ፣ ሰማናው በሰያዋ ኦሊደ፣ ጸሳኮ ሰማና ማላ ቃላ ኦዳድ።

21 ሄዋ ድራው፣ አይሁዳቱ ታና ጌሻ ጎልያን ኦይቂደ ዋቆናው ኮዬድና።

22-23 ሄዋ ድራው፣ ታን ጸሳ ማዲዋ አካይ፣ ዳርነ ጉፋው ሆቼ ጋካናውካ ኤቃይ ማርካታይ። ናባቱነ ሙሴ፣ ክርስቶስ ሙቶታናው በሴ፣ ቃይ ሀይቁዋ፣ ኮይሮ ደንዲደ፣ አይሁዳቶነ አይሁዳ ግደናዋንቶ አቶተፋ ፖኤዋ ኦዳናው በሴ፣ ጌዳዋዳን፣ ታንካ ኢንቱንቱ ሃሳዬዳዋ፣ ሀራ እትባነ ሃሳዬዳባይ ባዋ” ያጌዳ።

24 ጳውሎስ ባረንቱባ ሀዋዳን ያጌደ ዛርሸን፣ ፕሰጸስ ኮሻ ቆቁ ኦሊደ አ ሃሳያ ቆባናው፣ “ጳውሎሳ፣ ኔን ጎያ፣ ኔን ዳሪ ታማሬዳዋ ኔና ጎሻና ሀኔ” ያጌዳ።

25 ሸን ጳውሎስ ሀዋዳን ያጌዳ፣ “ቦንቼቴዳ ፕሰጸሳ፣ ታን ቱማተላን ሎኦ የወዋነ ዎዛና ቆፋ ሃሳይያዋ፣ አትን ጎይከ።

26 ታን ካትያ አግሪጳው ሀ የወዋ ቆንጭያን ኦድያዋ እ ኤሬ፣ አያው ጎ፣ ሀ የወ ጌማን ኦሰትቤና ድራው፣ ሀዋ፣ አቱነ አፕ ጌመናዋ ታን ጌሻደ ኤራይ።

27 “ካትያ አግሪጳ፣ ኔን ናባቱ ጌዳዋ አማናይ? ኔን ኢንቱንቱ ጌዳዋ አማንያዋ ታን ኤራይ” ያጌዳ።

28 ካትያ አግሪጳይ ጳውሎሳ፣ “ሀእ ሀ ቃንፋ ዎዳትንካ ታና አማንፋናው ኮያይ?” ያጌዳ።

29 ሄዋ፣ ጉየ ጳውሎስ፣ “ዳሮ ዎደ ግድና፣ ጉፋ ዎደ ግድና፣ ነ ጸላላ ግዳካ፣ ሸን ሆቼ ታን ኦድያዋ ሰሰያ ኡባይ ቃይ ታዋዳን ቃሸቶፕኖ አትን፣ ታ ማላ ግዳናዳን ጸሳ ዎሳይ” ያጌዳ።

30 ሄዋ፣ ጉይያን ካቱ፣ ዎድያ ፕሰጸስ፣ ባርኒቀነ፣ ኢንቱንቱና ደእያ ኡባይ ደንድ።

31 እት ባጋ ሰሚደ፣ እቱ እቱዋና፣ “ሀ ብታኒ ሀይቁሳይ አቶ ሸን፣ ቃሹዋሰካ በሰያባ ኦላቤና” ያግ ሃሳዬድና።

26:22-23 እ.ኤ.አ. 42:6፣ 49:6፣ 1 ቆር. 15:20

32 አገሪዳይ ፕሰጸሳ፡ “ሀ ብታኒ፡ ‘ቄሳሪ ታባ ፕርዶ’ ግቤነንቶ፡ ብለታናዉ ዳንዳዬ ሸን” ያጌዳ።

# 27

## ጳውሎስ ሮሙ ቤዳ

1 ኑን ማርካብያን ጸልያ ባናዉ ቆፕ ኑቴዳ ዎደ፡ ጳውሎሳነ ሀራ አማራዳ ቃሸቴዳ አሳቱዋ አዉግሰጸሳ ዎታዳራቱዋ ግያዋንቱፕ እት ዩልዮሳ ግያ ጸታቱዋ ካፖ አሊደ እሚድኖ።

2 ኢሰያ ጋጸን ደእያ ጋዳቱዋ ብያ አድራሞጽኖና ማርካብያን ገሊደ ቤዳ፤ ማቅዶንያ አሳ ግድያ ተሰሎንቀ አርሰጽሮኮሰ ኑናና ደኤ።

3 ዎንትሳ ጋላሰ ኑን ሲዶና ጋክሸን፡ ዩልዮሰ ጳውሎሳዉ ዳሮፕ አ፡ “ነ ዳባቱ ኔና ኮሸያባ ማዳና ማላ፡ ኔን ኡንቱንቱኮ ባናዉ ዳንዳያ” ያጌዳ።

4 ሄዋፕ ደንዲደ፡ ሰንፋና ኑ ቦላ ጫርክያ ድራዉ፡ ቆጲሮሳ ሃፋን ደደቱዳ ሳኣን ጫርክና ባጋ ቤድ።

5 ክልቂያ ማታንን ጵንፍልያ ማታን ደእያ አባ ፕኒደ፡ ልቅያን ደእያ ሙራ ጋኬድ።

6 ሄዋን ጸታቱዋ ካፑ ጸልያ ብያ እስክንድርያ ማርካብያ ደሚደ፡ እን ኑና ገልሴዳ።

7 ኑን ጮራ ዎድያ ሎዳን ቢደ፡ ዳሮ ሙቱዋን ቀንደሳ ካታማ ጋኬድ፤ ሄዋና ባናዉ ኑና ጫርኩ ድግና ሳልሞናና አዲደ፡ ሃፋን ደደቱዳ ቃርጸሳን ጫርኩዋፕ ተኤቲደ ቤድ።

8 ቃይካ ዳሮ ሙቱዋን ጋጸና ጋጸና አዲደ፡ ላሰያ ካታማ ማታን ደእያ አባ ደናን ማርካቢ ዎፑ ጊደ ሸሞፕያ ሳ ጌተትያሳ ዩድ።

9 ኑን ሄዋን ጮራ ዎድያ ጋሞኤዳዋፕ ጉይያን፡ ጸማይ ብለት ድጊዳ ድራዉ፡ ማርካብያን ብያዌካ ሀርግሸን ጳውሎስ ኡንቱንታ ዘሪደ፡

10 “አሳዉ፡ ኑ ቡሳን ዎልቃማ ቦሻይነ ዳሮ ባሻይ ደአናዌ ታዉ ቤቱ፤ ባሻይ ይያዌ ጫና ቦላነ ማርካብያ ቦላ ጸላላን ግደና፤ ኑ ሸሞፕዋ ቦላካ ያናዋ” ያጌዳ።

11 ሸን ጸታቱዋ ካፑ ጳውሎስ ጌዳዋፕ አሊደ፡ ማርካብያን ደእያዋንታ እዛዝያዌነ ማርካብያ ጎዳይ ግያዋ እማኔ።

12 ሄ አባ ማታ ካታማይ ባልጉዋ ሻጫናዉ ኡንቱንቶ ሚከና ካታማ፤ ሄዋ ድራዉ፡ ጮራ አሳቱ ባሪንቶ ዳንዳዮቶፕ፡ ፕንቀ ግያ ካታማ ጋኪደ፡ ባልጉዋ ያን ሻጫና ማላ፡ ያፕ ደንዳናዉ ዘረቱድኖ፤ ፕንቀን ደእያ ማርካቢ ሸሞፕያ ሚኮ ሳአይ ደዮቴዳዌ፡



አዋይ ወልያሳጥነ ኡሸቻ ባጋጥ ግዲዋን፡ ቃይ ወልያሳጥነ ሀድርሳጥ ግዲዋን።

አባ ቦላን ጎቱ ደንዴዳ

13 አዋይ ከሰያሳ ጾልያ ዋደ ኡሸቻ ዲገሃ ባጋ ጫርኩ ሎዳን ጫርኬዳ ዋደ፡ ባረንቱ ቆፔዳዋዳን ሀኔዳዋ ኡንቱንቶ ማላትና ደንዴድኖ፤ ማርካቢ ቤና ማላ ኮይቂያ ብራታ ፑደ ዳፊደ፡ ቃርጾሳ ማታቲደ፡ ላንቂያና አጴድኖ።

14 ሸን ዳሪ ጋምኤናን፡ “አወራቁሰ”\* ግያ ዳር ዋልቃማ ጎቱ ሃላ ግድን ደእያ ሳኣጥ ዲገ ኡንቱንቱ ቦላ ደንዴዳ።

15 ሄ ጎቱ ማርካብያ ደቺደ አፍን ድግና፡ ባናወ ኑወ ዳንዳየተናን እጾዳ ድራወ፡ ማርካብያ እ አፍያሳ አጊደ ቤደ።

16 ኑን ቁዳ ግያ ሃላን ደደቲዳ ጫርኩዋጥ ጌሜዳ ሳና አጵያ ዋደ፡ ዳርሰ መቶቲደ ማርካብያ ዋንግርያን ናግ አሻናወ ዳንዳዬደ።

17 ኡንቱንቱ ዋንግርያ ፑደ ከሴዳዋጥ ጉይያን፡ ጋድያን ማርካብያ ጸጺደ፡ ምንሰ ቃቺድኖ፤ ሰርጽሳ ግያ ሻፊ ኩሜዳ ሳን ባረንታ ኩንድሳንቶን ጊደ ሀርጊደ፡ ማርካብያ አፍያ ሻራ ዋሊደ፡ ጫርኩዋን ማርካብያ ጮ የድ አጌድኖ።

18 ጎቱ ዋልቃሚደ ኑ ቦላን ዋልቃሜዳ ድራወ፡ ዋንትሳ ጋላሰ ጫናጥ አባን ኦሉዋ ደሜድኖ።

19 ሄዘንላያ ጋላሰካ ማርካብያን ደእያ ሚሻ ኡንቱንቱ ባረንቱ ኩሸያን ኦሊድኖ።

20 ኑን ዳር ዋድያ አዋን ጸልንትያ በኤናን፡ ዋልቃማ ኡሹ ኑ ቦላ ቡክሸን፡ ሰንላጥ ቆየናን አቶኮ ጊደ ቆፔደ።

21 ኡንቱንቱ ዳር ዋድያ ቁማ ሜናን ጋምኤዳዋጥ ጉይያን፡ ጳወሎሰ ሄ ዋደ ኡንቱንቱ ግድን ደንድ ኤቂደ፡ ሀዋዳን ያጌዳ፤ “አሳወ፡ ሀንተንቱ ታ ዘርያ እኬደንቶን ቃርጾሳጥ ደንድናን አቴደንቶ፡ ሀዋ ማላ ባየላይነ ቆሁ ኑና ጋከና።

22 ሸን ሀእካ ታን ሀንተንታ ያዮጥተ ጋደ ዘራይ፤ አያወ ጎጥ፡ ሀ ማርካቢ ባናናጥ አትን፡ ሀንተንቱጥ እት ኡራ ሸምፑካ ባየና።

23 አያወ ጎጥ፡ ጸሳ ኪታንቻይ፡ ታና ሞዴዳ ታን ጎይንያ ጸሳዌ፡ ዝኖ ቃማ ታ ማታን ኤቂደ።

24 ጳወሎሳ፡ ያዮጋ፤ ኑን ርመ ጋድያ ካትያ ቁሳራ ሰንላን ኤቃናወ በሴ፤ በአ፡ ጸሳይ ባረ ኬካተላን ኔናና ብያ አሳ ኡባ ሸምፑዋ አሻና፡ ያጌዳ።

\* 27:14 “አወራቁሰ” ጌተትያ ዋልቃማ ጎቱ ክል ፑደሃጥ ወላሃ ባጋ ጫርክያዋ ግድያዋ በሴ።

25 ሄዋ ድራው አሳው፣ ያዮፕተ። አያው ጎጥ፣ ሄ ኪታንቻይ ታው ኦዳዳዋዳን ሀናናዋ ታን ጸሳ አማናይ፤

26 ሽን ጫርኩ ኑና እት ሃላን ደደቴዳ ሳኣን አባ ዶናን ደምእሳና” ያጌዳ።

27 ታማነ ኦይደንሉ ጋላስ ሜድትራንያ አባን ኑና ጫርኩ ያነ ሃነ ሱግሽን፣ ማርካብያን ኦሳያዋንቶ ቃማ ብላሂ ቢታኮ ማቴዳዋ ማላቴዳ።

28 ኡንቱንቱ ልክያ ጋድያ ጴራን ዴጽያባ ቃቺደ፣ ሃላን የግና፣ ሃላይ ኦይታሙ ሞትርያ ጨማቴዳዋ ኤሬድኖ። ጉላ ጋምኢደ፣ ላኤንሉዋ የጊደ፣ ሀታሙ ሞትርያ ጨማቴዳዋ ኤሬድኖ።

29 ኡንቱንቱ ሹቻትያሳን ኩንደና ማላ ያዪደ፣ ማርካቢ ቤና ማላ ኦይቂያ ኦይዱ ብራታ ማርካብያፕ ጉየና አባን የጊደ፣ ሳኦይ ዋንታና ማላ፣ ባረንቱ ጸሳቴዋ ዋሲኖ።

30 ማርካብያን ኦሳያዋንቱ ማርካብያፕ ክቻናው ኮዪደ፣ ማርካቢ ቤና ማላ ኦይቂያ አማሬዳ ብራታቴዋ ማርካብያፕ ሰንሳ ባጋና አባን የግያዋ ማላቴደ፣ ዋንግርያ አባን ዋሌዳ ዋደ።

31 ጳውሎስ ጴታቴዋ ካፑዋን ዋታዳራቴዋ፣ “ሀዋንቱ ማርካብያ ግድን ደኣና ጳዮፕ፣ ሀንተንቱ አታናው ዳንዳይክታ” ያጌዳ።

32 ሄዋፕ ጉይያን፣ ዋታዳራቴ ዋንግሪ ቃሽቴዳ ጋድያ ቃንጺደ፣ የድ አጌድኖ።

33 ሳኦይ ዋንታና ሀንሽን፣ ጳውሎስ ኡባይ ቁማ ማና ማላ፣ ሀዋዳን ያጊደ ዋሴዳ፤ “ሀንተንቱ ሀቺና ታማነ ኦይዱ ጋላሳ ናጌድታ፤ ቃይ ሄ ኡባንካ ቁማ ሞበይክታ።

34 ሄዋ ድራው፣ ጉላ ቁማ ሀንተንቱ ማና ማላ፣ ታን ሀንተንታ ዋሳይ፤ አያው ጎጥ፣ ሀንተንቱ ጋጸ ደኣናው ጉላ ቁማ ማና ኮሼ፤ ሀራይ አቶ ሀንተንቱ ሁጺያ ብናናፕ እቱካ ባየና” ያጌዳ።

35 ጳውሎስ ሀዋ ጊደ፣ ኡክላ አኪደ፣ ኡባ ሰንሳን ጸሳ ጋላቴዳ፤ መንሐ ሙሳ ደሜዳ።

36 ሄዋፕ ጉይያን ኡባይ ሎይሐ፣ ባረንቶ ቃይ ቁማ ሜድኖ።

37 ኑን ማርካብያን ደኣያዋንቱ ላኡ ጴታን ላፑን ታማነ ኡሱፑና።

38 ኡንቱንቱ ሚደ ካሌዳ ዋደ፣ ጫና ዛርጋ አባን ኦሊደ ማርካብያ ዴጶዋ ካወሽሴድኖ።

**ማርካብያ መኡሳ**

39 ሳኦይ ዋንቱዳ ዋደ፣ ማርካብያን ኦሳያዋንቱ ጋድያ ኤርበይክኖ፤ ሽን ሃላይ ጎጊደ አባን ገሌዳሳ ሞይያን ደኣያ ሻፍያ

አከካን ጸሌድኖ። ባረንቶ ዳንዳየትንቶ፡ ማርካብያ ሄ ሻፍያኮ ላጋናው ባረንቱ ቆፋ ቃቹድኖ።

40 ያቲደ ማርካቢ ቤና ማላ ኦይቂያ ብራታቱዋ ብሊደ፡ አባ ግዶ የጌድኖ፤ ሄ ዋደ፡ ማርካብያ ኮዬዳሳ ዛሪደ ላግያ ምላ ቃቹዳ ጋድያ ብሌድኖ፤ ሄዋፕ ጉይያን፡ ጫርኩ ማርካብያ ሰንፋው ሱጋና ማላ፡ ማርካብያ አፍያ ሻራ ሰንፋ ባጋና ቶቁ ኦሊደ፡ ቡሳ ደሜድኖ።

41 ሸን ማርካቢ ጨሙ ደኢያሳፕ አዲደ ሃላን ዶደቴዳ ሳኣ ማታን ደኢያ ደላሳን ደምኤት ኤቁዳ፤ ማርካብያው ጉየ ባጋይ ቤታ ሱገላን መኤረትሸን፡ ሰንፋ ባጋይ ዱገ ድሸቴደ፡ ቃጸናን እጽ አጌዳ።

42 ዋታዳራቱ ቃሸቴዳ አሳፕ እቱነ ሃላ ዋዲደ ከሰ አክቤና ማላ፡ ኡንቱንታ ዋዳናው ዘረቴድኖ።

43 ሸን ጸታቱዋ ካፑ ጳውሎሳ አሻናው ኮዪደ፡ ዋታዳራቱዋ ማቁዋ እጾዳ፤ ሃላ ዋዳ ኤርያ ኡባይ ማርካብያፕ ሃላን ጉፕ ጉፒደ ካሰቲደ ጋጸ ከሳና ማላ አዛዜዳ።

44 አቴዳዋንቱፕ አማራዳዋንቱ ሳንቃን፡ አማራዳዋንቱ ቃይ ማርካብያ መኤዋን ከሳና ማላ አዛዜዳ፤ ሄዋዳን ኡባቱካ ጋጸ ሳርተላን ከሴድኖ።

# 28

## ጳውሎስ ማልታ ግያ ሃላን ዶደቴዳ ሳኣ ቤዳ

1 ኑን ጋጸ ሳርተላን ከሴዳ ዋደ፡ ሄ ሃላን ዶደቴዳ ሳኣይ ማልታ ጌተትያዋ ኤሪደ።

2 ሃላን ዶደቴዳ ሳኣን ደኢያ አሳቱ ኑው ዳር ከካተላ ከኬድኖ፤ እራይ ቡካናው ደሜዳ ድራውነ ሜጉዋ ድራው፡ ታማ ኤሊደ፡ ኑና ኡባ ሞኬድኖ።

3 ጳውሎስ ዳር ቃይጾርያ ምላ ምጺደ ታማን የግሸን፡ ማርዛማ ሾሻይ ሴላ ድራው ከሲደ፡ አ ኩሽያን ጸጸቲደ፡ አ ዱኬዳ።

4 ሃላን ዶደቴዳ ሳኣን ደኢያ አሳቱ ቅርጫንትያ ሾሻይ ጳውሎሳ ኩሽያን ጸጸቴዳዋ በኤዳ ዋደ እቱ እቶ፡ “ቱሙ ሀ ብታኒ ሸምፑዋ ዋድያ አሳ፤ ሀራይ አቶ አባፕ እ አትናካ ኑ ጸሳ ፕርዳይ አ ፓጸ ደኦ ግቤና” ያጌድኖ።

5 ሸን ጳውሎስ ባረ ኩሽያፕ ቅርጫንትያ ሾሻ ወጸኪደ፡ ታማን ኦሌዳ፤ አ አይነ ኦሳቤና።

6 ኡንቱንቱ፡ “አ ቦላይካ ጋፌ፤ ዋይ እኬከናን ኩንዲደ ሀዬ” ያጊደ አ ናጊኖ፤ ሽን ጮራ ዋድያ ናጊደ፡ አ ቦላን አይነ ዲማቴዳባይ ዳይና፡ “ሀዌ ጸሳ” ያጊደ ባረንቱ ቆፋ ባሽ አጌድኖ።

7 ሄዋ ሄራን ሃላን ደደት ኡቴዳ ሳአ ካፑዋ ፑፕልዮሳ ግያዎ ጋዲ ደኤ፤ አ ኑና እማላተላ፡ ሄዙ ጋላሳ ሲቁዋን ሞክ ሞይዜዳ።

8 ፑፕልዮሳ አቡ ቆጶዋ፡ ሴላን ኡሉዋ ካጳ ሳከት ግሲደ ደኤ፤ ጳዉሎስ አ ሶይ ገሊደ፡ አዉ ጸሳ ዋሴዳ፤ ባረ ኩሽያ አ ቦላ ዋሲደ፡ አ ፓሌዳ።

9 ሄዋፕ ጉይያን፡ ሄ ሃላን ደደቴዳ ሳአን ሀርግያ ሀራ ኡባ አሳይካ ቃይ ዩደ ፓጶዳ።

10 ሄዋፕ ሰሞና ኑና ዳሮ ቦንቹዋ ቦንቹድኖ፤ ኑን ማርካብያን ባናዉ ደንዴዳ ዋደ፡ አገዉ ኑና ኮሽያባ ኑዉ እሜድኖ።

**ጳዉሎስ ማልታፕ ሮመ ቤዳ**

11 ሄዙ አገናፕ ጉይያን፡ ሃላን ደደቴዳ ሳአን ባልጉዋ አሲደ፡ “ማንተ ጸሳ”\* ግያ እስክንድርያ ማርካብያን ባናዉ ደንዴዳ።

12 ኑን ሰራኩስ ግያ ካታማ ገሊደ፡ ያን ሄዙ ጋላሳ ኡቴዳ።

13 ሄዋፕ ዩዩደ፡ ረጊዩመ ግያ ካታማ ጋኬደ። እት ጋላሳፕ ጉይያን፡ አዋይ ከሰያሳ ጶልያ ዋደ ኡሸቻ ዲገሃ ባጋ ጫርኩ ጫርክና፡ ዋንትሳ ጋላስ ፑትያሉሳ ግያ ካታማ ዩደ።

14 ሄዋን ኑን እት እት አማንያዋንታ ደሞና፡ ባረንቱና ላፑ ጋላሳ ኡታና ማላ፡ ኑና ዋሴድኖ፤ ሄዋፕ ቃይ ሮመ ዩደ።

15 ሮመን ደእያ አማንያዋንቱ ኑባ ሰሲደ፡ አፍያሳ ገያን “ሄዙ አቅያሳ ጌተትያሳ” ጋካናዉ ኑና ሞካናዉ ዩድኖ፤ ጳዉሎስ ኡንቱንታ በኤዳ ዋደ ጸሳ ጋላቲደ፡ ዋዛናን ሞንሴዳ።

**ጳዉሎስ ሮመን ታማርሴዳ**

16 ኑን ሮመ ገሌዳ ዋደ፡ ጳዉሎስ ባረና ናግያ ዋታዳራና ባረካ ደአናዳን ኦስቴዳ።

17 ሄዙ ጋላሳፕ ጉይያን፡ ጳዉሎስ አይሁዳቱዋ ካፓቱዋ ባረኮ ጶሴዳ፤ ኡንቱንቱ ሸቆዳ ዋደ፡ ኡንቱንታ ሀዋዳን ያጌዳ፤ “ታናዳን አማንያዋንቶ፡ ታን ኑ አሳ ዋይ ኑ አዋቱዋ ዋጋ ኢታባ አይነ ኑናን፡ ታና ዩሩሳላሙን ቃቺደ፡ ሮመ አሳዉ አሲደ እሜድኖ።

18 ኡንቱንቱ ታና ብዴዳዋፕ ጉየ፡ ሀይቃናዉ በሰያባይ ታ ቦላ አይነ ባይና ድራዉ፡ ታና ብላናዉ ኮዬድኖ።

\* 28:11 ማንተ ጸሳ- ሀዋንቱ ላኡ አቴማ ናናቱ፡ ካሰቶርነ ፓሎክሳ ጌተትያዋንቱ ዘዉስ ናናቱዋ ግዲደ፡ ማርካብያን ደእያ አሳቱዋ ናግያ ጸሳቱዋ ጌተቲደ ጶስቲኖ።

19 ሸን ሄዋ አይሁዳቱ ኤኖ ጌናን እጹዳ ዎደ፣ ታባ ቁሳረ ፕርዶ፣ ጋናዌ ታና ኮሼዳፕ አትን፣ ታን ታ ዛርያ ሞትያባይ ታወ ደእና ግደና።

20 ታን ህንተንቱና ጋከታናውን ሃሳያናው ህንተንታ ጴሴዳዌ ሄዋሳ፤ አያው ጎፕ፣ እሰራኤልያ አሳይ ናሸቻን ናግያዋ ድራው ታን ሀ ሳንላላታን ቃሸታድ” ያጌዳ።

21 አይሁዳ ጭማቱ ጳውሎሳ፣ “ኑን ይሁዳፕ ነባው ዳብዳቢያ አክበይኮ። ኑ እሻቱዋፕካ ሀራይ አቶ፣ እቱካ ዪደ፣ ነባ ኦድቤና፤ ዎይ ነ ሱንላ ባይዚደ፣ ኑው ኦድቤና።

22 ሸን ሄ አሳ ሱንላ ኡባ ሳን አሳይ ባይዚደ ሃሳይያዋ ኑን ኤርያ ድራው፣ ነ ቆፋ ሰሳናው ኮዬቶ” ያጌድኖ።

23 ኡንቱንቱ ባረንቱ ያና ጋላሳ ጳውሎሳው ኬሪደ፣ ሄ ጋላሰ ጮሪደ እ ደኢያሳ ዬድኖ፤ እካ ኡንቱንቶ ጸሳ ካወተላባ ማርካቱዳ። ቃይ ኡንቱንቱ የሱሳባ አማናና ማላ፣ ሙሴ ህግያፕን ናባቱ ጸፊዳዋፕ እኪደ ኡንቱንታ ታማርሲደ፣ ዎንታፕ ኦማርሰ ጋካናው ሎይሐ ኦዳዳ።

24 ባጋቱ ጳውሎሰ ጌዳዋ አማኔድኖ፤ ሸን ባጋቱ አማንበይክኖ።

25 ኡንቱንቱ ባረንቱ ግድን የወዋ ኤኖ ጌናን እጹዳ ዎደ፣ ጳውሎሰ እትባ ጌዳዋፕ ጉይያን ቤድኖ፤ እ ሀዋዳን ያጌዳ፤ “ጌሻ አያናይ ኑ አዋቶ ናብያ ኢሰያሳ ማጻፋን፣

26 “ ኔን ሄ አሳኮ ባደ ሀዋዳን ጋ፤

“ህንተንቱ ሰሳ ሰሳና፣

ሸን ህንተንቶ ገለና፤

ህንተንቱ ጴላ ጴላና፣

ሸን በእክታ።

27 አያው ጎፕ፣ ሀ አሳ ዎዛናይ ጉዙሜዳ፤

ባረንቱ ሀይላ ቱልሴድኖ፤

ባረንቱ አይፍያካ ጨሉሜድኖ።

ሄዌ ባዌንቶ፣ ባረንቱ አይፍያን በእና፤

ኡንቱንቱ ሀይላይካ ሰሳና፤

ኡንቱንቱ ዎዛናይካ እኪካና፤

ኡንቱንቱ ታኮ ጸሳኮ ሰማና።

ቃይ ታንካ ኡንቱንታ ፓላና”

ያጋ፣ ያጌዳ።

28 “ሰሞ ሀዌ ጸሳ አቶተላይ፣ አይሁዳ ግደናዋንቶ ኪተቱዳዌ ህንተንቶ ኤረቶ። ቃይ ኡንቱንቱካ ሰሳና” ያጌዳ።

29 [ጳውሎስ ሄዋ ጌዳዋፕ ጉይያን፣ አይሁዳቱ ባረንቱ ግድን ዳሮ ፓሉመቲደ ቤድኖ።]†

30 ጳውሎስ ክራ ጎልያን ላኑ ላይላ ኩመንላ ደኢደ፣ ባረኮ ይያ ኡባ ሞኬ።

31 ባረና ኦንነ ድገናን ጸሳ ካዉተላባነ ጎዳ የሱስ ክርስቶሳባ ኦዲደ፣ ያየናን ዳሪ ቆንጭሲደ ታማርሴዳ።

---

† 28:29 ዲማ ዲማ ማጻፋቱ ሀዋ ጉጅያዌ፣ ጳውሎስ ሀዋ ጌዳዋፕ ጉይያን ግያዋና።

## ጌሻ ማጻፋ

### **The Holy Bible in the Dawro language of Ethiopia**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Contributor: The Word for the World International

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Dawro

### **© 2011-2024, Wycliffe Bible Translators, Inc. and The Word for the World International**

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

---

PDF generated using Haiola and XeLaTeX on 2 May 2025 from source files dated 1 May 2025

585b63ca-b8e6-55c8-bfef-10bdc95ad69c